

خالد بيومي

فائلة داخلية

تتسع لعدة أشخاص

كيان كورنيل
ليلي

خالد بيومي

فانلة داخلية

تتسع لعدة أشخاص
مقالات وقصص ساخرة

كيان كورب
(دار ليلي للنشر والتوزيع)

الكتاب:

فانلة داخلية
تتسع لعدة أشخاص

المؤلف:

خالد بيومي

الغلاف:

حسام الدين

التنفيذ الفني:

حسام سليمان

التدقيق اللغوي:

دار ليلي

إدارة التوزيع:

أ. عبد الله شلبي

الإشراف العام:

أ. محمد سامي

رقم الإيداع: 2011/8492

© جميع الحقوق محفوظة، وأي اقتباس أو تقليد أو إعادة طبع - دون موافقة كتابية - يعرض صاحبه للمساءلة القانونية.

الترقيم الدولي: 3-30-3-977-978

المهندسين-23 شارع السودان-تقاطع مصدق-الدور الرابع-مكتب 11

هاتف: 33370042 (02) (002) - 3885295 (012) (002)

البريد الإلكتروني: mail@darilia.com الموقع الرسمي: www.darilia.com

خالد بيومي

قائلة داخلية

تسع لعدة أشخاص

كيان كورب
دار ليلى للنشر والتوزيع

إهداء

إلى طفلي الذي لم يُولد بعد أهدي هذه المقالات ليقرئها بعناية ، حتى إذا ما قرر يوماً الدخول في فائلة أبيه الداخلية لا يصاب بالدهشة أو الحرج إذا وجد وجوهاً و أشخاصاً لا يعرفهم ..

ثورة (التكاتيك)

حتى وقتٍ قريب كنت أظن أن العلم الحديث قد توقف عن الابتكار والاختراع في عالم النقل والمواصلات .. فكل شيء موجود من الإبرة للصاروخ .. عشر تلاف نوع من السيارات والميكروباصات والشاحنات .. موتوسيكلات بانواعها من فسبا 200 لموتوسيكل الهارلي والراسينج لموتوسيكل العادة ، للبوآخر والسفن والعبّارات .. وإلى آخره .. كل شيء موجود ..

ولكن على الرغم من ذلك ، وعلى الرغم من كل هذه الاختراعات ، يفاجئنا العلم الحديث بابتكار عجيب جداً قد لا يهمننا من اخترعه بقدر ما يهمننا اننا نعرف هو كان حاسس بإيه وقت ما خطرت في باله فكرة هذا الاختراع !! .. وهذا الاختراع ليس غريباً على الكل .. فهو شيء بتلات عجلات يتحرك في الشوارع الجانبية زي السحلية .. تعرف انه ماشي تحت بلكونتك من الكاسيت الصارخ على اغنيه عمرك ما سمعتها في حياتك و دائماً مليانه ندم وشكوى و بيغنيها واحد بيعاني من القيء أو عسر الهضم أو كليهما .. يوجد على هذه السحلية المتحركة كلام و عبارات زي :

"احذر .. السواق مبيتفاهمش" .. "قول يا باسط هتلاقيها هاصت" .. " شغل المساحات وعاكس في البنات" و عبارات أخرى من هذا القبيل .. ويقود هذا (الشيء) شاب محشش أو طفل صغير في طريقه للتحشيش .. و دائماً تجد سائق هذا الشيء العجيب بيتصرف وكأنه سواق مقطورة ضخمه و معاه رخصة دولية ورجل ذا أهمية في المجتمع ..

إذا رأيت هذا الشيء يسير أمامك بهذه المواصفات المذكورة فأعلم يا عزيزي أنك في أحدث اختراع لعالم المواصلات والنقل وهو : التوك توك ..

ومتسألنيش يعني إيه (توك توك)؟؟ .. وحت منين الكلمة دي ؟ .. احفظها كده .. لانك لما تبصله هتلاقي مينفعلهوش غير الاسم ده أياً كان معناه .. (توك توك) وبس .. وأنا لا اعترض على وجود التوك توك ولم اهتم بالضجه اللي طلعت حواليه بشأن ترخيصه من عدمه أو خطره على الناس الماشيه وإلى آخره .. بالعكس .. انا اكتشفت فيه ميزات فريدة جداً .. أولها أن التوكتوك

مش بيمشي زي بقيت وسائل المواصلات اللي خلقها رينا .. لا .. ده بيتنطط .. زي عربيات الملاهي ..
وده في حد ذاته بيشيع جواك رغبات مكبوتة لو مكنتش قضيت طفوله سعيدة .. ده غير أنك لما بتقعد في
الحن اللي ورا بتحس بتوحد فريد من نوعه وكينونه نادرة ... طبعا مش فاهم يعني ايه توحد وكينونة بس ده
اللي هتحسه فعلاً .. أينعم قدامك بشربين فيه سواق مسجل خطر ممكن يتلفت في أي لحظة ويضربك
مطواه في بؤك ولكن ده ميمنعش ان فيه متعه انك تقرب قوي من الارض وتشوف الناس من تحت بعد
ماكنت بتشوفهم من فوق وانت راكب الاتوبيس وده في حد ذاته ممكن يقضي على حالة الملل اللي عندك
ويعلمك التواضع ..

أول توكتوك ركبته كان في بولاق .. وكنت ماشي فوق كوبري مشاه وشايف من فوق مستعمرة للتكاتيك
عاملين زي النمل .. يفادوا بعض ، ويقربوا من بعض ، ويهوشوا بعض ، ويشتموا بعض .. نزلت من
الكوبري .. قابلني اول واحد من سائقي التوكتوك وكان شاب مدمن ويرجته مقرفه ولافح كوفيه صوف على
وشه .. قالي بلهجه مفيهاش مناقشة :

- رايح فين ؟
- زنين ..
- هتركب عادة ولا مخصوص ؟
- مش فاهم ؟
- مخصوص يعني هوصلك لوحداك وهتدفع اتنين جنيه .. والعادة يعني أربعة يركبوا معاك وكل واحد
يدفع خمسين قرش ..
- يا نهار ابيض .. أربعة هيركبوا غيري .. لا يا عم .. انا هركب لوحدي .. خد الاتنين جنيه واتكل
على الله ..

توجهت إلى التوكتوك الخاص بالأخ وكان مكتوب عليه بخط قبيح :

"روتانا توك توك .. مش هتقدر تمشى على رجلك "

وفي لحظات قليلة - ومما رأيته ولاحظته - اكتشفت أن زي ما الشيوعيين والمناضلين بيعتبروا (تشي جيفارا)
هو أبوهم الروحي في النضال فسائقي التوكتوك بيعتبروا (عم أنور الراجل اللي بيشتم) في اعلانات ميلودي
هو أبوهم الروحي في قلة الأدب ، لأنه طول مانت راكب هتسمع احلى كلام .. يا ابن (التييت)

خلي عندك (تبيتك) دم وخذ دورك .. يا فرحه أمك بيك يا (تووت) يا ابن (التيت)... ده انا هطلع (تبيت) اللي خلفوك .. وكل الكلام الحلو اللي كان ممنوع عليك تسمعه في طفولتك السعيدة ..

أخذ الشاب اللي بيسوق نفس بعصبية من السيجارة اللي كانت ريحتها تدل على أنها كوكتيل من مواد محظورة وقال :

- معلش يا باشا .. هو الواحد لازم يقل أدبه على الخلق دي عشان ياخذ حقه ..
- ربنا يسهلنا جميعاً ..
- أصل انا اهم حاجه عندي الكرامه .. ده أختي سابت خطيبها عشان كان عايز يخطبها من غير موافقته ..

طبعاً مفهمتش ايه الفكرة !! .. وعلاقة إيه بمين؟! خطيب مين وموافقته مين؟ .. الواد بايظ .. ودي سمة تانية مميزة لسائقي التوكتوك .. انهم بايظيين ..

بعد عدة أمتار من التنطيط وحاسبي يا بت وامشي عالرصيف يا حاجه وكتكوا نيله على ابن التيت اللي ركبهالكو أخذ نفس عصبي من السيجارة الكوكتيل المميزة اللي في ايده وبصلي في المرايه وقال بنفس اللهجة التي لا تقبل النقاش :

- امسك كويس يا باشا الله يكرمك أصل سواقين التكاتك هنا أغيبا قوي ..
 - تكاتك؟؟؟ .. حاضر .. همسك يا عم وربنا يستر ..
- بص لي في المرايه وقال :

- على فكرة يا بيه معلومة ليك .. اسمها فعلاً تكاتك .. مش تكاتيك زي ما بتقولوها .. دي غلطه شاعه عند الناس اللي معاهم شهادات عاليه زي حضرتك ..

اخذ نفس تاني وقال بثقة متناهية :

- وابقى شوفها في الكاموس .. هيقولك كذا توكتوك مع بعض بيتقال عليهم تكاتك..
- كاموس ايه ؟
- الكاموس .. الكتاب الكبير ده اللي فيه الكلمه والترجمه بتاعتها بالانجليزي ..

وقام باصص لي في السبعين مرايه اللي حواليه لدرجة اني حسيت ان انا قدام عصابة قطاع طرق .. ضاقت عينيه وخذ نفس ملا بيه التوكتوك وقال :

- على فكرة يا باشا ميغركش المنظر الوسخ والخلقة بتاعتي .. ده انا سبعة صنايع والبخت ضايع ..
بس هي البلد اللي عملت فيا كده .. بالك .. أنا خارج من خمسة ابتدائي يعني اعرف شوية
حساب .. العيال القذرة اللي حواليه دول مداشوش تراب مدرسة من اصله ..

قالها وحس بنشوة رهيبه طلبت منه أن يأخذ نفس سيجارة عميق ولعن الزمن اللي دفن موهبته وعبقريته
وخلاه يسوق توكتوك ويقتى ملطشه للي يسوى وللي ميسواش وقام مكمل ملحمة معاناته بوصله غنائية
صارخه لواحد مضايق انه قفش مراته ليلة الدخلة مع واحد تاني لكنه ساعها وبعد شويه قتلها عشان
مرضيتش تكوي له القميص بتاعه .. أنا سمعت الاغنيه دي فعلاً .. ولكن مش متذكر كلماتها .. يمكن لأن
الراجل اتسجن قبل ما يكمل الأغنية ..

وبينما التوكتوك العظيم يشق طريقه في مجاهل بولاق .. وفي حارة ضيقة لقيت عربية ربع نقل بتزق علينا
بغاوة .. طبطبت على كتف الواد اللي يسوق وقلت بكل لطافة وجنتله :

- بقولك يا حبيبي .. اللي وراك عايز يعدي ..
- فكك منه؟؟
- يا ابني اخزي الشيطان ده ربع نقل ..
- يا باشا بقولك فكك .. انت مش عايز توصل ... مترغيش كتير ..

واكتشفت هنا حقيقة أخرى بشعه وهي ان سائق التوكتوك عنده كرامه رهيبه بتنتح عليه اكمنه راكب
اصغر حاجه في عالم الأشياء اللي بتمشي بعجل ودي بتخليه يحس بعقدة اضطهاد لو حد أكبر من
توكتوكه حاول يعدي .. واكتشفت شيء آخر أبشع .. ان الولد محمش قوي ومش في وعيه .. وده معناه
انه ربما يكون فاكر ان اللي جنبه دي بسكلته مش عربية ربع نقل ..

مرة واحد لقيت الواد بياخذ نفس عميق ويبص في المرايات حاوليه ويقول بغیظ شديد وكأنه في فيلم
المهمه المستحيلة :

- انتوا هتتكاتروا عليا ولايه؟؟
- يا ابني يتكاتروا عليك فين؟! .. مهو واحد بس عايز يعدي ..
- واللي على يميني ده مين؟! ..

بصيت بيمين ملقتش حاجه ..

- ارمي السيجارة اللي في ايدك دي الله يجرب بيتك ..

كلاكسات من الربيع نقل .. التوكتوك عنيد .. صراع التنين والنملة .. مسألة كرامه .. يا نوصل يا نموت بكرامتنا .. كلاكسات .. شتميه .. اباحه .. متحاسب يلا .. وفجأة عملنا حادثه .. وهنا بس اكتشفت ان حادثة التوكتوك مش معناها انه يتخبط زي اي وسيلة مواصلات بتحترم نفسها تتخبط وتقف .. لا .. ده بيتقلب علطول .. لذلك الحادثة في مفهوم التوكتوكايشن هي الانقلاب والشقلاظ في الهوا وانك تلاقي نفسك متمرمغ في الطينه .. و لكني اكتشفت ده متأخر قوي بعد ما لقيتني انا والأرض حته واحده .. وشهدت ارض بولاق في هذه اللحظات اتساخ قميصي الجذاب وبنطلوني الحرير وبهدلتي قدام اللي يسوى واللي ميسواش .. وطبعاً نضفت الهدوم على قد مقدر وسط وصلة الاباحه للواد اللي بيسوق وهو بيشتم النقل اللي طلع يجري بسرعه .. قام الأخ السواق وعدل التوكتوك وهو يبسب ويلعن ويتهم الراجل بأشياء سيئة تتعلق بذكورته ..

- يا ابني مش قلت لك ارمي السيجارة اللي في ايدك عشان تفوق وانت سابق؟؟

بص لي والادمان اللي على وشه وقال :

- ولا يهملك يا كبير .. حضرتك رايح فين ان شاء الله؟؟

- رايح فين ايه؟؟ .. انا راكب معاك من الاول ..

بص لي ولحت في عينيه كل معاني التوهان :

- من الاول فين يا باشا انت هتشتلغني؟؟!!.. انا طول السكه لوحدي !!

- يا ابني لا .. انا راكب معاك من الأول ودافع اتنين جنينه ..

- اه كده افتكرت خش... طب والي معاك ده دفع ؟

- يجرب بيت اللي انت شاربه ده..

ركبت .. وانطلق التوكتوك مرة أخرى في مجاهل بولاق .. قال الولد وهو بيدخن نفس السيجارة الكوكيتيل

اللي مش عايزة تخلص :

- امسك يا باشا كويس عشان متقلبش .. ده انا لسه من دقيقتين مقلوب قلبه هباب لو كنت معايا

مكنتش هتخرج سليم .. اصل بتوع المطايفي دول بيبقوا عايزين يعدوا بالعافيه وانا عندي كرامتي اهم

حاجه .. عارف اختي؟؟ ..

- اه عارفها .. مش دي اللي قتلت خطيبها عشان كان عايز يخطبها وهو مش عايز ..

بص لي باستغراب رهيب في المرآة وسحب نفس عميق قوي من السيارة وقال :
- يا (تيت) أمي .. هو الموضوع انتشر في بولاق للدرجة دي .. سبحان الله ..
وانطلق التوكتوك مرة اخرى في مجاهل بولاق .. كنت ناقماً على أول ركوبة ليا فيه.. ولكن على الأقل
بقيت عارف ان حادثة التوكتوك معناها انك تتقلب .. وده في حد ذاته رجحني كتير اني ابقى عارف
هيحصلي ايه قبل ما أركب .. وأقسمت أن المرة الجاية اللي هركب فيها توكتوك هركب (عادة) مش مخصوص
و هيبقى معايا سبعة راكبين .. عشان لما وقع الأقي سفنج ما بيني وما بين الأرض .. وطبعاً - ودي أهم
حاجه .. مش هقعد جنب الشباك ..

ابتسم يا ابن الكئيبه

من كام سنه كده جت على البلد هوجه كتب وكورسات ومحاضرات تنمية بشرية بطريقة مكثفه.. تخش أي مكتبه ولا تروح معرض الكتاب تلاقي كمية كتب رهيبه زي : (التعامل مع الشخصيات الصعبة) .. (توقف الان واصنع نجاحك) .. (استعد ثقتك بنفسك) .. (كيف تتعامل مع مديرك الواطي) وهكذا .. والكتاب من دول تلاقيه 200 او 300 صفحه .. غلافه الامامي عليه صورة المؤلف الأنيق اللي بيضحك ضحكه شيطانيه خبيثة ليها مغزى وبيشاور عليك بصباغه اللي واخذ نص الغلاف وكأنه بيقولك (بطريقة ممدوح فرج بتاع المصارعه) : أنت .. ايوه انت يا مغفل يا اللي مش عارف تمارس حياتك بصورة طبيعيه .. انا اللي هرجعلك ثقتك بنفسك وهخليك تخرج من كل همومك .. ادفع بس 120 جنيه يا بأف وأوعدك ان كل مشاكلك هتتحل في ثواني ..

تبص على ظهر الكتاب تلاقي ملحمه انسانيه عن المؤلف .. مكتوب أن المؤلف كان تقريبا مقضي حياته كلها يدرس طباع الناس وازاي انه من كتر الخوازيق اللي لبسها في حياته عرف كينونة النفس الانسانيه ودوافعها وبالتالي كيفية التعامل معها وتفادي خوازيقها المتتابعه .. طبعا اول 100 صفحه في الكتاب هي كمية رسايل شكر رهيبه جدا للمؤلف وازاي ان حياة ناس كتير اتغيرت بسببه .. والمؤلف حاصل على كمية دبلومات معقدة في علوم الباراسيكولوجي والتحريك عن بعد والتواصل مع العوالم الاخرى وتحضير الجن والعفاريت وانه زميل جمعية البيضة السريه ومحاضر بعدد من الجامعات والمؤتمرات العالمية .. وهكذا ..

هتلاقي كتب كتبيير كتبيير بالطريقه دي ..

و انا كان ليا تجربه مع احد هذه الكتب ..

كتاب اسمه (سحر الابتسامه) .. كتاب 250 صفحه .. أنيق مووت .. مترجم من الانجليزية .. غلاف الكتاب عباره عن شاطيء البحر الخلاب والمؤلفة قاعده على كرسي خشب وسط الطبيعه الساحره ولايسه مايوه بيعبر عن الانطلاق وبتضحك ضحكة آخر حلاوة وبتشاور عليك وتقول بكل إغراء : أنا كتبت الكتاب ده عشانك انت يا حبيبي .. ههليلك كل مشاكلك .. هتتريظ يا عيوني .. بس متبخلش عليا بعشرين دولار بس .. يعني بالميت 100 جنيه .. ادفع يا كوكو واقرا الكتاب واتمزع ..

وأنا طبعاً زي الدهل قمت دافع الـ 100 جنيه .. وقمت قاري الكتاب .. بصراحه الكتاب تحفه فيه .. الكتاب عن انه ازاي الابتسامه بتفتح الابواب المغلقه وتحل المشاكل .. وازاي انك لو ابتسمت لشخص وهو في قمة الغضب ممكن تملك قلبه في ثواني .. وعن أنواع الابتسامات ومغزاها .. باختصار الكتاب ممتع بكل المقاييس .. وقلت أنا لازم اطبق كل اللي فيه .. ولازم اتعامل مع الناس بالابتسامه الساحره دي .. وفعلاً حصل .. أول واحد شففته في الشارع ابتسمت له .. ولكن رد فعله كان مفاجيء .. شتمني شتيمه قبيحة جداً تتعلق بذكورتي .. أيوه فعلاً ده اللي حصل .. مصدقتش نفسي .. قلت يمكن المرة الجاية الابتسامه تنفع .. ولكن للأسف منفعتش .. كل ما ابتسم لحد عشان أملك قلبه زي ما الكتاب بيقول الاقي ردود فعل غير متوقعه .. الاقي رد زي : (انا قلت حاجه تضحك يا أختينا؟؟) .. أو (هو أنت يا امور فرحان بسنانك كده علطول) .. أو (اقفل بؤك ده .. جايب سقعه) .. وهكذا .. للأسف فشل الموضوع تماماً وجاب لي المشاكل بدل ما يحلها ..

زعلت قوي ايني دفعت 100 جنيه .. بصيت للكتاب نظره حزن لأني معرفتش أطبق منه أي حاجه رغم انه كان ممتع قوي .. وفجأة - وفي لحظة نادرة - عرفت سبب فشلي !! .. وليه أني مش قادر املك قلوب الناس زي ما المؤلفه عملت؟! .. السبب هو .. إني مش لابس المايوه ..

فيسبوك .. عنوان جاذبيتك

اكتشفت مؤخراً حقيقة مزعجة جداً ، وهي أنني أقضي أكثر من ربع الوقت على الفيس بوك ، وهي نسبة كبيرة جداً مقارنةً بالاوقات التي اقضيتها في الأنشطة الأخرى ، فقبل الفيسبوك كان يومي طبيعياً وفيه بركة .. فربع اليوم كان للنوم والعمل (و كنت بفضل الله انام في مكان العمل فأستغل هذا الربع جيداً) .. والربع الثاني للأكل و الأنتخه والتغليس على خلق الله .. أما باقي الوقت وهو تقريبا نصف اليوم فكنت أفضيه في مكان مميز جداً .. وهو الحمام .. حيث امارس هواية الاستحمام باستمرار وهي هوايه رائعه ولها كتب ومجلات وسأفرد لها مقالة منفصله فيما بعد تحت عنوان " حمامك عنوان جاذبيتك " .. ولكن كيف وصل الأمر لهذه المرحلة وهي إدمان الفيس بوك ..

ومنذ عام 2006 بدأ الفيس بوك في الانتشار بين الشباب بطريقة تشبه انتشار البانجو في حي الشرايه أيام العيد .. في هذا الوقت كان المجد كله لمواقع أخرى مثل (هاي فايف) و (ماي سبيس) ومواقع مماثلة في نشاط الشبكة الاجتماعية والتواصل بين البشر عبر الانترنت .. ولكن رويداً رويداً بدأ البساط ينسحب من تحت هذه المواقع وبدأت كلمة فيس بوك في الانتشار .. ووجدت الجميع من حولي يتهامسون وكأنهم يسوقون لمنتج سريّ : " (فيس بوك) .. (فيس بوك) ... عندك فيس بوك يا ض ؟! .. لا معنديش (بيص حواليه ويهمس) طب ما تعمل يا بأف مستني إيه" .. وشويه شويه لقيتني بسمع عبارات لا افهمها لدرجة شعرت معها اني في بلاد (فيسبوكستان) التي لا يعلم عنها أحد أي شيء .. وحدثني طوال الوقت اسمع عبارات مثل :

"اعملي (ادد) يا ض لما تروح .. هتلاقي البروفایل بكتشر بتاعتي وانا لابس تيشيرت مخطط و حاطط ايدي في مناخيري " ..

" بقولك ايه .. فيه واحد اسمه (على عوض) عملي ادد .. البكتشر بتاعته رمضان كريم .. تعرفه ؟؟"

انا دخلت على جروب " هندق الجزائر في السودان " ..

انا عملت لايك على " الحملة القومية للانتقام من الجزائر بعد ما ادقينا في السودان " ..

انا بعثلكوا جروب " احنا والجزائر اخوات ومدقوقين من كل الارض عيب كده ميصحش " ..

انا جبت 25 % في ابليكشن " اكتشف لاي درجة انت سكسي " ..

" هبعثلك جاروف وازميل " ..

افتح اللايك هتلاقيني باعتلك " خنزير هدية " ..

"عايز طاقة" .. "عايز مفتاح" .. "عايز اكل" .. ريكوسيت .. ريكويست .. وهكذا!!!! ..
العبارات دي حسستني انه فيه شيء غلط .. شيء مش مضبوط .. وهذا الشعور تحول لكسوف وخجل
لعدم امتلاك فيس بوك خاصةً مع نظرة الشفقة والعطف التي كان ينظر لي بها الاصدقاء الفخوريين
بامتلاكهم (اكونت بالبكتشر بتاعته .. فول اوبشن يعني) وهي النظرة التي كانت تجعلني اشعر بالاحراج
وكانني اقف امام الجميع بملابسي الداخليه ..

وبدافع الكسوف والاحراج والاحاح من الاصدقاء قرر العبد لله يعمل اكونت .. في دقيقة واحده ضريت
اي (باظ وورد) واي (يوزر نايم) لكن قعدت خمس ايام بليااليهم علبال ما نقيت بروفایل بكتشر ليا من بين
74 صورة مختلفة لأني كنت حريص أن تكون مناخيري فيها أصغر ما يكون ونظرة عينيا (لسعيد الحظ اللي
هشوف بروفایلي) أكثر سحرًا و جاذبية ..

كنت من داخلي واثق اني لن ادخل على هذا الاكونت ولن استعمله لاني بطبعي لا احب هذا النوع من
المواقع الذي يجعل كل اهتمامات الانسان ونشاطاته وصوره في فاترينه للاخرين ..

وهكذا شهد التاريخ انه في اوائل 2007 تم عمل اول اكونت ع الفيس بوك للعبد لله .. ذهبت في اليوم
التالي للعمل وانا في قمة السعادة .. انا عندي اكونت ومحدث يقدر يفتح بؤه .. وكنت استمع للزملاء وهم
يتحاوون عن الفيس بوك ولم اكن مهتمًا .. وفي لحظة قال لي احد الزملاء وهو ينظر بغیظ:
" مش ناوي يا ابني تكمل نص دينك وتعمل اكونت .. ده ببلاش والله" ..

اتلفت إليه بكل ثقة وعلى وجهي ابتسامتي التي تجعلني لا أقاوم .. وباصابع ماهرة وبكل فخر الدنيا كتبت
(اليوزر نايم) و (الباس وورد) على جهازي فتجمع الاصدقاء والاالااضيش من كل مكان في وقت واحد وبؤ
كل واحد فيهم مفتوح من الدهشة و راحو ملمومين حواليا و كانوا شباب في ثانوي يشاهدون لأول مرة
مشهداً ساخناً لفيلم عربي متهرب على الكمبيوتر ..

اتفتح الفيس بوك وسط دهشة الجميع وصفق لي الاصدقاء واحتضني كل زملاء العمل في حرارة كبيرة
وطلبوا حاجه ساقعه وسندوتشات فول وطعمية من غير طحينه من عند الشبراوي وكانوا عايزين يقدموا
للمدير طلب نص يوم اجازة عن العمل بمناسبة ان العبد لله عمل اكونت ع الفيس بوك..
" امال يا ابني فين الفرندظ .. معملتش ادد ليه؟؟"

قالها احد الاصدقاء مندهشاً (من غير ما يفتح بؤه لانه كان مفتوحاً بالفعل) ..قلت له وانا مندهش : آدد .. يعني ايه .. مش هو الاكونت وخلاص؟؟..

ضحكوا بسخرية رهيبه وانصرفوا من حوالي تاركين اياي مع (اكونتي) البائس الوحيد .. وساعتها جلس احد الخبراء في مجال الفيس بوك بجواري وراح يفهمني كل حاجه .. من اول الآدد لحد الديليت .. ومن اول الكومنت لحد اللايك .. ويعني ايه ابليكشن .. ويعني ايه جروب وبايج و الفرق ما بينهم .. باختصار اداني الامتحان كله بالبرشام بتاعه .. وفي نهاية الجلسة هنأني وباسني (في خدي طبعاً) واعطاني شهادة معتمده باتمام دورة تدريبيه اربع ساعات في الفيس بوك لمن يهमे الامر ..

وبدات عملية الادد من الاصدقاء .. وبدا الفرندز اللي كانوا ييلحوا عليا يكتروا .. واحد ورا الثاني .. (ادد) ورا (ادد) .. (كومنت ورا كومنت) .. ايشي ريكوست وايشي ابليكشن .. وطبعاً اكتشفت ان كل اللي عملولي اضافه مكنوش بيعملوها عشان سواد عينيا .. كانوا بيعملوها عشان نلعب سوا فارم فايل أو مافيا أو تريجر آيلاند .. واتأكدت من شعوري لانه بعدها علطول عملولي ديليت لما اكتشفوا اني مبلعش الحاجات دي .. قمة الندالة ..

وفي هذه السنوات اكتشفت ان الانجذاب في الفيس بوك يبدأ مع اول (كومنت) ظريف واول (آدد) لواحد مقبلتوش من سنين .. ايه ده مش ده فلان اللي كان يبيلعب كورة معانا واحنا صغيرين؟ .. اه هو .. ده كبير اهو وعينيه احولت وبقى جعر عن زمان!!....

ويبدأ الانجذاب ايضاً مع اول (فيديو) يخليك تفتس من الضحك .. واول رساله خاصه عالانوكس وتبقى تتمنى من قلبك ان يبقى ليك secret lover او واحده حلوة بتعترف لك بكل جوارحها اد ايه اثرت فيها البروفایل بكتشر الوهمية اللي انت حاططها وانت بتتليف في البانيو وبصة عينيك فيها سحر الدنيا وجنبتك الممسحة القدرة عاملين مع بعض خلفية تحفة!! .. وقد ايه فرحتك لما تعمل مع البنت دي شات لمدة اربع شهور .. وقد ايه زعلك لما بتكتشف في الآخر انه واحد صاحبك حيوان بيشتغلك..

اكتشفت ان الانجذاب في الفيس بوك يبدأ مع اكتشاف ان انت 90% سكسي مقارنةً بفوزي اللي حصلش 40% أو جمال اللي طلع 10% وتامر اللي طلع مفيش اي حاجه خالص .. ويستمر الانجذاب لما تكتشف ان بلدك الحقيقية هي فرنسا (ومن اول مرة مش زي اللي بيلعبوا سبعين مرة لحد ما تطلع لهم)

وتتغاض لما صاحبك الاهدل يطلع امريكا من اول مرة.. لكن ترتاح لان صاحبكوا التالت لعب الابليكشين
23 مرة ويرضه بيطلع مصر ..فتحس اد ايه الابليكشن ده كان صادق قوي ..

وهكذا وهكذا وهكذا يستمر الادمان .. "كومت" ورا "لايك" ورا "ادد" ورا "شير" ورا "فيديو" ورا
التحسس على فايلات ناس تانيه .. ورا " الواد ده عنده مزز كتير ع البروفايل مين دووول؟؟" .. تلاقي
الوقت بيتسحب ويضيع وتلاقي نفسك بتقعد ساعات كتيسيسيسير ..

وينتشر الفيس بوك انتشار النار في الهشيم ، ويخرج نطاقه من وسط الشباب إلى الإعلام والصحافة
والمؤسسات والأحداث الهامة .. وتلاقي معظم الاحداث والشركات والهيئات والاهتمامات ليها بايج كبير
ومعجبين كتير ومنتظرين اللايك الكريم بتاع حضرتك للانضمام ليهم .. حتى الشخصيات العالمية ليها
اكونت ع الفيس بوك من فنانيين ورياضيين وشخصيات سياسيه .. وآخرها كان الملكة اليزابث .. ملكة
بريطانيا .. واللي اذاعت الصحافة مؤخرأ انها عملت اكونت ع الفيس بوك .. وكنت ساعتها بتسائل : هل
الملكة اليزابث عملت الاكونت برضه تحت الحاح وضغط؟؟ .. هل هي مشتركة في ابليكشن " اكتشف قد
ايه انت سكسي؟! " .. او ابليكشن " بلدك الحقيقية ايه ؟ " .. تطلع لها مصر مثلاً؟! .. هل يجروُ حد
يديها كومت سافل او ميعملش لايك ع الستاتس بتاعتها حتى لو كانت "جود مورنينج يا انيمالز"؟! ..
مش عارف .. انا لقيت فعلا الاكونت الخاص بالملكة اليزابث وكنت هعملها اضافه .. ولكنني تراجع في
اخر لحظة لان البروفايل بكتشر بتاعتها لم تكن بالجاذبية المطلوبة بالاضافه انها لو ماتت تاني يوم هيمسكوني
انا بتهمة الارهاب لاني اكيد جبت لها سكتة قلبية بفيديو بعته عن انتحار التماسيح الجماعي في نهر
الامازون او صيد الكلاب الضالة في جمهورية مصر العربية ..

يستمر ادمان الفيسبوك وليس هناك حل .. ثلاث سنوات من الشقاء .. فماذا بعد 10 سنوات .. وماذا
بعد عشرين سنه ؟ ..

تذكرت هذه الخواطر وانا جالس منذ عدة ايام إلى جهازي القديم في العمل واتطلع إلى العدد الهائل من
الكومنتات واللايكات والفيديوهات والابليكشينات والنوتيفيكيشنات ولا تزال حيرتي اذا كنت اخش الفارم
فايل ولا كفاية كده مش ناقصة ..

قطع خواطري احد الزملاء الجدد في العمل وكنت اقوم بتدريبه على برامج خاصة سيعمل بها فيما بعد ..
التفت اليه وانا متعب ومنهك وتحت عيناى ازرق (من ادمان الفيس بوك) .. قال لي :
- بشمهندس خالد .. ليا عندك رجاء ..
- خير؟ ..فيه حاجه مش فاهمها؟؟
- لا خالص .. انا بس .. كنت عاوز حضرتك تعملي اكونت ع الفيس بوك ..
للحظات تذكرت موقفى منذ ثلاث سنوات .. نظرت إلى الزميل الجديد المتحمس بعيناى المتعبتين ،
المدمنتين .. وكان موقف زميلى يشبه ما يحدث في الافلام العربي حينما نجد شاب زي الورد طالب من
مدمن انه يجرب شمة هيروين فينظر إليه المدمن ويحاول انه يحذره لكن في الاخر يديله الشمه عشان يبقوا في
الهوا سوا ..

نظرت إلى زميلى طويلاً وكنت أتمنى إني ااقوله : بلالاش .. ولكنى لم استطع .. ولأني
شرير بطبعي فقد جررته من يده .. واجلسته على كرسي وعملت لوج اوت من بروفائلي وبدأت معاه رحلة
الادمان عبر الفيس بوك .. وبداخلي شيطان صغير ازرق يضحك من الشر ويقول :
تعالى لحممموووو يا حبيبي ..

الجنيه أبو شفايف

أعتقد أن الجنيه المصري هو العملة الوحيدة التي تعري حاملها بالكتابة عليها دون ندم .. فالجنية المصري بقى ملطشة لكل أنواع الكلام .. كلام حب ما بين اثنين .. إهداء من أستاذ لطالب مجتهد .. ذكرى تافهه لشباب سيس .. وهكذا .. ولا يحدث هذا في أي مكان بالعالم سوى مصر .. فمهما حدث ومهما بلغ حب الشاب الياباني لفتاته اليابانيه فهو لن يُخرج ال (ين) الياباني ويكتب عليه بحبك يا هوسوكاوا يا أحلى عيون مسحوبين في بر اليابان كله .. وده مش لان بنات اليابان كل عيونهم مسحوبين وفي حالة نعاس دائم .. بل لأن المواطن الياباني بيقدر عمله بلده و بيحطها فوق اي اعتبار ولو فوق ارتباطه بهوسوكاوا ذات نفسها .. وكذلك لن يقوم الشاب الامريكى بإهداء فتاته الأمريكية الشقراء الناعمة ورقة من فئة المائة دولار مكتوب عليها كلام مثل:

My love .. I die in your mother .. I love you the love of years

أو "حبيتي .. يموت في أمك .. بحبك حب السنين"

لا اعتقد .. فحب السنين والتنين وكل هذا الكلام العجيب لن تجده مكتوباً إلا على الجنيه المصري .. لا (ين) ولا (يورو) ولا أي عملة في العالم .. فقط في مصر .. ولا أعلم لماذا الجنيه عن دون عملات العالم .. ما الذي يريد ان يثبت الحبيب لحبيته بكتباته على الفلوس .. انه مستعد يضحى مثلاً؟! .. انه مش فارق معاه خالص؟ .. مش عارف .. ما لاحظته هو ان قيمة العملة كلما كانت كبيره كلما كان الكلام راقى وكلاس .. يعني ورقة ال 200 جنيه ممكن تلاقي تامر اللي ساكن في الزمالك بيحب سارة من المعادي ومديها 200 جنيه هدية الفالانتاين وعليها اهداء بالانجليش ولا بالفرينش ولا بالايطاليش ولا بالتشيكوسولوفاكيش و ده طبعا غير الدبدوب الغتت اللي معدي تمنه شيء وشويات .. والملاحظ أنه كلما قلت قيمة العملة كلما انحدر مستوى الكلام .. لأن مستوى الشخص اللي بيضحى بورقة بمتين جنيه غير اللي بيضحى بمية غير اللي بيضحى بعشرة .. وبالتالي لما توصل للجنيه الورق هتلاقي عليه ازيل كلام ممكن تسمعه او تشوفه .. ولذلك ففئة الجنيه هي فئة المسحوقين في المجتمع .. هتلاقي واد حُرْفِي بيحب بت في ثانوي أو واد ضايح بيحب بت شمامة .. وفي الاخر برضه البنت ضحت بالجنيه - بدليل انه وصلني وشوفت الكلام المكتوب عليه - عشان تشتري لبان مستكة او كيسين بوزو من اللي بيطلع فيهم كوبونات ..

تذكرت هذا الكلام لأني تعرضت لموقف محرج للغاية منذ شهر واحد في أحد كافيهاات جامعة الدول .. في هذا اليوم كنت اجلس وحيداً كأني شاب وسيم في احد الكافيهاات الفاخره .. معايا لاب توبي الفاخر و

فلاشتي المقدسة وقدامي الكابوتشينو من اللي عليه لغاويظ ورغاوي كثير .. وكأي شاب وسيم وجنتل في نفس الوقت (ودي نادرة الحدوث .. الوسامه والجتله مع بعض في نفس الشخص) حبيت اني ادفع الحساب .. عداني العيب طبعاً ... طلبت الحساب .. جه الحساب .. حطيت الفلوس ومعها واحد جنيه مصري لا غير بقشيش .. اخدها الواد الذوق اللي كل شويه يظمن ان كله تمام والكابوتشينو حلو ونتمنى نشوف حضرتك والكلام اللي مبياكلش عيش ده !!

دقايق ولقيت واحد بزى مختلف باين عليه الماناجر (او مازانجار مش عارف) بيناديني ويقول: ممكن كلمة لو سمحت ..

وكأي شاب وسيم قمت .. ابتسم المدير ابتسامه لطيفة جدا وقال:

- " آسفين لتعطيل حضرتك "

- " لا .. ميهمكش "

قام طلع الجنيه وقال :

" ممكن تقولي ده ايه "

بصيت للجنيه وقلت :

" ده جنيه .. تبيز .. بقشيش .. ايه المشكله؟ "

قال المدير :

" متشكرين لذوقك .. بس مقصدش .. بص فيه كده "

اخذت الجنيه وبصيت .. وساعتها اخدت بالي .. الجنيه مكتوب عليه كلام واضح انه من شاب صايح - الصراحه صايح قوي - لبنت واضح انها بتشم حاجات مش كويسه ... الجنيه مكتوب عليه بأقذر خط في الكون ..

" بحبك يا عفت يا أحلى شفايف "

وبجوار هذه العبارة توجد رسمة شفايف بالقلم الجاف واضح انها شفايف وحيد القرن وليس لها صلة بالشفايف الآدمية ..

وبمجرد ما قرئت العبارة مقدرتش امسك نفسي من الضحك .. ابتسم المدير .. بينما كان الشاب اللي بيقدم المشروبات بينظر ليا نظرة وحشه قوي وكأني شتمته شتيمه قدره .. اعتذرت للمدير و اخرجت له

جنيه نضيف شيك اخر حلاوة من غير شفايف .. اخذ المدير الجنيه بكل ذوق ولو أني مفهمتش ايه الي زعله قوي كده .. ولقيته بينظر للشاب بابتسامه مرضيه وهو يقول :
خلاص يا ابني الموضوع واضح انه طلع صدفة والراجل ميقصدش ..
هنا خطر في بالي خاطر رهيب .. بصيت على البادج اللي على قميص الشاب اللي بيقدم المشروبات لقيت مكتوب:

Effat Mahmoud
Hall Waiter

او بالعربي :
عفت محمود ..
مقدم مشروبات ..

وهنا ارتعبت رعب الدنيا كله وفهمت نظرة الكراهية في عيون الاخ (عفت) اللي بيقدم المشروبات .. الموضوع مش مجرد كلام مكتوب على الجنيه .. ده بيتهمني بالتحرش .. والموضوع كله صدفه لا تتكرر واحد في المليون وممكن أي حد يصدقها لأن اطراف القصة كلها مترابطة :
" شاب وسيم وحيد معاه لاب توبه ويشرب كابوتشينو بالرغاوي اللي هو انا " ..
"جنيه بقشيش مكتوب عليه (بجبك يا عفت يا احلى شفايف)" ..
"واحد بيقدم الطلبات اسمه (عفت) (بغض النظر عن شفايفه)" ..
يعني تهمة التحرش بـ (عفت) لابساني لابساني ...

وكاي شاب وسيم وجنتل اعتذرت للجميع .. اخدت الجنيه ابو شفايف ومشيت بسرعة البرق ومرحتش الكافيه تاني خالص ولو اني هفتقد الكابوتشينو ابو لغاويظ ورغاوي كثير ..
لعنت كل اللي بيكتبوا على الجنيه والخمسه الجنيه والمية جنيه .. بصيت للجنيه وانا خارج من باب الكافيه .. صدفه عجيبه فعلا .. (بجبك يا عفت يا احلى شفايف)!!؟؟!! .. وتحت مكتوب بخط رفيع قوي .. (حبيبيك تامر) .. الطبيعي والمفهوم ان (عفت) بيقى بنت .. خطري لي خاطر مفاجئ ان اللي فيه الجنيه برضه يطلع ولد مش بنت و اسمه (عفت) .. بس ازاي ؟ .. هل ممكن ولد اسمه تامر يكتب لولد اسمه عفت اهداء كده؟! .. مش عارف .. عن نفسي انا ياما زمان كتبت اهداءات لزمايلي على الكراريس وكتب الدراسه مع تمنيات بالتوفيق والنجاح انما عمري ما جبت سيرة شفايفهم بصراحه ..

طلعت الموضوع من دماغي تماماً .. وكأي شاب وسيم ركبت سيارتي الفارهة .. وكأي شاب وسيم دورت المحرك .. واول ما جيت اتحرك لقيت شخصية بتجري من بعيد و بيصفر صفاره مزعجة كأني خطفت عيل من عياله ..

- مساء الفل يا باشا ..

طلعت جنيه معدن واديت هولاه ..

بص في الجنيه وبصلي بصه رهيبه وهو بيقول:

- ايه ده يا بيه؟؟

خطفت الجنيه منه وقعدت ابص فيه ليكون محفور عليه اهداء كده ولا كده ... ملقتش .. قلت له :

- خير؟؟؟

- عايزين اتنين جنيه يا بيه .. هو الجنيه يعمل حاجه في الزمن ده؟؟

- يعني الاتنين هم اللي هيعملوا!!؟

ناولته الجنيه المعدن .. ومعاه الجنيه بتاع عفت .. لقيت الساييس بيحمد رينا وبيبوس الجنيه ابو شفايف وقعد يبص له فترة طويله .. وكأي شاب وسيم - وتفادياً لسوء الحظ مرة أخرى - انطلقت بسيارتي الفارهه وانا مطمئن المرة دي لأني كنت متأكد أنه حتى لو الساييس ده طلع اسمه عفت .. فبالتأكيد شفايفه مش هتكون أحلى شفايف ..

المسحولون في الأرض

كنت قد فرغت لتويّ - وصديقٌ لي - من مشاهدة أحد أفلامنا المصرية على إحدى القنوات الفضائية .. لا أعلم .. لقد ضحكت في الفيلم كعادتي ولكني لم أستفد منه شيئاً - كعادتي أيضاً - وأنا بصراحة لست ناقداً جيداً للأفلام .. أما عن قصة الفيلم فلا أكاد أذكرها وقت كتابتي هذه السطور .. ولكنه أعتقد أنه كان هناك حمادة وغادة و هما يهربان من زليخة التي توقع بينهما ..

قلت لصديقي - وهو ممن يفهمون كل كبيرة و صغيرة في هذه الدنيا التي نعيشها - شيئاً هاماً جداً خطر ببالي .. قلت : ألا ترى يا صاحبي أن صورة الموظف المصري المسحوق - ذلك الشخص الذي يرتدي النظارة السميكة والملابس المهترئة ويحمل البطيخة ويتهافت عليه أولاده عند رؤيته عند دخوله منزله - قد انقرضت و لم تعد السينما تتداولها أبداً .. لقد كنا نرى هذه الصورة في أفلام السبعينات والثمانينات بكثرة ..

وهنا وجدت صديقي الذي يفهم كل شئ في الدنيا يلتفت إلىّ باهتمام قبل أن يضع كيس الفشار جانباً ويفرد قلوعة - وهذا يدل على أن ما سيقوله شديد الأهمية - ثم نظر لي بتحدٍ وقال : أنت كده جاوبت على نفسك ..

قلت له : كيف؟ .. قال لي : لقد قلت أنت الموظف المصري المسحوق الذي كنا نراه في السبعينات والثمانينات .. أي أن الرجل كان مسحوقاً منذ ثلاثين عاماً .. فما بالك به اليوم ؟ .. هو في الغالب صار مدفوناً بالحيا تحت الأنقاض .. وتحلل وتعفن ولم يتبق منه شئ .. واللي راح مبيرجعش .. ولهذا لم تعد السينما المصرية تتحدث عنه لأنه قد ذهب مع الريح أو بلغةٍ أخرى (عمر اللي فات ما هيرجع تاني) .. لذا فهو لن يعود للسينما ، وإن عاد فسيكون في فيلم من طراز (عودة الموظف الزومبي) أو (يا عزيزي كلنا مذؤوبون) .. وهو ما لن تستسيغه عقول المشاهدين أبداً .. رغم أنها تستسيغ الأفلام الأمريكيه المشابهه والتي تتحدث عن الأمريكي المذؤوب الذي عاد للحياة ليتبول أو ليشاهد حفل توزيع الأوسكار أو ما شابه ..

لذا فالموظف المصري صار خارج نطاق الخدمه .. وقد استبدلت السينما المصرية الموظف المصري (المسحوق) باللمبي وهو المواطن المصري (المسطول) .. وقريباً سيكون هناك المواطن المصري المبلول والمواطن المصري

المسحول (من قفاه) .. فالسينما حالياً تهتم بالشباب الفنانكي أكثر من ذي قبل ،فهي تهتم بمشاكلهم ومعاناتهم إلى أن يصيروا هم الاخرين مسحوقين ومسحولين ومبلولين يوماً ما ..

ألقى بكبشة فشار في فمه قبل أن يقول بصعوبة : هل رأيت كيف أوقعت زليخة بين منى وحمادة ؟ .. هذه هي أكبر مشاكل الشباب المسحول الان ..

هنزت رأسي أن نعم .. إن وجهة نظره مُقنعه بعض الشيء ..

ولكن لي سؤالٍ اخر .. لم ارتبطت صورة الموظف المصري المطحون دائماً بالبطيخ .. لماذا لا نراه يدخل على أولاده بشيءٍ اخر غير البطيخ ؟؟ ..

نظر لي نظرةً فظيعة بطرف عينه ولسان حاله يقول : (عيب عليك يا أخي .. مش أنت اللي تسأل السؤال ده !!؟) .. (وكأنني بائع بطيخ مثلاً) ..

ترك الفشار للمرة الثانية والتفت إلى بكامل جسده ، لكنه لم يفرد قلوبته هذه المرة لأنها كانت مفرودة بالفعل قبل أن يقول :

البطيخ يا صاحبي مرتبط منذ الأزل بالموظف المصري المسحوق .. و سؤالك بمعنى اخر : لماذا كان الموظف المصري يفضل البطيخ دائماً ليلازمه دوناً عن كل الفاكهة؟! ..

هنزت رأسي أن هذا بالفعل ما أقصده ..

تنهد وقال : لقد أختار الموظف المصري المسحوق البطيخ قديماً لأنه كان فاكهة رخيصة وكبيرة .. فأكبر ثمرة موجودة هي ثمرة البطيخ .. ولذا كان الموظف من دول يدخل على أولاده بالبطيخه عشان يملى عينيهم ..

ولو أحس الموظف أن أحد أولاده ينظر للبطيخه نظرة مش تمام .. كان الموظف من دول يقوم داششها على دماغ ابنه .. وعادي جداً .. البطيخه تتفلق ثلاث أو أربع حنتت ويقعدوا ياكلوا بعد كده مع بعض ..

وهناك سبب اخر لإختيار البطيخ وهو أن الموظف كان يجد تشابهاً لا يمكن إهماله بين البطيخه وكرشه المتهدل وهي ناحية عاطفية بحتة .. فعندما يدخل البيت كان بعض هؤلاء الأولاد يتخيل أن الأب داخل البيت ومعه بطيختين وبهذا يشبع معنويات أولاده .. بطيختين يا جدعان بدل بطيخه واحده .. ولكن كثيراً ما كانت تحدث الكوارث عندما يهيم الابن عن طريق الخطأ بشق بطن أبوه معتقداً أنها بطيخة أخرى ..

ولكن اليوم صار البطيخ غالباً جداً عن ذي قبل .. فالموظف يفكر كثيراً قبل شراء البطيخ .. وإن اشتراها ودخل بها البيت ونظر لها أحد الأبناء نظره مش تمام .. فإنه يفكر ملياً قبل أن يدشدشها على دماغ ابنه .. فهو يعقد مقارنة خفية بين دماغ ابنه والبطيخه الثمينه .. وفي هذه الحالة البطيخة تكسب طبعاً ..

تنهد ثم استطرده : كما أن لون البطيخ يا صاحبي هو اللون الأخضر .. وهو لون المحبة والسلام .. فعندما ترى الزوجة زوجها (المسحوق) وهو يحمل البطيخة الخضراء فهذا يعني أن الرجل لا يحمل أي ضغينه اليوم

ويريد لهذه الليلة أن تعدي على خير .. أما إذا دخل بشيء يميل للأحمر أو الأصفر كالمالنحو مثلاً فهذا يعني أن الليلة مش هتتعدي على خير.. وهذا هو السبب الرئيسي في أن الموظف المصري المسحوق على علاقة غير طيبة بالمالنحو .. فالبطيخ رمز السلام .. حتى أن الخبراء الأجانب كانوا سيجعلون البطيخه رمزاً للسلام بدلاً من أغصان الزيتون .. ولكن الأغبياء وجدوا أن البطيخة تشبه إلى حد كبير القنبلة الكبيرة وقد أيقظ هذا عندهم هوس الإرهاب.. لذا فقد تراجعوا عنها ووضعوا بدلاً منها أغصان الزيتون والشبت والبقدونس .. وهذه يا عزيزي هي أسرار إختيار الموظف المصري للبطيخ .. وأسرار إنقراض الموظف المصري ذاته .. قال جملته الأخيره وتنهد بإرتياح شاعراً بالرضا الشنيع عن ذاته وعن معلوماته المرعبة التي نفحني بها ، ثم أنه اعتدل في جلسته وراح يأكل الفيشار بنهم ويتابع عن كذب بداية الفيلم العربي الجديد .. أما أنا فلم أتابع الفيلم جيداً .. ولكني أعتقد أنه كان هناك حمادة وغادة أيضاً كما في الفيلم السابق وهم هذه المرة يبحثون عن زليخة لتوقع بينهما ويكتمل الفيلم .. زليخة على وزن بطيخة .. فعلاً البطيخة رمز السلام والمحبة.. راح صديقي يتجرع الفشار بينما رحنا أنا أقرأ أنا الفاتحة عدة مرات .. قرأتهما على روح الموظف المصري المسحوق .. وقرأتهما على زمن البطيخ الجميل .. وقرأتهما على روح صديقي أبو قلوعة - الذي يفهم كل شيء في هذه الدنيا.

عند أم تيتي

لاحظت أن احد الزملاء قد غاب عن العمل أغلب شهري يونيو ويوليو الماضيين قبل أن يعود بانتظام في سبتمبر ، وفي احد الايام دفعني الفضول لأسأله عن السبب .. بص حوالية بشك وقرب مني وقال لي في وديني كأنه عامل عامله :

- اصلي .. عقبال عندك .. بدور على عروسه ..

قلت بدهشة :

- يا سلااااام .. يا سيدي رينا يوفقك .. بس اشعني دورت في الشهور دي بالذات؟ ..

بص حوالية تاني و وغمز لي غمزة صايعة وهو يقرب مني و يقول :

- اصل ده موسم المزززز ...

- موسم المززززز!!! وبقيت السنه ايه؟؟ بيات شتوي؟؟

قرب مني برضه اكثر واكثر (لدرجة اني خلاص كنت حاسس انه هيبوسني في اي لحظة) وقال:

- مش واحد بالك انت ، اصل الشهرين دول البنات بيقوا في احلى حالاتهم عن طول السنه ..

(لقيته سكت وكمل) انا نفسي ببقى مستغرب ايه اللي بيحصلهم!! ، طب والله يا شيخ سكت جنبنا

قريب اسره كويسه .. عندهم بنت حسيت ناحيتها باعجاب شديد ، شكلها محترم ، وممتازة وبنت

حلال .. وبعدين فجأة بكام شهر من الاعجاب سكت جنبينا بنت تانية برضه..

توقف عن الكلام وقرب مني اكثر وغمز غمزة صايعة:

- بس التانيه دي ايبسييه ...حاجه اوستيك .. شتراوس الجنزيريل .. قلت مستحيل تضيع من ايدي ..

نفضت للاولانيه عشان كانت بالنسبه للتانيه عامله زي الضفدعة اللي عندها سكر وعملت كل ما يعمل

عشان اكلم البنت التانيه واتقدم لها .. وفي يوم فضلت ماشي وراها عشان اعرف اصلها وفصلها..

- وبعدين ..

- لقيت حاجه غريبه .. البنت التانيه طلعت في نفس الجامعه بتاعت الاولانيه .. وفي نفس الكليه ونفس

السنه وليها نفس الاسم وكمان ساكنه في نفس البيت .. وفي الاخر اكتشفت ان الاتنين واحد .. البنت

التانيه دي ما هي إلا الاولانيه ولكن بتشد حيلها في الصيف شويه..

ضحكت وقلت له :

- ياااه .. للدرجة دي .. طب وفي الاخر اتقدمت يعني؟؟

- قصدك اتقدمت للاولانيه ولا للتانيه؟ (ضحك وهو بيكمل) اصل الاولانيه زي ما قولتلك عامله زي الضفدعه اللي بتاخذ علاج كيماوي والتانيه مقبلش على نفسي اني اتجوز واحده كان فيه واحد تاني بيمشي وراها لحد الجامعه ..

ضحكت لقيته بيقول (بس من غير ما يقرب المرة دي عشان كان هيبقى الوضع صعب) :

- بس يا سيدي .. فالشهرين دول موسم نضوج البنات .. وبعدين خد بالك .. شهر يونيو ويوليو دول بيبقوا موسم الجواز برضه .. والافراح بتكثر .. وانا حبايي كثير فيروح حفلات علطول واقعد بقى افرز وانقي .. الوحشه على جنب والحلوة بعرف اهلها وعنوانهم واتقدم .. احيانا ببقى حظي مش ولا بد والاقبي ان احلى بنت هي العروسة نفسها وكل البنات عاديين ..
- وانت طبعاً بتشوف بقى احلى واحده من العاديين وتتقدم لها ..

سكت وقرب تاني وغمز لي غمزة صايحه وقال:

- عيب عليك ... انا بركز مع العروسة .. بعمل قدامها اي حركات .. مش يمكن تغير رأيها في اخر لحظة .. انا معايا فرصه لحد اخر لحظة قبل الدُخلة .. وكله بالحلال ..
ضحكت وقلت : ده انت واطي ..

قال لي والهلم على وشه :

- اعمل ايه بس؟ .. أنا فعلا بلاقي في الحفلات دي بنات حلوين كثير .. بس كل ما اتقدم الاقي صاحبهم طالب فيهم سعر عالي قوي ..

- ايه يا عم اللهجه دي .. موسم ... وصاحبهم .. و سعر عالي .. انت ليه محسني انك بتفاصيل على كبوت عربية!؟!

بص لي بصره حزينه وقال .

- والله يا صاحبي مش بإيدي .. انا من كتر الي شوفته بقيت بحس ان الجواز ده صفة وخلاص ... لا عاد فيه (لامور) زي زمان ولا احزنون .. وكل ما اخش بيت وتعجني بنت الاقيها معترضه على حاجات فيا .. واحده مش عاجبها اني بجيب شعري لقدام واني بشمر كمام القميص .. والتانيه مضايقه عشان شعر صدري مش بالكثافة المطلوبة .. عملت كل حاجه عشان اعجب .. حظيت جل من الغالي المستورد اللي بيتباعوا في كارفور في برطامانات لوئها برتقاني عامله زي الحلل ومش عاجب ... بقيت بزود تركيز البرفانات الي بركبها ومش عاجب .. جسمي اترى من التيشيرتات الحزقة اللي بلبسها عشان ابين البنشات والباي والتراي اللي طلوعوا بعد عناء في الجيم ومش عاجب .. فلوسي راحت على قمصان من غير زراير عشان شعر صدري يقب على وش الدنيا وبيان

تتقدم لخنزير استرالي .. قلت يا عمي كثير .. قالي يا ابني انت بتاخذ حاجه هتعيش معاك العمر كله ..
ومعاها ورقها وكل اللي لازي منه .. قلت له كثير .. قالي هاخذهم منك على دفعات .. قلت له
كتيييير .. قالي بص ده اخر كلام عندي .. خمسين الف جنيه شبكة وزيهم مؤخر .. ولو مش عاجبك
خد البنت الصغيره سعرها مهاود شويه .. خمسه وعشرين الف جنيهه شبكه وزيهم مؤخر .. قلت له
اشمعي الصغيره شبكتها قليلة؟؟؟؟؟ هم مش الاتنين بناتك والمفروض من نفس السلالة النادرة ولا انا
جيت بيت غلط ولا ابييييه؟؟؟ .. قالي : ايوه طبعا من نفس السلالة .. بس دوكها ورقها ضاع ..
فانت ونصيبك ...

توقف الصديق عن الكلام لالتقاط أنفاسه ثم تابع :

- بس .. انا اول ما سمعت (دوكها) دي اتجننت .. قلت له ده كلام فارغ يا عمي .. انا عايز اتجوز
واحد تعيش معايا عشان بتحبني مش عشان معاها ورق انها ضد الزلازل وتقولي سلالة وبطيخ .. روح
بقي جوزها لواحد من اللي بيطلعوا في عالم الحيوان .. قام قالي أفهم من كده انك مش موافق .. قلت
له اه طبعا .. ومن الاخر .. عند ام تيتي .. قام الراحل اتنرفز ..
- يعني هو اتنرفز عشان ام تيتي ..
- اه والله يا شيخ .. مفيش حاجه نرفزته في الحوار كله غير ام تيتي ..
- وبعدين ..

- كلمه مني على كلمتين منه قام رمى الهديه بتاعتي في وشي وقالي اتفضل من غير مطرود .. حتى يا
شيخ الهدية عورتني واخذت اتناشر غرزة .. حتى بص ..
دققت فوق حاجبه لقيت فعلا فيه اثار غرز .. استغربت قوي .. قلت :
- هو ايه الهدية اللي تعمل كده ؟ .. شكلك كنت جايب حاجه كبيرة ومكلف نفسك ..
- لا والله .. لا كبيرة ولا حاجه .. دول كانوا تلات ازايز ببس تبديل ..
- يا راااجل .. تروح تتقدم لواحد ومعاك ازايز ببس ... فين قيمتك؟؟ المفروض عليه شيكولاته ..
جاتوه !!

- والله انا اول عشرين بنت اتقدمت لهم كنت باخد معايا جاتوه وتورته وحلويات لحد ما لقيت ان
كمية الحلويات اللي جبتها تعمل شبكة لوحدها .. فبقيت بتقدم وانا معايا ساقع و كيسي شيبسي من
اللي بيطلع فيهم كوبونات .. كوكتيلات من اللي عليها العرض .. بوزو و شيتوس .. وهكذا ..
انتهى صديق من الكلام .. ضربت كفاً بكف متعجباً من حكايته .. ولم أملك سوى أن أربت على كتفه
متمنياً له حظاً سعيداً وأنه بالتأكيد سيقابل يوماً من تسعده ويسعدها وبلا أية شروط أو قيود ..

انتهى الحوار و انصرفنا من المكان .. وأثناء سيرنا وجدته ينغزني في جنبي ويقول بـخـبث:

- وانت يا صايع.. مفيش حاجه؟؟ .. انا عارفك مبتقولش..

اطلقت تنهيدة حارة وقلت :

- اه .. انا من كام يوم اتقدمت لواحد بس برضه محصلش نصيب ..

بدا عليه الاهتمام وهو يقول :

- ليه رفضتك؟

- لا .. كانت معجبه بيا قوي ..

- ابوها طالب شبكه كبيرة؟

قلت : لا برضه .. الشبكه كانت حلوة ..

قال : امال ايه؟؟!

مسحت دموعي وانا بقول مبحوح من العياط:

-ابوها اللي معندوش اصول ولا اخلاق .. كان .. كان ..

- كان ايه يا ابني متقول؟؟

- كان عايز يديني بنته من غير ورقها..

-

عودة إلى زمن الانحراف الجميل

منذ عدة سنوات و في حوارہ ببرنامج العاشرة مساءً قال الكاتب الرائع بلال فضل - في وصفه عما يحدث حولنا من مصائب - بأننا كمصريين قد انحرنا عن الانحراف ذاته .. فالانحراف (بتاع زمان) - وهو الانحراف المتعارف عليه واللي اتولدنا ولقيناہ - هو أن تجد السارق جاهلاً خرج من مراحل التعليم الأولى وهو أن تجد القاتل واحد بشله أو اتنين في وشه وغالباً لم يدخل التعليم من الأساس .. هذا هو الانحراف الطازة كما ولدته أمه .. أما الآن فقد تغير مفهوم الانحراف .. صار القاتل مهندساً وطبيباً ومبرمج كمبيوتر وعالم فلك .. وصار السارق رجل أعمال ومحاسب وموظفاً بينك .. وبهذا نكون قد انحرنا عن الانحراف نفسه .. ولذلك فقد تمنى الأستاذ بلال فضل - لا أن ينصلح الانحراف بالكلية - بل أن نعود فقط لزمن الانحراف الجميل عندما كان القاتل هو الرجل أبو بشله في وشه وعندما كان السارق هو شخص لم يكمل تعليمه بعد ..

قلت آمين..

غير أنني لو كنت حينها مع الأستاذ بلال لأضفت أنني كما أتمنى أن أعود لزمن الانحراف الجميل فأنا أيضاً أتمنى أن أعود لأزمان أخرى رائعة .. ومنها زمن الشحاتين اللذيذ .. وهو الزمن الذي كان فيه الشحات رجلاً طاعناً في السن تعدى الثمانين بخمسين سنه ، والذي بمجرد أن تمنحه ربع جنيه يقبل يداك ويسجد لله شكراً ثم ينصرف من أمامك محاولاً صرف الربع جنيه في سندوتش فول بالزيت الحار قبل أن يفاجئه الأجل .. لكن المفهوم تغير .. اليوم صار الشحات رجلاً كبيراً ، وطفلاً صغيراً ، وبت عندها 17 سنة شايله عيل ، ورجل يدفع رجل على كرسي بعجل ، وصارت هناك تسعيره للشحاتين .. أكثر من جنية هتاخذ دعوة حلوة .. أقل من جنية هتاخذ فوق دماغك، والشحات المودرن هو في سباق رهيب مع الإشارة اللي هتفتح بعد شويه .. فهدفه السامي هو تقشيطك انت واللي معاك في العربية قبل أن يتجه مسرعاً للعربية اللي واقفة وراك ثم التي تليها والهدف في النهاية هو أن يجمع ثمن وجبة كومبو من ماكدونالدز معاها بطاطس وعيش وصنداي كراميل ..

وكعودتي لزمن الشحاتين اللذيذ أتمنى أيضاً أن أعود لزمن المعاكسات اللطيف .. وهو الزمن الذي كان فيه الشاب لو لقي بنت حلوة يا دوب يديها كلمة ونخلص ، وييقى خايف لو حد شافه .. أما اليوم فقد انحرفنا عن مفهوم المعاكسات وصارت محافظة بأكملها على استعداد لقطع تذكرة قطر للحاق بفتاة في مكان آخر ..

و أذكر أني في أحد الأيام وجدت فتاة تستنجد بجالسين على مقهى من شباب يطاردونها .. فما كان من الجالسين إلا أن قاموا وطاردوا الفتاة بدورهم مع الفتیان .. أما صاحب المقهى فقد كان يضرب كفاً على كف - ليس ترحماً على الأخلاق والقيم وأن الفتاة غلبانه - بل لأن الزباين قاموا من غير ما يدفعوا الحساب ..

وبالإضافة للعودة لزمن الشحاتين اللذيذ وزمن المعاكسات اللطيف .. فأنا أيضاً أتمنى - وبشدة - أن أعود لزمن المصايب الجميل .. وهو الزمن الذي كانت تحدث فيه مصيبة في البلد كل عدة أعوام قبل أن تزيد المصايب والكوارث بشكل رهيب وبمعدل كارثتين لكل مواطن ، واحده الصبح وواحدة بالليل عشان تنام وأنت مكيف ومتريظ وآخر حلاوة ، ولو مش عاجبك - مش هنقولك احبط دماغك في الحيط زي زمان - هنقولك ولع في روحك لأن دي الموضه دلوقتي ، اللي مش عاجبه حاجه يولع في نفسه واحنا بلد مسابير للموضه الحديثه في فنون الاحتجاج والتوليع في الذات ..

وعلى المستوى الشخصي فقد استقبلت عام 2011 بتسرب مياه من الشقه التي تعلوني .. فقد فوجئت وأنا جالس في أمان الله بقطرات من الماء تنهال من السقف ونازله في بؤي .. وكانت مياه قدرة و غزيرة على مدار اليوم .. وغزارة هذه المياه أكدت لي أن جبراني اللي فوق قد استبدلوا جلوسهم في الصالة بجلوسهم الدائم في الحمام واستبدلوا انشطتهم اليومية - كالأكل والشرب والفرجه على التلفزيون - بنشاط واحد وهو انفاق الساعات الطوال في الغسيل والمسح والتنظيف ..

ولما لم يستجيبوا لندائي بأني تعبت من هذه المياه القدره التي أغرقت الشقة قررت الذهاب إلى قسم الشرطة ، وحررت محضر تسرب مياه ، واخبرت الضابط عما حدث فطمأنني بأنهم سيأتون في غضون نصف ساعة ومعهم فنيين وسباك لعمل اللازم وأن ما عليّ فقط هو أن أملاً بياناتي .. كتبت اسمي وعنواني ورقم تليفوني وانصرفت ..

انتظرت نصف ساعة ولم يأت أحد .. ساعة ولا حس ولا خبر .. ساعتين ... ثلاثه .. والمية عمالة تنقط
والريجة بقت مقرفة والشقة بتغرق قدامي ..

اتصلت مرة اخرى بقسم الشرطة وسألتهم على سبب التأخير وكان الجواب شديد العجب .. قال لي
المحضر بأن البيانات ناقصة .. وأني كتبت عنوان شقتي كاملاً ولكني نسيت أن أكتب عنوان الشقة التي
تعلوني والتي تسربت منها المياه متسبباً لي في هذا الضرر .. ولذلك لم تتحرك سيارة الشرطة لأن البيانات
(مش مستوفية) ..

أصابني ذهول لمدة ثلاثة أسابيع .. أخبرته أن هذا أمر بديهي ويجب أن يعرفه بالفطرة .. فشقتي في شارع
الهرم والشقة اللي بتنقط عليها مية في بولاق ... كيف له ألا يعرف ؟؟؟!!!!!!

وضعت السماعة بعد أن سببته بالأب والأم .. وحمدت الله على نعمة العقل .. حينها فقط تمنيت فعلا
أن أعود للأزمان الجميلة عندما كانت المية اللي بتنقط عالواحد من الجيران مية حلوة وريحتها نظيفة وممكن
الواحد يستحمى بيها ويشيل شوية لو المية قطعت ..

راقبت بألم قطرات المياة القذرة وهي تنهال في غزارة لتغرق الشقة ثم فتحت التلفزيون على أغنية عمرو
دياب الشهيرة .. أي حاجه تيجي من ريحة الحبايب ..

أشوف لايكاتك أصدقك .. أشوف كومنتاتك استعجب ..

من أكثر الحاجات اللي كانت بتضايقني عالفيس بوك همه الناس اللي يتعاملوا مع (الستاتس) على أساس انها قاعدة تيوايت .. يخش يرجع النكد والقرف اللي جواه في وشنا ويكتب حاجات قمة في الكآبة و الإحباط بعدين يطلع يمارس حياته الطبيعيه ولا كأن اللي في التيوايت دول بني آدميين ..

وأنا عمري ما كتبت (ستاتس) نكد عالفيس لأني مؤمن دائماً أن الفريندز اللي عندي ملهمش أي ذنب في أن أبويا طلق أمي ، أو أبي مش لاقى شغل لحد دلوقتي ، أو أن بوكسر قطنيل اللي جتته مطلعش مقاسي ومش ماسك عليا كويس ويبدل من البنطلون .. عمري ما اعمل كده ..

ولكن مؤخراً ومن كتر القرف اللي الواحد شايفه كتبت من يومين (ستاتس) فيها احباط شويه وكثيية حبتين .. وهنا اتفاجئت بحاجه عجيبه .. تعليقات من ناس بعزهم جداً بيسألوني مالك؟! .. و ايه اللي حصل؟ .. وساعتها بدأت أرد و واتكلم .. ومن هنا - من هنا بس - حسيت احساس جميل .. ان الهم بينزاح شويه بشويه .. ومع كل لايك متين وكل كومنت ظريف بحس أن دماغى بتروق و قلبي بيصفى .. و كل ما تزيد الكومنتات بعرف أبي مش لوحدي وفيه ناس مشاركاني همي ..

وأنا كان تعليق البنت عندي بـ 100 ولد بصراحه .. يعني لما ألاقى واحد صاحبي كاتبلي (يا عم روق) .. (تعالي يا بومبو عالقهوة اغلبك زي امبارح) ، و (تعالي نشرب حلبسه على كوبري عباس) ومرة واحده الاقي بنت كاتبالي : (مالك يا بابي فيك ايه بس احكي لي عالشات) ومع الكومنت بتاعها قلوب كتبير .. بحس انه الدنيا مش سايعاني واني اتولدت من جديد ، وأن أبويا رجع لأمي ، وأن وبوكسر قطنيل بقى ماسك عليا أكثر من الأول وأن الدنيا مليانه شغل بس انا مش بدور .. فعلطول بعمل بلوك للعيال السيس دي وافتح الشات مع البنت الجميله عشان احكيها همي وافضفضلها عن اللي جوايا وأأقدم لها بالمره عرض زواج عالشات كده بدل ما أعرضه عليها في التليفونات وأضيع وقت ودقايق ممكن أخليها لبنات تانيه كتير ..

ومن هذا المنطلق بدأت أعتبر ان الفيس بوك هو قاعدة التيوايت الخاصة بتاعتي .. افتحه انكد على الخلق بعدين اخرج تاني فريش وجميل .. وقلت ساعتها لنفسى .. ليه انكد على 100 فريند بس لما ممكن انكد

على ألف وألفين فريند .. وبدل ما يشاركني في المهم واحد ولا اثنين ممكن اعمل طلبات اضافه تخلي المئات من البشر يومهم مش معدي وأسود من قرن الخروب لو قبلوا طلب الصداقة ده .. ومن هنا بدأت طلبات الصداقة تنهال على اللي حظهم تعيس من كل أنحاء الكرة الأرضية ..

وفي صفحتي عالفيس بوك كنت بكتب مقالات ساخرة .. وكانت الناس اللي بتنضم للصفحة دي على حس المقالات قليلين اوي ... يمكن واحد او اثنين كل يوم .. لكن لما بدأت أكتب خواطر حزينة ورومانسيات بتعبّر عن القهر ، والحрман ، والفراق ، والزمنقة ، و الجواز العرفي ، لقيت حاجه عجيبه جداً .. كمية بشر رهيبه بتنضم للصفحة .. تقريبا 500 شخص كل يوم بيخشوا عليها .. ال 500 دول بقى تقسيمتهم كالتالي .. منهم 499 بنت ، وولد واحد من نوعية (راجل يا حسام) .. فده أكد لي نظريتي في أن الناس يتموت في اللي يقلب عليها المواجه .. البنات اللي كانت بتخش الصفحة في الفترة دي على حس الرومانسيات الحزينه كانوا مميزين قوي .. صور بروفائلاتهم كلها على نمط واحد .. واحده حاطة صورة البروفایل بتاعتها بنت ماسكه خنجر وراشقاه في ضهر حبيبها وهو تقريبا مش مركز معاها ويأزأز ترمس .. وواحد تانيه حاطة صورة بنت خالعه قلب واحد من قفصه الصدري وماشيه بيه وعمال يدلدق دم والراجل (عايش عادي جدا) و بيترجاها ترجع قلبه اللي اتخلع عشان الدورة الدموية ترجع زي الأول .. والتالته حاطه صورة اتنين بيحضنوا في بعض على شريط القطر والقطر فوووووووووووووووو جى من بعيد هيدس ابوهم وهمه مكملين الحضن عادي جداً ..

الحلو ان البنات اللي انضموا للصفحة كانوا نشيطين قوي .. بيعلموا لايك .. ويكتبوا كومنتات غريبه مخطوطة سندوتش ما بين رموز معرفش بيحبوها منين .. حاجه زي :

♥♥ Like awyyy♥♥♥

(٠.٠.٠.٠) bmoooot fe kda (٠.٠.٠.٠)

مش عارف بيحبوا القلوب والحركات والرموز دي منين .. قلبت الكيبورد والمآذر بورد و الماوس ومولات الكمبيوتر عليها ملقتهاش .. الأحلى ان البنات دول مجتهدين جداً .. بعد ما يعلقوا بيعملوا شير للحاجات الكئيبة دي .. وبعدين لما يخلصوا الشير بيعملوا لي (آدد) عطلول ، على اساس انهم فاكرين إني رومانسي وبتاع تامر وشعر صدر وحركات وكده .. ولكن سرعان ما بيعلمولي (ديليت) بعد ما بيتفاجئوا أنه مش أنا الدنجوان اللي عايزينه و أن صورة بروفائلي مكنتش بالجاذبية المتوقعه ..

اكتساب الاصدقاء عشان يشاركوك الأحزان عالغيس بوك شيء رائع .. وكل ما عدد الأصدقاء في بروفايلك او صفحتك بيكثر كل ما صحتك النفسية تتحسن .. و أعرف انه اللي بيكتسب أصدقاء عمال على بطال ده واحد عنده احباط محتاج يوزعه عالمخاليق دي .. وده اللي أكد لي أنه وائل غنيم – ادمن صفحة كلنا خالد سعيد – كان عنده اكتئاب حاد لما شوفت صفحته اللي فيها مليون ونص بني ادم .. يعني لو صحي من النوم وقال (عماص عيني مضايقي) هيلاتي محافظة كامله عامله لايك و 3 دول وقارة معلقين عليه .. ده غير اللي عاملين شير لعماصه .. و يمكن وائل من كتر اكتتابه مكفاهوش المليون ونص في صفحته فقالك ايه ... اعمل ثورة يمكن الناس تحس بيا شويه .. وتوته توته فرغت الحدوته .. حلوة ولا ملتوته ..

أمريكا هي أم الدنيا .. وأم العالم .. وأبو أمك

أخبرني أحد الأصدقاء أنه ظن أنه عند سفره لأمريكا ونزوله أرض المطار فإن الأمريكان سيأخذونه بالعناق والقبلات لمجرد أنه مصرى ولأن مصر هي مهد الحضارة وهي الفراعنة وهي أكبر مستهلك للتوكتوك ونبات الكيوي في العالم ولأن مصر هي البلد الوحيد الذي يتم فيه تصوير كليبات تثير شجونك عن الوحدة الوطنية و التفجيرات و المصائب اللي بتحصل قبل أن تأتي الإسعاف لنقل المصابين..

ولأن مصر - كما ظن الصديق - هي بلد الفن وهي البلد الوحيد الذي به المطرب متعدد المواهب واللي عنده كذا دماغ .. فالمغني الذي يغني للحب والسكس ويظهر برفقة فتاة لابسه بلوزة حمالات وميكروجيب ضيقة هو ذاته المغني الذي يظهر في نفس القناة بعد دقائق وهو بيتشحتف بالدموع حزناً على سب النبي (ص) في الدنمارك مع فارق الماكياج والملامح الهادئة التي تؤكد لك أن هذا المطرب بقاله فترة بيصلي ويصوم واحساسه صادق ميه بالميه يبقى عليك لعنة الله لو مسمعتوش ..

ظن الصديق أن هناك قبلات وأعناق لأن مصر فيها أكبر نسبة من الشباب مستخدمي التكنولوجيا والإنترنت بوعي وبحرص وأكبر نسبة من الشباب المتدين الذي يرسل إليك فيديو ديني ويقسم عليك بقدر حبك للنبي أن تنشره وإلا فإنك فاسق وملحد ورخم وغلص ومطرود من رحمة ربنا ثم بعدها يقوم ذات الشاب بإرسال فيديو لراقصة روسية احترفت الرقص الشرقي مؤخراً وعلينا مساندتها ولا مانع لسب الدين لمن يعترض على ذلك ..

ظن صديقي أن هناك عناقاً وقبلات كثيرة لأن مصر - قبل أي شيء - هي أم الدنيا ، يعني أمريكا عياله من عيالها وبالتالي المفروض - على حسب كلام هذا الصديق - أنه يتعامل كأمر جايه تزور عيالها بعد فراق طويل ..

وبرغم كل ما فات فقد فوجيء صديقي بشيء عجيب جداً .. وهو أنه لا عناق ولا قبلات وأن مصر بالنسبة للأمريكان زي أي بلد تاني أو تالت .. زيها زي ماليزيا وسنغافورة ومدغشقر وجزر المالديفز .. فما الذي يجعلك كمصري مميّزاً عن باقي الجنسيات الأخرى حتى تتشحتف بهذه الصورة المزرية على العناق والقبلات !! ..

وقال صديقي بأنه قابل أمريكياً يعمل بائعاً في سوپر ماركت ويعشق الآثار وعندما حدثه هذا الصديق عن مصر وآثارها وأن مصر أم الدنيا وأم المصريين قال الأمريكي أنه يعرف مصر وينبهر بالحضارة المصرية ولكنه لا يعتقد بأن مصر أم الدنيا ولا حتى أم المصريين .. فهو يشاهد المآسي التي تحدث في مصر على التلفاز .. فإن كانت مصر أم المصريين؟؟ .. فمن أبوهم الذي تركهم بهذه الصورة؟؟ .. مين اللي عمل العملة المهيبه دي وجاب 80 مليون سايم للشرذ والجوع والفقر وسافر وهج عشان يعمل عملته الدنيئة مع شعب تاني .. لم يرد صديقي وانما غادر المكان حزيناً بعد أن أدرك أن البائع الأمريكي يتهمه بأنه هو وال 80 مليون مصري ولاد حرام حتى يثبت العكس ..

قال لي صديقي أن أمريكا بلد العمل والنجاح لمن يريد أن يعمل وينجح ، وكما قال الدكتور أحمد زويل في كتابه عصر العلم : أنه شعر بمجرد نزوله أرض المطار في أمريكا - وعندما استنشق الهواء و نظر إلى ناطحات السحاب - بأن هناك صوتاً يناديه للمثابرة حتى النجاح .. و أن أجمل ما في الأمر - كما أكمل الصديق - أن كل خطوة وكل تعب تتعبه ستجد له مقابلاً هناك ، فالطريق الذي ستسلكه وإن كان صعباً لكنه سيؤتي ثماره بعد حين وستجد نفسك في مكان وموضع ونجاح لم تكن لتتخيله .. أما في بلادنا المحروسة فإنك ستتعب كثيراً وتمر بكل المراحل الدراسية المعقدة وتكون النتيجة في النهاية أنك قاعد في ارابيز ابوك وامك بلا عمل وبلا فائدة .. والموضع الخيالي الذي ستكون فيه بعد ذلك هو مستشفى الأمراض العقلية بالعباسية إن أذن الرحمن ..

قال صديقي أن الأغاني الوطنية في أمريكا ليست بهذه الكثرة كما في مصر .. فلن تجد هذا الكم من الأغاني الوطنية كما في بلادنا ، ولن تجد السمراء ويتني هيوستن تصرخ (بنحبك يا أمريكا .. بنحبك يا أمريكا .. وكلنا فدا تمثال الحرية وديزني لاند والعم بطوط والعم ويكا) ، ولن يخرج مغني راب كايمنيم بأغنية كلها دموع عن حبه العميق لأمريكا وذكرياته مع الجيرلفرند المحجبه وهو حاطط ايده على كتفها قدام كورنيش نهر المسيسيبي وكيف عاني من رخامة بائع الحمص والترمس والورد واشتري مني الفل والورد و يارب يا إيمنيم تماري هير - (تتجوها يعني) .. لن تجد ذلك مطلقاً ..

قال لي صديقي أنه عندما تسير في نيويورك في الساعة العاشرة صباحاً ستظن أنك وحدك ، وذلك لأن كل الأشخاص يكونون في عملهم والسيارات في الباركنج والأطفال في المدارس ، ولذلك لن تجد أحداً ..

أما في مصر ففي أي وقت ستجد كل الناس في الشارع لدرجة أنك قد تتعجب عمن يجلس في بيته ، فالساعة العاشرة في مصر كالساعة الواحدة بعد الظهر كالساعة السادسة بعد المغرب كالعاشرة ليلاً كالثانية بعد منتصف الليل .. كله في الشارع وكله عرييات وزينة لدرجة أنك تتعجب من هذا الزحام الذي يؤكد لك شيئاً لا ثالث لهما .. إما أن الشعب بأكمله يعمل في توصيل الطلبات للمنازل أو أن كل البلد عاطلة ولا تجد ما تفعله ..

قال لي صديقي أن البنت الأمريكية حسناء وخفيفة الظل ومتواضعة ومن الممكن أن تتحدث معها دون أن تشعر أنها (بتنتك عليك) ومن الممكن أن تستوقف أي فتاة تعجبك في الشارع لتلتقط معها صورة تضعها على فيسبوك وتباهي بها أمام أصدقائك الخناشير الناشئين ولا مانع من سرد حكايات وهمية حول علاقتك بهذه الفتاة وكيف أنها وقعت في دباديقك أول ما شمت ريحتك .. أما في مصر فيمكنك أن تتحدث مع أي فتاة طالما لم تتجاوز سن الثالثة عشر ولكن بمجرد تعدي هذه الفتاة هذا السن - حيث تكتشف فجأة أنها أنثى - فلا يمكنك أن تتحدث معها ويا ويلك يا سواد ليلك لو كانت عينيها زرقا ولا شعرها أصفر ، يبقى أنت كده زينة على خراب عشك ..

والشباب الأمريكي في نفس الوقت لطيف ويتميز بالحضور وخفة الدم و هو بعكس ما كنا نتصور عنه، ففي مصر من يمتلك شعراً أصفراً و بشرة بيضاء هو فرفوراً كبيراً ولازم يتزط ويتزفلط زفلوطاً معقولاً عشان يسترجل ويصبح راجلاً عظيماً ..

ولكن هذا مفهوم خاطيء ..

فالشباب الأمريكي الأشقر - كما يقول الصديق - صحه ومرونة ورجوله ولو ضربك قلم على وشك هيسورك ولذلك لا داعي لهذا المفهوم ولا داعي لأن نتباهي بشباب مصر حيث الفتونه وسمرة النيل فمعظم الشباب في مصر مضعضع وتعبان ومعندوش صحه وهذا السمار لا علاقة له بالنيل من قريب أو بعيد وإنما بالساخه وقلة الحموم ..

في النهاية قال لي صديقي أن أمريكا هي أم الدنيا الحقيقية ومش أم الدنيا بس .. لا .. دي أمها وأبوها وخالتها وعمتها وصاحبته وماشيه معاها في الحرام .. أمريكا هي العالم .. ولو مش عاجبك اخبط دماغك في الحيط ..

قال لي صديقي هذا الكلام ونحن نجلس إلى جهاز الكمبيوتر لأشاهد صورته في أمريكا ونتحدث عما
شاهده هناك ..

وكنا أيضاً نحاول جاهدين إنشاء جروب عالفيس بوك ندعو فيه كل مصري أصيل غيور على بلده للبحث
معنا عن أبو المصريين ..

اطلقنا على الجروب اسم :

" تحدياني أمريكي أن أجمع 80 مليون مصري عايزين يعرفوا أبوهم الحقيقي مين؟؟!"

أنواع الاستاتس على الفيس بوك

تعتبر الستاتس من اهم مميزات الفيس بوك .. ولأن الواحد بقاله حوالي 3 سنين عاليفيس فبيقرا ستاتسات كثير جدا من ناس كثير جدا .. وبحكم خبرتي الضئيله قدرت القسم الستاتس اللي بيكتبها البعض إلى عدة أنواع :

ستاتس من نوع : (هسيكوا على ناركو) ..

ودي ستاتس تحس ان صاحبها عايز ياكل قلم على قفاه عشان يتعدل .. فعلاً .. الستاتس دي ميزتها انها لغز .. متفهمش صاحبها عايز يقول ايه ولا قصده ايه .. يعني مثلا .. كام واحد فينا لقي ستاتس لواحد من الفريندز كاتب:

"يجد حاجه تترفز .. بس انا اخدت قراري" ..

طب ايه اللي نرفزك وايه القرار؟؟ .. متعرفش .. وتلاقي على الستاتس اللي زي دي سبعين كومنت من الفريندز .. ثلاثين كومنت منهم علامات استفهام .. وتلاتين علامات تعجب .. والباقي بيحاول بقدر الامكان يستفز الواد يمكن يقول حاجه .. وممكن تلاقي في الوسط كومنت من فريند لطيف شكله عارف الموضوع بيقول : "مش مشكله .. شوف غيرها يا فوزي ولما تلاقيها كلمني وانا هزبط الباقي" .. طب يشوف ايه ويزبط ايه ؟؟؟ .. متفهمونا ياجدعان!! .. ولكن في الاخر تلاقي صاحب الستاتس كاتب بعد 100 كومنت اتبعته "برضه مقدرش اقول حاجه غير حسبي الله ونعم الوكيل" .. وتكرر حدوده الكومنتات ثاني .. انت بتقول حسبي الله على ايه ؟؟؟ فيه ايه؟؟ .. و في الاخر خاالص بتلاقي ان صاحبنا كاتب " يا جماعه متخدوش في بالكو .. ده موضوع شخصي" .. طب طالما هو شخصي فالقنا ليه ع الفيس بوك .. حاجه تترفز ..

تحليل شخصية صاحب هذا النوع من الاستاتس :

حمار

ستاتس من نوع (انا في الحمام دلوقتي) ..

زي ما فيه ناس كانت بتعتقد ان الارض مركز الكون .. فيه برضه صنف من الفريندز بيعتقد ان هو نفسه مركز الفيس بوك ومنه بيتفرع كل الفريندز حول العالم .. ستاتس (انا في الحمام دلوقتي) صاحبها بيتوهم ويتخيل ان الناس بتصحى الصبح .. بتغسل وشها .. تضرب النسكافيه .. ثم تبدأ رحلتها في الدخول على بروفايله الشخصي .. هو بيتهيأله كده .. ويتخيل ان الناس دي بتشوفه يا ترى عامل ايه؟؟ و احواله ايه؟؟ وكتب ايه؟؟ .. واكل ايه؟؟ وشرب ايه؟؟ وعمل ادد لمين؟؟ .. وعمل كومنت على مين؟؟ .. ولذلك بتلاقي صاحبنا ده بيتحف الناس بكل ما هو جديد في حياته .. هتلاقي دائما الستاتس بتاعته بتتجدد سبعتاشر مرة في اليوم وهتلاقيها زي :

- "النهاردة كان يوم جميل .. انا اتبسدت قوي مع أصحابي .. احب اشكر سُها وُثُما وُثُما عالوقت اللطيف ده "
- " بجد زهقان اخر حاجه "
- "ابويا طلق امي وقتل حمايا"
- "ادعولي عشان امتحاناتي قريت"
- "انا شلت مادة .. حسبي الله ونعم الوكيل"
- "تواليت الحمام لسه متصلحش .. بس اكيد فيه حل للزنقة دي"

ازاي تميز صاحب هذا النوع من الاستاتس :

صاحب الاستاتس دي هتلاقيه :

1- لاجيء ع الفيس بوك .. صبح وليل وظهر وعصر ومبيقومش خالص .. كل ما تحش تلاقيه عالشات .. وفي الوقت اللي انت مش قادر فيه تلاحق على تلاته او اربعه في الشات هتلاقيه هو بيكلم سبعين واحد اون لايين في نفس اللحظة وبنفس الكفاءة ..

2- عنده 200 البوم مليونين صور .. صور في كل حته ويغطوا انشطته اليوميه .. البوم صور مع العائله والبوم مع الفريندز .. والبوم مع الفريندز الغاليين قوي .. والبوم الرحلات والبوم الكوول .. والبوم الخروجات الميه ميه .. والبوم احلى صحاب .. والبوم رحلة شرم الشيخ .. والبوم رحلة العين السخنه .. ده غير اربعتلاف صورة بروفايل بكتشر كلها شبه بعضها وبنفس الوضعيه بيبدلها سبع مرات في البروفايل كل يوم .. وهتلاقي صور البروفايل بتاعته غالبا هي شرح للستاتس يعني هتلاقي صورة في الجامعه .. صورة تانيه وهو بياكل في الجامعه صورة وهو جوه

البيت ..صورة وهو نائم في البيت .. صورة وهو يتلطف في البانيو .. صورة وهو لافف الباشكير
..صورة وهو قاعد ع التواليت .. وهكذا ..

3- هتلاقيه مشترك في كل الجروبات اللي طلعت تحت اسم : "اعرف مين بيشفوف بروفائلك؟".

4- هتلاقي دايماً عنده البوم اسمه : just me

ستاتس (الكآآبه) ..

كل واحد فينا هتلاقي تلاته او اربعة من الفريندز عنده قمه في الاكتئاب الأزلي .. ميكتبوش
حاجه غير القرف والنكد والاحباط ..وتلاقي دايماً الستاتس بتاعتهم زي :

" زهقت من كل حاجه .. الحياة بقت مقرفه "

" انا محبط .. زعلان .. مضايق "

" مفيش حاجه نافعه .. هولع في روحي "

صاحب هذا النوع من الاستاتس بيتعامل مع الفيس بوك على انه قعدة كابيينه .. يخش يرجع
النكد اللي جواه ويطلع يمارس حياته الطبيعيه .. ومش فاهم ليه ..

ازاي تميز صاحب هذا النوع من الاستاتس :

- علطول هتلاقيه حاطط صورة بروفائيل دمويه و كئيبة موت ..زي صورة اتنين وقت الغروب بيحضنوا
بعض الحظن الاخير والدم مطرطش من جناهم ومغرق الدنيا وهمه مكملين حظن عادي (ازاي؟
مش قادر اعرف) ..ممكن تلاقيه حاطط صورة شاب امور معندوش اي مشاكل في الحياه غير ان
فيه خنجر راشق في صدره وفيه دم نازل ع الارض على شكل قلب كبير (برضه مش فاهم ازاي)
...ممكن تلاقيه حاطط صورة واحد وواحد لابسين اشيك حاجه في الدنيا وحاضنين بعض و
جنبهم عصير فرجلو واكل ديلفري ومستنين قطر من بعبييد جي يموتهم سوا

ستاتس (اذا احببت شيئاً بشدة فاتركه .. فان عاد اليك فهو بالتأكيد سيكون بنظولتك) ..

(اذا احببت شيئاً بشدة فاتركه .. فان عاد اليك فهو ملكك للابد)..

فيه اشاعه بتقول انك لو مكتبتش الستاتس دي مرة او مرتين في حياتك ع الفيس بوك ممكن تفقد الاكونت
بتاعك للابد وعمره ما هيرجعلك تاني

بس فعلاً مش عارف ايه سر حب الناس الشديد ليها؟؟؟؟ .. كتير قوي بيكتبوها!!! .. هتلاقي تسعين في
الميه من الفريندز عندك جه عليهم وقت كانوا كاتبين الاستاتس دي .. و مش عارف ليه دي بالذات دوناً

عن حكم وامثال الدنيا كلها؟ .. واياه اللي الناس عماله تفقده ومبيرجعش ولو رجع هتملكه للابد؟؟ .. ايه سر حب الناس الغريب للستاتس دي؟؟ .. بتتكتب كتير .. وليها سبتاشر جروب .. وسبعمية بايج .. ومية اكونت .. طب ليه ..

تحليل شخصية صاحب هذا النوع من الاستاتس :
والله فعلاً مش عارف ..

النوع الأخير .. ستاتس (هعقدك في عيشتك يا حيوان) ..

هتلاقي عندك غالباً فريند محترف انه يكتب ستاتس بالانجليزي ومكلعه التنين متفهمش منها حرف .. المشكله ان بيبقى فيها كلام مجعلص والمشكله الاكبر انك بتقدر تترجم كل كلمه لوحدها لكن لما تربط الكلام مع بعضه تلاقيه مش راكب .. بس اللي يطمنك ان فيه ناس قليله عاملين عليها لايك .. عارف لو كتير عاملين لايك يبقى انت لازم تراجع نفسك .. خد كورس كونفرسايشن في الجامعه الامريكية .. او خد تويفل عشان تتمحن وتفهم الاستاتس اللي زي دي .. فيه حل تاني .. اعمل لايك وانت ساكت ولا من شاف ولا من دري وعنك ما فهمت .. او اعمل لصاحبك بلوك عشان ميفكر كرش بخيبتك القوية وكله في سبيل انك تخلص من الالم النفسي اللي بتعانيه لما تلاقي هذا النوع المكلع من الاستاتس ..

كيف تميز صاحب هذا النوع من الاستاتس ..

هتلاقيه غالباً مدارس لغات .. وانت يا حبة عيني .. تعليم مجاني ..

بس خلاص .. مفيش تاني ..

كريم كراميل

قصة ساخره من فائلة الوطن

(1)

عادت زوجتي العزيزة من العمل في أحد الايام وما أن دخلت من باب المنزل حتى راحت تسب وتلعن العيشة واللي عايشينها و تعدد كم القرف اللي هي شافته في أثناء عودتها المحمودة إلى المنزل وعن الحر والزحمة والعرق والميكروباصات والاتوبيسات ومدارس الثانوي والاعدادي وإلى آخره .. ولأني كنت اسمع هذه الاسطوانه كل يوم ولأني كنت معتاداً على هذا الكلام منها ومن الجرائد ومن محطات التلفزيون فلم أتأثر بما تقوله مطلقاً ، ولم يفقدني كلامها استمتاعي بالكريم كراميل و بفيلم هندي قديم يسمى (انتقام الاكثع) والذي كنت اشاهده كثيراً لاستمتع بلحظات الحنين عندما يكتشف الاكثع في نهاية الفيلم ان والده ووالدته هما شخص واحد هو اخته فينتحر من الصدمة بينما تفقع الاخت عينها وتنتقم لمن سرب هذه المعلومه في الجزء الثاني من الفيلم ..

- نفسي البلد دي تتعدل بقى .. الواحد زهق ..

قالتها زوجتي بغضب فرفعت يدي بلامبالاة وانا اتابع الفيلم :

- آآمين ..

- وكفاية بقى اللي الواحد بيشفه كل يوم ..

- آآمين ..

- هو الظاهر ان البلد دي عمرها ما هتتضف لوحدها .. لازم حد ابن حلال بيحي ينضفنا ..

- آمي ...

ولكني لم أكمل الجملة .. وتوقفت ملعقة الكريم كراميل وهي في طريقها إلى فمي وقلت وانا انظر اليها مندهشاً :

- بيحي ينضفنا؟!!! .. تصدقي انك اوحيتي ليا بفكرة جامدة جداً ..

وهنا التمعت عيناى و اغلقت التلفزيون ووضعت علبة الكريم كراميل على جنب وقلت :

- الفكرة فعلا جامده .. لازم حد ييجي يخلصنا من اللي احنا فيه طالما احنا مش عارفين نخلص
نفسينا ..

اخذت هي علبة الكريم كراميل وقذفت نصفها في بؤها وقالت بصوت متحشرج من الاكل :

- نأها نأها .. بهي بهي .. بهي بو

لم افهم ما تقول فبلعت ما تبقى في فمها :

- بقولك فكررررررررة إيسيسيسيسيسيه اللي جاتلك ؟؟؟؟

قلت :

- سيبيني الممخخ فيها .. وادرس واهندس .. ولما تخلص وتستوي هروح الوزارة واحاول اقابل مسئول

كبير واعرض عليه الفكرة .. وربنا يستر .. انا هنزل بقى اجيب حبة ورق فيلوسكاب واقلام وكده..

- انت هتتعد تكتب الفكرة دلوقتي؟؟

- لا طبعاً ، الافكار دي متتحطش عالورق ، انتي عايزاني اروح في داهيه ؟.. الحاجات دي بتبقى

من البؤ للبؤ ..

- آه .. من البؤ للبؤ يا قلبي لا تحزن .. امال نازل تجيب ورق ليه ان شاء الله ؟ ..

قلت والدموع تغرق عيني وموسيقى اعدام ميت في الخلفيه :

- عشان هكتب وصيتي وهديهالك .. اصل الكلام اللي هقوله و المكان اللي هروحه ده ممكن

مرجعش منه ...

امسكت بي زوجتي بخوف فتابعت أنا بصوت مؤثر :

- لو مرجعتش سلمى الوصية للمحامي وخذوا الاجراءات اللازمه .. ومتقلقيش انتي مستقبلك متأمن

.. انا سايلك شقة بمنافعها ، و فيه كريم كراميل في التلاجه ، و حبة (فكّة) للمواصلات ، وافلام

(دي في دي) اكشن ورعب وكوميدي تسليكي في وحدتك ..

قلت والدموع في عينيها :

- انت بتتكلم بجد ؟

- مش مصدقاني ليه ؟

- أصلك عمرك ما جبتي افلام كوميدي ؟

- هتلاقيها عندك في درج المكتبة ..

- تركت زوجتي و فتحت باب الشقه وقلت ..

- انا نازل بقى .. لا إله إلا الله ..

خرجت دون ان اسمع منها (محمد رسول الله) لأنها كانت مشغولة جداً في البحث عن الافلام الكوميدي..

(2)

دخلت من باب الوزارة ومعني ملف ضخمة .. قابلني شاب شيك فقلت بابتسامه عريضه :

- عايزه اقبال مسؤل كبير ..

- خير؟

- خير ان شاء الله .. عندي مقترح مهم هيفيد البلد ..

- انتظر خمس دقائق .. هنقابلك باستاذ (أ . ع) ..

- (أ.ع)؟؟ .. مفيش حروف تانيه؟؟

- نعم؟؟

- القصد .. (أ.ع) ده مسؤل؟؟؟

- اه مسؤل ..

- كبير؟

- مش شغلك .. قوله اللي انت عايزه واتفضل من هنا ..

- حاضر .. حاضر ..

ثواني ودخل رجل تبدو على هيئته الهيبه لدرجة كادت تصيبي بتبول لارادي .. قعد وقال لي :

- اهلا .. طلباتك .. و بسرعه ..

- والله يا افندم عندي مقترح كده كنت عايزه أقدمه لمصر ..

قال بدهشة وكأنه اول مره يسمع الاسم :

- لمصر؟؟

- اه والله لمصر .. لو مش موجوده ممكن اجي في وقت ثاني عادي ..

- طالما لمصر احنا هنسمعك للصبح ..

وهنا اخرجت عدة اوراق وناولتها للمسؤل وقلت بهدوء ..

- والله يا افندم حضرتك زي مانت شايف البلد كان وضعها زي الزفت وكل يوم في النازل والحال كان

طين والناس كانت عدمانه والفقر والبطالة والفساد والرشاوي كانوا منتشرين خاصة ما بين المسؤلين

الكبار امثال حضرتك .. كل ده انتشر ..

نظر لي نظرة رهيبة اخرى كادت تصيبي بالسكته القلبيه وهو يجز على اسنانه ويقول:

- وبعدين؟؟
- وكنت متوقع أن القوى السياسية يعني تتجمع مع بعضها شاكب راكب كده وتنمي البلد وتفوقها شويه من الغيوبة دي لكن لاحظت أنه لا حد عايز يشتغل ولا يبي .. فبعد ثورتنا العظيمة دي أنا بقتراح اقتراح عظيم جدا حطيته في الملف ده ..
- ايه هو .. قول وخلصنا .. عندي جلسة مساج ..
- بقتراح حضرتك أن مصر تعمل مناقصة بنظام المظاريف المغلقة لكل دول العالم ..
- والمناقصة دي عن ايه ان شاء الله ؟ ..
- الاحتلال ..
- نعم؟؟
- ايوه يا افندم .. حضرتك مش واخذ بالك .. دي دعوة هتبقى لكل دول العالم ..الدولة اللي تقدر تنصفنا تيجي تشرفنا وتحتلنا لفترة زمنية معينة .. احتلال سلمي يعني .. عشان تنصفنا من البلاوي اللي انا قلتها ل حضرتك دي ..
- وبعدين يا خفيف؟؟
- ولا قبلين .. احنا هنحط في المناقصة دي اوضاعنا كلها ونقول اننا بنعاني من فساد ورشاوي وزبالة في الشوارع وسوء تخطيط في كل شيء وان الشباب تعبانه من القعهده ع القهاوي وتعبانه من البطالة وتعبانه من افلام غادة عبد الرازق .. والبلد اللي عندها استعداد انها تخلصنا من الحاجات دي تتقدم بالعرض بتاعها .. والبلد اللي هيرسى عليها الاختيار هتيجي تحتلنا زي ما هي بالفانلة اللي عليها .. وهيبقى احتلال بعقد مدته خمس سنوات مدفوعة الضرائب ..وكله مكتوب عندك يا باشا ..

نظر لي المسئول وقال:

- انت شايف ان اللي انت بتقوله ده منطقي؟؟
- قلت بنفس الحماس كما في فيلم (ليلة سقوط بغداد):
- والله هيشظفوووووووووووووووووننا ..

نظر المسئول في الورق فتابعت أنا في شجاعه :

- وعشان الشعب المصري ميتخنقش .. الاحتلال هيقى بمواعيد .. من تسعه لسته الصبح بفكر فيك .. خمس ايام في الاسبوع والجمعه والسبت اجازة يا باشا .. وبالليل بقى ممكن البلد اللي هتحتلنا دي تتفسح وتحش كافيها .. تضرب فحفخينا فرغلي .. تروح تعاكس دول تانيه في شارع جامعة الدول .. تري شعر صدرها .. وممكن تشتغل بارت تايم في اي مكان عشان تزود دخلها برضه .. وهكذا ..

- طب والعالم يقول علينا ايه؟؟ وهيتنا؟؟ ومكانتنا؟؟
- يا باشا بلا هيبه بلا كلام فارغ بقى انت بتصدق يا راجل..
- نعم يا روح امك ..

قالها المسئول فوجدتني اتبول لا اراديا بالفعل ... قلت مرتبكاً:

- حضرتك الموضوع ده محلول .. احنا ممكن نعمل مقاومة شعبية من الشباب السيس اللي فلوسهم رايحه على شعر صدرهم وبوكسراتهم .. مقاومة كده وكده يعني عشان نبان قدام العالم ان احنا رجالة ومناضلين و لكن بينا وبين بعضينا احنا واخدين بعض بالحضن وبنفطر وبتغدى ونتعشى وننام مع بعض في نفس الكلوت ..

هرش المسئول ذقنه طويلاً وقال وهو ينظر في الورق ويسأل :

- يعني انت عايز بلد كامله تيجي عندنا عشان تقضي ع البطاله؟؟ ..
- ايوه ..

- والمحسوبيه والرشاوي وسوء التخطيط؟؟ ..
- ايوه ..

- وتعالج الشباب من التعب اللي بتسببه البطالة والفراغ والروتين؟؟ ..
- واللي بتسببه غادة عبد الرازق كمان يا باشا .. متنساش دي اهم حاجه ..

هرش المسئول ذقنه طويلاً .. نظر في الورق وقال :

- الموضوع ده لو اتعمل؟؟ .. ممكن الواحد يطلع منه بمصلحه ازاي؟؟
- (قلت في سرى) : اه يا وسخ .. مصلحه؟؟ .. ده احنا لسه بنقول عايزين نتشطف ..
قلت له بصوت مرتبك:

- يا افندم اللي حضرتك تؤمر بيه .. احنا مصلحتنا كلها مصر ..

وضع المسئول الورق في الظرف وغادر وقال:

- هندرس الموضوع ده مع المسئول المختص (ي . ع) والوزير (ف . ك . ك) وهنرد عليك ..
قلت في بالي .. يا لهوي ع الرموز اللي متبشرش بالخير .. يعني الاستاذ (أع) هيجتمع مع (يع) عشان
يروحو ل (فكك) .. شكل الموضوع في الاخر هيروح ل (ن . ف . ض) !!!

(3)

بعد عدة ايام وجدت هاتف المنزل يرن .. جاءت زوجتي لتخبرني ان هناك شخص يدعى (أع) على
التليفون ..

جرئت بسرعه واخذت السماعه : أهلا أهلا أهلا يا استاذ (أع) .. فيه جديد؟ .. طيب الحمد لله ..
هكون بكرة في مكتب حضرتك ..

وضعت السماعه وسجدت شاكرأ .. وعندما قمت سألتني زوجتي .. قلت وانا لا تسعني الفرحة :
- الحمد لله .. الحمد لله .. بكرة هكون مع الاستاذ (أع) والاستاذ (يع) .. تقريبا عجبهم اقترحي
.. احنا منتظرين بس رد (فكك) ..

نظرت لي زوجتي طويلاً باستغراب .. لم أهتم .. نزلت لاشترى اوراقاً أخرى بينما تركتها وهي تسجد
وتدعو لي بالشفاء مما أصابني ..

(4)

قال لي الأستاذ (أع) :

- الاقتراح جميل .. وموافقين عليه .. احنا هنعط سوا المواصفات الفنيه عشان نقدمها للأستاذ

(ح . ض . ن) والأستاذ (ب . و . س) ..

ابتسمت وقلت :

- أنا تحت امر حضرتك ..

- قولي بقى سريعاً بتقترح إيه بالظبط عشان نظبط المناقصة ..

فردت قلوعة واحسست بالشجاعه والحماس في عروقي وقلت كأني رئيس جمهورية ..

- بص يا أستاذ (أع) .. أول بند لتقدم أي بلد هو التعليم .. احنا عندنا تخلف في المراحل التعليمية
كلها من أولى ابتدائي لحد آخر سنه في الجامعه .. مرحلة الحضانه الحمد لله زي الفل ومحدث بيشتكي

منها .. عشان كده عايزين نجيب هيئة تعليمية كاملة .. من أصغر فراش لحد أكبر راس .. مدرسين ومديرين ومعلمين وكله .. وانا بقتح نستوردها من المانيا .. بلد متقدمه وكويسه ومحترمه وفي حالها... وانا سافرت هناك فترة الدراسه وبيني وبين (ميركل) عشم كبير والست دي بنت بلد و مش هتكسفي ..

- طب دول المدرسين .. بالنسبة للطلبة .. نجيبهم منين؟؟

- يا باشا .. مهو المدرسين دول هيعلموا الطلبة بتوعنا .. الطلبة هيفضلوا مصريين (قلت في سري : ده انت حمار قوي) .. بس لو الطلبة بتوعنا فضلوا اغبيا زي ما همه هنجيب طلبه من بره برضه .. هنعمل ايه يعني؟؟

- غيره ..

- بالنسبة للرياضه .. انا شايف المنتخب ماشي تمام .. بس الزمالك فيه ازمه وطالب تبرعات.. انا بقتح نستورد فريق اوروبي بدل الزمالك ويخش الدوري بتاعنا لحد ما الزمالك ربنا ياخذ بايده .. وانا بقتح اسبانيا عشان دي اللي فازت بكاس العالم .. وتلعب اسبانيا في الدوري بفانلة الزمالك .. يعني الواد الحارس اللي اسمه كاسياس بتاع اسبانيا نلبسه فانلة الزمالك و يبقى اسمه (عبد المنصف كاسياس عبد المنصف) مفيهاش حاجه .. وبرضه فيه (سرجيو حمزة) .. و(حازم جونزاليس) .. العيال الاسبان حريفة واكيد هياخدوا الدوري السنه دي ان شاء الله .. ويمكن لو عجبنا الوضع نشيل كل الفرق المصريه ونجيب دوري اوروبا كله في مصر بالجماهير بتاعته .. وهيبقى فيه الأهلي الهولندي .. والاسماعيلي يونائتد .. والمصري اليوناني .. أسمنت إيطاليا .. تليفونات البرتغال .. بتزول بلجيكا .. الجيش الروسي .. وهكذا ..

- تمام .. البند اللي بعده ..

- الديمقراطية .. دي بقى يا باشا مشكلتها كبيرة قوي .. احنا نسيينا من اللي احنا فيه ده ونستورد برلمان بالكرتونه بتاعته من بره ..

- برلمان كامل؟

- ايوه يا باشا .. وهنجيب اتنين .. برلمان بالمعارضة بتاعته والثاني من غير المعارضه ونبدل فيهم على مزاجنا..

- اللي بعده؟؟..

- وبالنسبة لبند النضافه والصرف الصحي .. هنشوف بلد يكون اهلها معندهمش خبره عشر سنوات في رمي الزباله في الشارع او التبول في الطرقات .. بلد ريحتها حلوة ..

- اه .. المناقصة تبقى في سرية تامه وتحت اشراف رقابة دولية عشان التزوير .. مهو مش بعد ما نقول عايزين الدول المحترمة تيجي تنصفنا نتفاجيء ان بوروندي جايه معاها بوتسوانا و جاية تشطفنا ..
- خلاص .. وصلت اقتراحاتك .. هنعرضها على الهيئات المختصة وفي ظرف شهر كل شيء هيكون مدروس وخالص ..

(5)

هرولت زوجتي بسرعه وهي تزلط الكريم كراميل و تعطيني الجرنان وتقول بفرحه :
- الحق .. شوف كاتبين ايه في الجرنان .. فكرتك نجحت ..
نظرت إلى الجريدة بلهفة وقرأت وأنا في قمة الانبساط :

" مصر تتعاقد مع ألمانيا لتطوير منظومة التعليم من الابتدائي وحتى الجامعي "

" أمريكا ترسل خبراء لمصر لتدريب رجال اعمال مصريين على اساس البنزنس والتسويق والسياسات المالية "

" اتحاد كرة القدم الأسباني يرسل مدربين ولاعبين كرة لإخراج الزمالك من أزمته الكروية والمالية "

" مصر تستورد من النرويج عقول بشرية لحل أزمة القمامة والصرف الصحي "

" علامات تساؤل حول وجود نصف مليون فتاة صومالية في شوارع العاصمة لبيع المناديل؟؟ "

" جهاز السينما يلغي تماما أي أفلام فيها مشاهد ساخنه ويقول للممثلات المحترفات لمثل هذه المشاهد :
أأقعدها في بيوتكوا وكلوا (كريم كراميل) احسن "

" مجلس الشعب يناقش قانون معاقبة الشاب اللي هيسقط بنطلونه .. اما غرامة مالية او سحب البوكسر منه "

قلت في نفسي يا سلام!!!!!!ام .. اهو ده الكلام ... كام سنه والبلد دي هتبقى فلّه شمعه منورة ..

وأحضرت الجرايد القومية الاسبانية والامريكية والنرويجية والصومالية عشان افهم .. واكتشفت من الاخبار التي قريتها مفاجئة هامة .. وان هذه الدول لم تحتل ما يحدث في فانلة الوطن .. ولقوا انهم هيقعدوا كتيبيير عشان التطويبيير .. والدول دي مش معقوله تقعد عندنا الفترة دي كلها .. مهم برضه أكيد سايبين عيالهم ووراهم غسيل وطبيخ ومسئوليات ..

وبعد ان حصلت على الجرائد وذات صباح قريت التالي في هذه الجرائد :

صحيفة أسبانية رياضية :

المنتخب الاسباني يناشد جماهيره بالتبرع لإخراجه من أزمته .. التبرع على حساب (...). بينك العاصمة مدريد

صحيفة أمريكية سياسية :

الحزب الجمهوري يفوز بكل مقاعد الكونجرس ولا وجود للأحزاب الاخرى ..

صحيفة صومالية :

الممثلة الناشئة (دومارا) تصرح : أنا خليفة (غادة عبد الرازق) بالصومال ..

مجلة نرويجية علمية :

العلماء يحاولون ابتكار مادة كيماوية خاصة للتخلص من الروائح الكريهة نتيجة تبول المواطنين النرويجيون في الشوارع

صحيفة أمريكية :

امريكا تتسبب بأزمة مالية عالمية ومعدلات البطالة في ازدياد ..

صحيفة كاميرونية :

الكاميرون تفوز بعقد مدته عشرون عاماً لتطوير كل نواحي الحياة في مصر ..

صحيفة مصرية :

شبهة الفساد واحتمالات التزوير في فوز الكاميرون بعقد لتطوير مصر ..

صحيفة مصرية تهتم بأخبار السينما:

الممثلة (ط . ظ) تتصالح مع مؤخرتها بعد فترة ابتعاد .. وقد صرحت كل من الممثلة والمؤخره معاً في حوار صحفي ان همه ملهوش غير بعض

صحيفة مصرية معارضة:

اختفاء المسئول (يع) و (أع) و (فكك) و (حضن) و(بوس) في ظروف غامضة ..

صحيفة مصرية فنية :

انتحار غادة عبد الرازق ..

قرأت هذه الأخبار بحزن شديد وكانت دموعي تنزل من القهر .. وعلى رأي المثل .. جبتك يا عبد المعين عشان تنضفني لقيتك يا عبد المعين عايز تتشطف ...

شعرت باحتقان في بلعومي و انقباض في بنكرياسي .. فتحت التلفزيون لاشاهد فيلم (انتقام الاكثع) للمرة المائة ودموعي لا تفارق عيني .. وجدت زوجتي تدخل من باب المنزل وهي تلعن سلسفيل العيشة واللي عايشينها للمرة الألف .. ولكني لم أعرها انتباهي فقد تغير مزاجي للأفضل بعد ان فتحت باب الثلاجة ووجدت بعضاً من ..

الكريم كراميل ..

ملحدين على حق ربنا

على حس انتشار موضة الالحاد والعلمنة اليومين ، بحس نوعاً ما إنه (الإلحاد) في مصر حمادة وفي بلاد بره حمادة تاني خالص ، وبرغم إنه الاتنين حماده مصيرهم قطران لكن ده ميمنعش إنه آليه صناعة كل حماده فيهم مختلفة اختلاف من تعمقه وتشعبه وتجزده يكاد ينفصل ويكوّن حمادة تالت جديد..

بره مثلاً تسمع عن إنه الواحد يقعد شهور ، وربما سنين ، يبحث ويسأل ويدور ويقارن وف الآخر قد يهديه تفكيره إلى وجود إله من عدمه .. هنا في مصر الإلحاد تحسه بيحصل صدفه ، حدث عارض ، مفيهوش ريسيرش زي بره ، تلاقي الواد من دول بيقعد قرفان بالليل عالنت ففتسرسب ايديه من الزهق على كام منتدى من اياهم أو ربما يحكي مع واحد معضوض من ملحد قبل كده فيتسق الكلام اللي بيسمعه أو يبقراه مع تفككه الأسري أو انطواءه الإجتماعي او إحباطه العاطفي أو ضياعه الوجودي أو إنه نحلة سابته ومشيت مع انتميه اللي مبيركعهاش أصلاً فتكون محصلة هذا التآمر الكوني ضده هو صناعة ملحد من نوع (لو كان هناك إله ، ما كنت تعساً) ، على الأقل مكنتش نخله سابتني وعطّت مع انتميمي..

بره النبي آدم عموماً لما بيغير عقيدته ، دينه ، أو حتى بيلحد تماماً محدش بيعرف ، لأنه محدش مُلزم إنه يعرف ، هنا في مصر إن مكنش الملحد من دول يصحى الصبح يعمله بيدجين تلاته على غيار الريق مع كام جروب ويطلعه في خمستاشر سبتاشر برنامج حوارى يحكي ازاي ربنا هداه للإلحاد بعد ما صلا خمسين صلاة استخاره وأمه تتصل تصرخ و تقسم بميت أيمن إنه كان كويس مباح ومصلي العيبيشا من ساعتين زمن ميقاش ملحد على حق ربنا ..

بره المنظومة الأخلاقية للملحد لا تتغير بعد إلحاده ، بمعنى آخر لو شخص أخلاقه كويسه (قبل) إلحاده بتفضل برضه كويسه (بعد) إلحاده لأنه عموماً الأخلاق نابعه من الضمير الإنساني مش من إنه فيه حساب وعقاب أو جنه ونار ، لكن هنا في مصر بتلاقي حاجه عجيبة جداً ، تلاقي الواد أصلاً قمة في الأخلاق والالتزام والأدب وبعد الإلحاد مرة واحده بتلاقيه ابن سبعين تيت آخر حاجه وكأنه الإلحاد ده كارت بلانش لكل الأفعال الإبليسيه اللي كان محروم منها أيام ما كانوا بيضحكوا عليه ويقولوه ده فيه ربنا ، والأغرب هو رد فعل صحابه ، بتلاقيهم بيصلوه بنظرة حسد غريبه : الحق يا عم ده معندوش ربنا ، ده هيهيص وهيعمل

كل حاجه ، زمانه دلوقتي بيسكر ويصيع ويلعب قمار ويوس ستات .. ويمكن كمان رجاله .. يا بخته ..

بره الملحد لا يدعو لإلحاده لأنه ببساطه لا يملك قيم أو مبادئ يدعوك إليها ، الإلحاد هو هوا .. فراغ ..
معندوش حاجه يقولك عليها ، بعكس هنا في مصر ، بتلاقي حاجه لطيفه جداً اسمها (الدعوة للإلحاد) ..
وتحاول تعرف هو بيدعو لإيه متفهمش برضه ، فتكتشف إنه الموضوع هنا لا ياخذ شكل (الدعوة) بقدر ما
بياخذ شكل (التشكيك في العقيدة) ، هو بيشكك في دينك وخلاص ، بالظبط زي واحد قرر إنه يطفش
من البيت فبدل ما يحكيك عن روعة الطفشان والتشرد وحلاوة النوم عالرصيف ومتعة الأكل من الزبالة
يفضل يشكك في أهلك وقرابيك ويكرهك فيهم عشان تطفش معاه ..

حاجه أخيرة .. المصري عشريّ جداً ، وعاطفي جداً ، مرتبط بالأهل والأرض والأصحاب ، عشان كده لما
تلاقي الواحد من دول يقولك " أنا مش لوحدي الملحد ده احنا دلوقتي واصلين لنص مليون أو أكثر " فده
مش تفاخر منه بالأعداد بقدر ماوحدته نتيجة انسلاخه من عقيدة عاشت جواه طول عمره بتخليه
يصدمك بالأعداد على طريقة (مش أنا لوحدي اللي غلط مهو كله بيعمل كده) .. بيحس إنه ضياعه
بيدوب في اللمة ، لكن في الواقع مهما بتكثر اللمة بيفضل برضه وحيد ، لأنه كل واحد فيهم بالأصل وحيد
، بمعنى آخر همه كتير بس كل واحد لوحده .. ودي بقى مسألة فطرية ..

الحقيقة وراء .. إغلاق الفيس بوك ..

موقع (ويبكي وورلد) : إغلاق الفيس بوك "نهائياً" في 15 ديسمبر القادم .

عايز تففل الفيس بوك يا مارك يا روزيف ؟ ..

انت ماضي عقد يا حبيبي !! .. ده انا اسجننك !!

أذكر يوم انضمامي للفيس بوك أني بحثت عن إيميل مؤسس هذا الموقع لأرسل له رساله أشكره فيها على موقعه العبقري وأبدى امتناني الشديد له ولفريق عمله وكيف أن موقعه جعلني اتواصل مع من احبهم ومن افتقدتهم منذ زمنٍ بعيد ، و قد أخبرني الزملاء ان مؤسس الموقع هو الأمريكي مارك زوجبيرج ، له من الأعوام أربعة وعشرون ، وله من الأموال ما يقارب العشر مليارات .. سنّه الصغير شجعني أن أحييه ولكن ملياراته كادت توقفني عن ارسال الايميل ، فقد خشيت أن يقول هذا الـ (مارك) أني عايز مصلحه منه ويسأل عليا وكده .. وانا بصراحه سمعتي كانت ساعتها عندي بالدنيا - قبل أن تتدهور مؤخراً لسبب لا أعرفه ..

قلبت الفيس بوك على مارك زوجبيرج فلم أجده .. قلت يمكن الراجل معندوش فيسبوك .. لسه معملش أكونت !! .. ولكني أخيراً استطعت العثور على إيميله .. وبالفعل في فبراير من عام 2007 أرسلت رسالة شكر لمارك وأخبرته فيها أني أشعر بامتنان شديد له ولموقعه لأنني بسببه استطعت التوصل لزملائي من أيام الجامعة وأيام الثانوي وحتى الإعدادي ، واستطعت العثور على مدرس العربي الذي علمني كيف اكتب القصة والشعر والمقال واستطعت العثور على الواد اللي كان هاريني ضرب أيام الابتدائي فقامت بعمل اضافه له ثم شتمته شتيمه قبيحه جداً عالوول وبعدها عملت له بلوك وبقى يحبيني لو جدد .. واستطعت العثور على أول فتاة احببتها ايام الاعدادي ، ارسلت لها رساله اطمئن عليها وأذكرها بالأيام الجميله وارسلت لها صورة زواجي عشان لو لسه بتفكر فيا لحد دلوقتي تبطل تفكير وتشوف مستقبلها ، فردت عليّ بأنها تزوجت منذ زمنٍ بعيد وأنها لا تفكر فيّ مطلقاً حتى مع الزيادة الملحوظة في جاذبيتي ، و ارسلت لي صورة تجمعها بزوجه

فارسلت أنا لهذا الزوج رسالة أطلب منه إضافتي كصديق وأخبرته أنني كنت زميل زوجته أيام الاعدادي فلم يضيفني وإنما قام بتطبيق زوجته ..

و بسبب الفيس بوك اكتشفت أن لي عمماً يعيش في السعودية لم أره منذ عشرين عاماً ، وأن لي أختاً توأماً عنده عربية كبدة في الدويقة ، وخال على مشارف الموت في الهند ، واكتشفت أن ابنة خالتي أميرة في قطر ، وأن لي ابن عم يتاجر في السلاح في تونس ، وأن أمي ليست أمي ، وأن أوباما هو صديق شخصي لابن عمه جوز أختي ..

في الواقع .. الفيس بوك جعلني اتواصل مع كل من احببتهم عبر هذه السنوات .. ولهذا شكرت مارك..

ولم يخجل مارك بالرد .. فبعد دقيقة واحدة أرسل لي رساله تقول : " مارك زوجيبرج يشكرك على انضمامك للفيس بوك ومستعد للرد على أي استفسار و إجابتك في أية مساعدة " .. أحسست بالأهمية لأن هذا الامريكى اللطيف زوجيبرج ذي المليارات الكثيرة يرد علىّ أنا موظف الحكومة المصري الذي لا يملك غير جهازه البانتيام فور وفلاشته محدودة السرعة والتي لم يدفع فاتورتها بعد ..

ولم أكن وحدي الممتن لزوجيبرج .. فغيري كثيرون .. حتى أولئك الذين يدعون أنهم لا يقضون أمام الفيس بوك ساعات طويلة هم ممتنون أيضاً لمارك .. وهم كاذبون لأنهم يقضون أمامه الساعات الطويله ولكن بيعملوا نفسهم أوفلاين .. الأوغاد .. تبا لهم ..

وبعد هذه السنوات و في يوم ملوش ملامح .. متعرفلوش صبح من ليل .. فتحت البروفايل لأجد خبرين .. والاتنين أنيل من بعض .. الخبر الأول يقول أن مؤسس الفيس بوك مارك زوجيبرج قرر إغلاق الفيسبوك يوم 15 ديسمبر القادم لأن فريق العمل لا يستطيع مجابهة الضغوط الناشئة عن زيادة حجم الموقع .. أما الخبر الثاني فيؤكد اصابة العشرات بسكته قلبيه وفشل كلوي وتبول لا إرادي بسبب الخبر الأول ..

ويستفيض الموقع الذي نشر الخبر بقوله أن السبب الحقيقي وراء غلق الفيس بوك هو أن مارك نفسه - من كثرة الضغوط - لم يعد يمارس حياته بطريقة طبيعية ، بمعنى أنه مبقاش ياكل كويس ، وخاسس ، ووشه بقى زي اللقمه من كتر الشغل ، وكمان بيرجع بيته متأخر و شوارع نيويورك بالليل بتبقى قطران ومليانه لبش ومفيش ميكروباصات بتخش لحد جوه ، ده غير أن خناقاته مع الجيرلفرند بتاعته كترت قوي لأنه

ميشوفهاش زي الأول ، وكمان عشان بيسترخص الحتت اللي بيروحوها يمكن لأن الفيس بوك معادش بيكسب زي الأول ويمكن لأن مارك حبه للجيرلفرند قل بعد ما شاف عاليفيس بوك بنات من كل أنحاء الأرض و من كل صنف وكل لون ويمكن يعمل اضافه لأي واحده تعجبه ومش هيستنى تقبله لانه معاه كل الباسوردات بتاعت الكوكب كله ..

يحرقك يا مارك .. عملتها يا حقير.. تدينا جرعة الإدمان وتخلع بعد ما عملت المليارات يا واطي .. ده لولا الآدد اللي بنعمله والكومنت اللي بنكتبه مكنش هيقى ليك وجود ... طب بروفايلي ؟؟ .. وصوري؟؟ .. وكومنتاتي؟؟ .. والمستويات اللي وصلتها في الفارم فايل؟ .. كل ده يروح !!.. ده انا اسجنننك!!!! .. ده انا اروح فيك في داهية ..

ولهذا وفي يناير من نفس العام ارسلت إلى مارك زوجيرج رساله ثانية مفادها أنه لا يمكنه غلق الفيس بوك لأي سبب وأن هناك من أتواصل معهم وأن لي جروباً به مقالاتي الساخرة وأن جمهوراً عريضاً ينتظر جديدي كل يوم كما أن هناك حسناوات تائهات مهليات في طبق الفيس بوك ينتظرن أن أتعم عليهن بالإضافة وأنه اذا كان ولا بد من غلق الفيس بوك يا مارك فأرجوك أن تترك بروفايلي فقط وتلغي ما تريد يا إما لا مؤاخذه هتبقى (...). .. ثم شتمته نفس الشتيمة اللي شتمتها للواد اللي كان بيضربني في ابتدائي ..

جلست بعدها ورحت أراقب ردود الأفعال .. كان هناك صنفان من ردود الفعل تجاه الخبر .. ناس كانوا شمتانين اخر شماته وفرحانين لانهم اخيرا هيلاقوا فرصه يتخلصوا بها من الادمان .. وصنف اصيب بالسكنه القلبية و الفشل الكلوي والسكر والضغط كما ذكرنا ..

ولكن بعد ساعات اتضح شيء عجيب .. ان الخبر كله اشاعه سخيفة .. وأن مارك الظريف ذي المليارات لم يقل ذلك بل نفى وقال ان الفيس بوك مستمر للأبد .. واللي عايز يعمل آدد يعمل آدد .. واللي عايز يكومنت يكومنت ، وقد وعد مارك بمفاجآت أخرى في الفيس بوك هتخلي اللي معندوش فيس بوك ييقى عنده ، واللي عنده ييقى عنده تاني ، واللي عنده تاني يدمن أكثر ، واللي بيدمن أكثر يعمل خير ويخلي غيره برضه يدمن وكله بثوابه ، وفي الآخر الكل يروح عالصححة ويظل مؤسس الفيس بوك - بملياراته الكثير قوي - يتفسح ويتبختر ويتعرفت ويعمل شقلباظ مع الجيرلفرند الأمريكية الحسناء الشقراء..

وأدركت حجم سذاجتي عشان اصدق خبر زي ده ؟! .. ليه متأكدش في مواقع تانية تكون نشرت نفس الخبر ؟! .. يمكن عشان عقدة الخواجه ؟.. انه يعني الخبر منشور في موقع اجنبي باللغة الانجليزية وبخط شيك وفيه صورة الواد مارك والموقع نفسه اسمه وييكلي مش عارف ايه .. اصل كلمة (وييكلي) دي لوحدها مشكله .. يعني الناس دي مبتهزرش .. ده كل اسبوع هنجييلك مصيبة .. وكل مصيبة انقح من اختها ..

لن يتم اغلاق الفيسبوك .. حمداً لله .. هكذا اطمأنتت على تعليقاتي وعلى المستويات التي وصلت لها في الفارم فايل .. وهكذا هو حظ الجيرلفرند بتاعت مارك في زيادة مليارات صديقتها مع كل ثانيه يجلس إلى هذا المدعوق الأزرق ..

وبصراحه ندمت أني تسرعت بارسال رساله شتمت فيها (مارك) بالأب والأم والجيرلفرند وهددته بأفطع التهديدات إن لم يرجع عن قراره ..

وبينما أنا أفكر واصلتني رساله على الإيميل من مارك زوجبيرج .. خشيت أن أفتحها كي لا يخبرني أني مطرود من جنة الفيس بوك ويقتي خلي (هاي فايف) ينفعني .. وخشيت أن يقاضيني بتهمة السب والقذف الإلكتروني .. ولكنني استجمعت شجاعتي وفتحت رسالته ووجدت :

" مارك زوجبيرج يشكرك على انضمامك للفيس بوك ومستعد للرد على أي استفسار و إجابتك في أية مساعدة "

سعدت كثيراً بالرد الإلكتروني الجاهز وبدأت تصفح بروفايلي بضمير مستريح ..
طلعت مترني يا مارك ومرضتش ترد ..
أشكرك على ذوقك يا جمال يا مرو .. قصدي يا مارك يا زوجبيرج ..
وميرسي على استمرار الفيس بوك ..
وهاي نيو بير يا عيوني ..

- " يا ابني مفيش الكلام ده .. كله هينزل كمان ثلاث ساعات .. اسكت بقى خليني أركز في الأوبشنز "

- " خلاص يا عم هسكت .. دي الصورة بقالها ست شهور على الجهاز .. مجتش من ساعتين انتظار يعني "

وبعد خمس دقائق أخري بصيت حواليا واقتربت من فوزي وقلت :

- " بقولك إيه يا فوزي "

- " قول يا عيون فوزي "

- " هو الجهاز ده .. هه .. الجهاز ده "

- " ماله؟ "

- " مبيعملش داونلوود غير لاكل بس؟؟ "

- " اشمعني "

بصيت حواليا وقلت :

- " يعني ميعملش مثلا داونلوود لمزز ... لبكيني .. لسكسي جيرلز "

بص لي فوزي بنظرة رهيبة وقال :

- " لا يا خويا ... التكنولوجيا بتاعته للأكل بس .. ده بيحول الإشارات الكهربائية لمواد عضويه ..

يعني الديك ده النت بيترجمه لاشارات كهربا .. والجهاز بيفسر الكهربا على انها مواد عضوية و

"..."

نغزته في كتفه جامد وقلت بقرف :

- " يا خويا خلاص .. ده ايه البكابورت اللي فتح مرة واحده ده .. عضوية إيه و فوزيه إيه؟! ..

مكنتش كلمة "

خطفت بعنف فطيرتين كانوا في طريقهم للفعص جوه بؤه :

- " وبعدين بروح أهلك طالما فيه الجهاز ده !! .. إيه لزومه تخلص الفطير اللي في البيت .. متعمل

داونلوود للشبراوي وتوفر الطفح اللي عمال تطفحه ده .."

- " طب اصبر بقى عشان بغير الإعدادات بتاعت الجهاز "

- " غير يا خويا براحتك "

وهنا رن هاتفني الجوال .. المدام ..

- " أيوه .. أنا في البيت .. قاعد مع فوزي .. لا متتعيش نفسك في الغدا .. "

نظرت لفوزي بسعادة طاغية وقلت :

- " أصل انا عازمك النهاردة انتي والعيال .. آه .. على ديك رومي .. آه .. لا من غير فلوس خالص .. اما تيجي هشرحك .. يا ستي مصرفتش ولا مليم ده إيه الغم ده .. لأ الفلوس اللي انتي ساياها موجودة زي ما هي .. لما تيجي هقولك .. لما تيجي هقولك بقى "

قفلت الموبايل في غيظ :

- " ده إيه الدماغ دي .. مش عايزة تفهم خالص "

قلتها واقتربت من فوزي المنشغل .. بصيت حواليا وقلت بصوت منخفض جداً :

- " طب بقولك ايه يا ض يا فوزي يا شيطان انت .. "

- " ها تاني؟ "

- " الجهاز ده ؟؟ .. هه .. الجهاز ده ؟؟ "

- " ماله الجهاز ده ؟؟ "

- " زي ما بيعمل داونلوود كده .. مينفعش يعمل آبلووووووود ويرفع حاجه برضه ع النت "

- " عايز تبعت أكل لحد ولا إيه؟ "

- " لا يا عم أبعث إيه !! هو أنا لاقى أكل "

اقتربت منه وقلت بصوت منخفض قوي :

- " أصل أنا كنت بفكر أعمل آبلووود لمراتي "

- " لمراتك ؟؟؟ "

- " آه .. عايزها تروح مترجعش .. تتوه في النت "

- " لا حول ولا قوة إلا بالله .. ياريت لو أقدر يا صاحبي .. "

رجعت لورا .. سرحت بتفكيرى وقلت بحسرة :

- " بس أنا عارف أن أنا حتى لو عملتلها آبلووود .. الفاير وول اللي عند الناس عمره ما هيقلها .. "

واحتمال لو نزلت عند حد من الناحية الثانية تجيبه فايرس وتحرق له البوردة "

- " يا عم الشبكة عندك بطيئة كده ليه ؟؟ "

قلت والهلم على وشي :

- " تلاقي حد الناحية الثانية بيعمل داونلوود لحوت ولا حاجه ؟؟ "

بص فوزي في الساعة في توتر وقال :

- " بقولك إيه أنا لازم أمشي "

اتكهرت ومسكته من أرابيزه :

- " يخرب بيتك تمشي فين؟ .. والديك؟ .. والداونلووود؟ .. يرضيك الديك يبجي ما يلاقيك "
- " لازم الحق الطيارة .. مفيش هزار "
- " طب والجهاز؟؟؟ "
- " معلش يا صاحبي .. مضطر آخده معايا .. بس إن شاء الله هرجع المرة الجاية من أمريكا بكميات كبيرة .. ده كان مجرد عينة اختبار "
- " لا .. مرة جاية إيه الله يخرب بيتك .. مفيش جاية .. طب بص .. هشتريه منك "
- " يا ابني صعب .. بتقول إيه؟! .. "
- " يا أخي لا صعب ولا حاجه .. وبعدين العيال انا عشمتمهم بالديك .. وبعدين مهو فيه منه في أمريكا كتير .. قولي بس .. تمنه كام "
- فكر فوزي شويه وبص لي بندم وقال :
- " 300 دولار "
- " حلو .. يعني ما يعادل 300 جنيه "
- " انت بتهزر .. لا .. يعني 1800 جنيه "
- " زي بعضه يا فوزي يا نثن "
- مفكرتش كتير .. سبت فوزي و دخلت الاوضه .. جبت الفلوس ..
- " اتفضل يا باشا .. أنا مش هنسالك الجميل ده يا فوزي طول عمري .. ومش خسارة فيك الفلوس "
- حط فوزي الفلوس في جيبه وبصلي بعتاب وقال :
- " خلي بالك من الجهاز .. انا عملت كده عشان انت صاحبي بس "
- " أنت استاذ "
- " مقولنا تلميذ "
- بص في الساعة تاني وقال :
- " بص .. ساعة و تفتح الجهاز هتلاقي الديك .. ربح الجهاز شويه بعدها "
- " حاضر "
- " وبص انا حطيتلك اوبشن حلو .. اسمه اوبشن (اديني قظمة) .. لو فيه اكله مش عارف طعمها ايه ممكن تشغل الاوبشن ده وتداونلوود حته منها .. "

- " وبعدين؟؟ "
- " ولا قبلين .. حط بؤك قدام الجهاز وهتلاقي القطمة خرجت منه واتزفلطت في بؤك .. لو عجبك الطعم اعمل داونلووود للباقي "
- " حاضر "
- أخرج من جيبه ورقه واديهاني وقال :
- " آخر حاجه .. ده نمرة تليفون واحد كان جي من امريكا معايا .. أي حاجه تحصل في الجهاز اتصل بيه "
- " حاضر .. انا متشكر قوي يا فوزي .. بجد مش عارف أقولك إيه "
- وانصرف فوزي ..
- وذهبت للجهاز أنا في قمة السعادة والانبساط ..
- أعد الثواني والدقائق ..
- مستني حبيبي يخرج بالسلامة ..
- عدت ساعة .. لا حس ولا خبر ..
- مكنتش عارف الجهاز ده بيقول أنه خلص داونلوود ازاي .. لا فيه نور ولا لمبة ولا رساله ..
- عدت ساعه ونص .. مفيش حاجه .. ومفيش حتى ريحه ..
- ساعتين .. تلاته .. لا كتير .. العيال زامها جاية .. ومصيبة لو ملاقوش الديك ..
- وفتحت الصندوق في قوة ..
- مفيش حاجه !!
- اتوترت .. يكونش النت بطيء وأنا اللي استعجلت ..
- كلمت فوزي .. مغلق ..
- طلعت الورقة اللي ادهاني فوزي وضربت نمرة التليفون .. الحمد لله .. حد أخيراً رد .. قلت:
- " سلامو عليكو "
- " وعليكم السلام "
- " والله يا أفندم أنا كنت بعمل داونلووود لديك رومي من ع النت وكان الوقت المحدد ليه 3 ساعات .. ودلوقتي بقالي خمس ساعات لا حس ولا خبر "
- " آه وبعدين؟؟ "
- " ولا قبلين .. أعمل إيه .. استني شويه ولا إيه "

- " متعملش حاجه .. خش نام "
- " مش فاهم "
- " يعني مفيش ديك .. أنت الي طلعت ديك يا ديك "
- صُعقت ..
- كان هيغمى عليا ..
- " أنا مش فاهم حاجه قصدك إيه؟؟؟ "
- " قصدي أن أنت انضحك عليك .. وفوزي اداك الجهاز ووهمك انه بيعمل داون لوود لأي أكل انت عايزه "
- " أيوه .. واداني نمرك وقال ان انت بتاع الصيانة "
- " أنا لا بتاع صيانة ولا حاجه .. أنا اتنصب عليا زيك بالظبط .. الفرق الوحيد اني كنت بعمل داونلوود لسندوتش طعمية من غير طحينة .. مش ديك بحاله يا طماع "
- صُعقت وحسيت بأعصابي بتسيب مني .. قلت :
- " بس ده جريه قدامي .. وفعلا عمل داونلوود لبرجر .. أيوه وانا دقته "
- " أنت اللي قتلته انك عايز برجر؟ "
- " لا "
- " بالظبط .. هو اللي اقترح البرجر .. السندونش كان موجود في الجهاز من الأول وجابة قبل ما يجيلك .. وانت مش هترفض .. لأن البرجر حاجه معروفه وسهله ومتتفضش .. وآهو اسمه بيحرب الجهاز .. انما لو انت اللي كنت صممت على أكله بعينها كان هيتفضح ويتكشف قدامك "
- " يا ابن الكلب يا فوزي "
- " الله يعوض عليك "
- وقفل الراجل السكة وسابني في مصيبيتي .. شلت الجهاز وبصيت .. ازاي مخدتش بالي .. ولا فيه سلك ولا كهربا ولا أي نوع من أي حاجه .. مجرد صندوق حديد أبيض ..
- لعنت فوزي واللي جابوه .. العيال وأمهم زمانهم جايين ومتوقعين الديك يكون موجود .. رحنت للجهاز طبعت صورة الديك .. مش مشكله .. العيال تبص لصورة الديك لحد ما يشبعوا .. ويحمدوا ربنا أنه ديك بالألوان .. مش أبيض وأسود ..
- المشكلة الأكبر في مراتي .. عمرها ما هتصدق أني اشتريت سندوتش برجر ب 1800 جنيه ..
- الموبايل بيرن .. يارب يكون فوزي ضميره أنه ورجع لعقله .. رديت بلهفه :

- " آلو .. مين؟؟؟ .. "
- " مساء الخير "
- " مساء النور .. مين؟؟؟ "
- " أنا توتو "
- " توتو مين؟؟؟ .. عايز إيه؟؟؟ "
- " أنا كان مستر فوزي معايا من شويه وباعلي جهاز بيعمل داونلوود لسكسي جيرلز .. وانا بقالي ساعتين و مستني شارون ستون بالبكيبي تطلع من الجهاز ومطلعتش .. هو اداني نمرك وقالي انك بتاع الصيانة .. وأنا .. "
- " يا أخي طلعت روحك .. كليييييييييييك "
- قلتها وقفلت في وشه السكه بعنف .. يا ابن الكلب يا فوزي يا نصاب .. ده مش بينصب بس ده بيتسلى كمان ..
- لو مراقي عرفت أي صرفت الفلوس كلها في المدعوق ده هتنصب لي المشانق!! ..
- توجهت إلى جهاز الكمبيوتر في شغف .. دخلت النت وكان أملي حاجه واحده بس .. اني ألاقي البرنامج اللي ممكن يعمل آبلوود لمراقى .. عشان تتوووووه في النت للأبد ومترجعش .. وكنت واثق إني هلاقه ..

انترنتو فوبيا .. قصة ساخرة

لي صديق يعمل طبيباً بشرياً في أحد المستشفيات الخاصة ، مثقفٌ واسعُ الاطلاع ، يفهم كل كبيرة وصغيرة في هذه البلد ، له (قلوعة) بتنفرد توماتيكي توماتيكي كلما فتح موضوعاً شائكاً ، ولا تطوى هذه (القلوعة) إلا بعد أن يثبت لك أنك خاطيء تمام الخطأ وأنك ستذهب إلى الجحيم لتحترق مع الشياطين والأبالسة وستخلد في النار أبداً الدهر إن لم تعترف بخطأ وجهه نظرك ..

وكان هذا الصديق الطبيب ، المثقف ، المطلع ، صاحب (القلوعة) .. يعاني من وسواسٍ قهري .. فهو يشك في كل شيء وأي شيء .. "العربية قفلتها كويس .. قول مش هضريك؟" .. "الكوباية مغسولة .. شامم ريحة جراثيم؟" .. "تمت على باب الشقة قبل ما نخرج؟" .. إلى آخره .. وهذا الوسواس الفظيع دفع صديقنا إلى عدم استخدام الانترنت في إنشاء حساب بريد إلكتروني أو أن ينضم إلى أي من مواقع الشبكات الاجتماعية كالفيس بوك وماي سبيس وغيرها .. وكان السبب في ذلك هو أن أنت "مترقب يا ابن عمي" .. "وأول ما تفتح الاكسبلورر هتلاقي واحد من الجماعه إياهم صحيلك وقاعد بيشوف أنت بتعمل إيه" .. لم أناقشة في قناعاته الشخصية بهذا الموضوع ولم أقنعه بعمل أي بريد الكتروني لأن الموضوع كله لا يعنيني كما أن قلوعته لما بتنفرد لا تُطوى إلا بعد أن تنال منك كل منال ..

وذات يوم - وكأي شاب طموح في مثل عمري - كنت أجلس بالمقهى القذر على ناصية الشارع ، ممسكاً بيدِ جريدة الصباح وباليد الأخرى كنت أغمس البسكوت أبو شلن في كوب الشاي الساخن واستمتع بالطعم الرهيب ..

فوجئت بالصديق يهوى على الكرسي أمامي كالإعصار .. لم تنزل عيناى عن الجريدة .. قلت وأنا التهم البسكوته وورائها شفقة شاي :

- تصدق يا بوحمد أنهم بقالهم 6 شهور بيدوروا على الدكتور المحرم اللي عمال يعمل عمليات نقل أعضاء بشرية ومش لاقينيه !!

قال وهو يلهث ويمسح عرقاً وهمياً :

- طيب ماشي .. بقولك .. مراتي مسافرة مع اخوها وقرايها للسعودية .. مش عارف أعمل إيه؟؟!

- لم أرد وتابعت القراءة بتركيز .. فأزاح صديقي الجريدة من أمام وجهي وقال بعصبية :
- يا ابني انت بتقرا إيه ؟! .. بقولك مراتي مسافره .. مسافره .. وأنا قلقان قوي قوي ومش عارف أعمل ايه ..
 - نظرت إليه باستياء وقلت :
 - طب وإيه المشكله ؟
 - نظر حوله بقلق واقترب مني وهمس (وشعرت حينها أن حالة الوسواس بدأت عملها المقدس) :
 - المشكله أي مش مطمئن .. مانت عارفي .. قلقان عليهم .. وعائز أعرف همه بيعملوا إيه لحظة بلحظة ..
 - يا سيدي ماهو فيه موبايل .. ولو مش كفاية أعمل ايميل ، واشتري كاميرا باتنين جنيه ، وشات معاها كل شويه ..
 - تراجع للوراء وكأنه لدغه عقرب وشعرت أنه يكاد يغمى عليه .. قال:
 - شات وكاميرا وايميل ؟؟؟ أنت اللي بتقول الكلام ده !!! .. أنا مش مصدق ..
 - مهو يا ابني لازم تخلص من اللي أنت فيه ده .. مفيش الأوهام اللي في دماغك دي .. لا فيه نت متراقب ولا دياولو .. ولو فرضنا أنه متراقب .. هو انت بتعمل حاجه غلط !!! ..
 - قضمت قضمة من البسكوته وتابعت ببرود :
 - إلا لو أنت بقى غاوي الدخول على مواقع إباحية وقلة أدب وخايف حد يعرف .. يبقى ده كلام تاني ..
 - قال بنرفزة :
 - ليه ؟ انت فاكرني زيك ولا ايه؟؟ بعدين كاميرا ايه ؟ أنت متعرفش أنه فيه فايرس منتشر اليومين دول بيخلي الكاميرا تفتح لوحدها .. يعني ممكن تبقى قاعد في أمانة الله وتلاقي بلد بحالها على الناحية التانيه بتتفرج عليك وأنت مش داري ..
 - الكلام ده كله عادي جداً يا ابني .. وإيه يعني لما الكاميرا تفتح لوحدها وناس تانيه تشوفك .. هو أنت لا سمح الله معيوب ولا حاجه ..
 - نظرت إلى كرشه الكريه و قلت :
 - طب ده أنت حتى امكانيات ..
 - تحسست ذقنه كطفل صغير وتابعت بدلال :
 - و كمان عسوله وكميلة وممكن تلاقي عساسيل كتير يجبو يتعرفوا عليك ..

أزاح يدي في عنف وغضب وقال بحزم :

- مش دي القضية يا ناصح .. المشكله إني ببقى قاعد براحتي شويه .. ببقى قاعد بهدومي الداخليه ..

- خلاص .. يبقى اقلعها قبل ما تقعد عالجهاز عشان محدش يشوفها ..
- خفيف قوي ..

هممت بالانصراف فجدبني صديقي في لهفه من ذراعي وقال :

- إيه ده .. انت هتسييني ورايح فين؟؟

- أنا قلت لك على الحل ومعديش كلام تاني أقوله .. فكر كويس ولو عايز مساعدتي في حاجه كلمني ..

تراجع صديقي للوراء في يأسٍ مفكراً .. أشفقت عليه بعد أن رأيت وجهه ينتفخ من الاحمرار وشممت رائحة شياطين فعرفت أنه سينفجر في أية لحظة .. وبما أنني لم أكن مستعداً لأن أنفجر في هذا السن - لأن هناك أمنيات في حياتي لم أحققها كما أن البسكوت والشاي لسه مخلصوش - آثرت الإنصراف على الفور ..

في اليوم التالي فوجئت بهذا الصديق يخبرني أنه قرر - على مضض وبعد تفكيرٍ مرير - إنشاء حساب بريد إلكتروني على الإنترنت للتواصل مع زوجته وأنه يحتاجني عشان أعلمه أصول الشات واللذي منه .. ذهب إليه قبل أن يغير رأيه ..

- آهو ده الكلام .. ها .. قولي؟ .. نديها (ياهو) ولا (هوتميل)؟؟! ..

قلتها وأنا اتجرع الشاي في نهم .. فقال :

- لا ده ولا ده ..

نظرت إليه باستغراب وقلت :

- أمال إيه؟؟

- أنا عملت استطلاعات .. لقيت فيه موقع اسمه (اكرونيك) .. ممكن أعمل عليه ايميل ..

- (أكرونيك) ؟ ده موقع ده ؟ ولا سائل تنضيف مواعين؟؟

- لا .. اصل ده موقع نادر جداً .. وتقريباً مش موجود .. والعين عليه هتبقى قليله ..

- بلاش وسوسه .. بلا متراقب بلازفت .. فوق بقى وبطل الأوهام دي ..

ضغطت بمهارة أزرار لوحة المفاتيح وقلت كأني خبير كمبيوتر :

مرت الأيام الأولى بسلام وانشكح صديقي بحسابه الجديد على الإنترنت واستطاع التواصل مع زوجته كما يريد ، ولكن بعد أسبوع من إنشائي له الهوميل والفيس بوك وبعد تلقيني له أصول الشات والحركات والذي منه ، وجدته يتصل بي وقد بدا على صوته التوتر الشديد:

- قابلني في القهوة دلوقتي حالاً ..

- ليه؟؟

- لما تيجي هقولك ..

وبعد ساعة كنا في القهوة ..

- خير؟

قلتها فنظر الصديق حوله بشك وقال :

- أنا متراقب ..

- متراقب إزاي؟؟

- أنا متراقب وتحركاتي مرصودة .. أنا احساسى ميكديش .. أنا خايف قوي ومش عارف أعمل إيه .. كله منك .. كله منك ..

- كله مني إيه؟؟ بطل الوسوس دي و فهمني إيه الحكاية عشان أساعدك ..

نظر حوله ليتأكد أنه لا أحد يتابعنا ثم مد رأسه كالزرافة ناحيتي وقال بصوت أسمع به بصعوبه :

- إمبراح ..

- ماله؟

- بصيت بالصدفه من الشباك لقيت فيه ناس واقفه تحت على ناصية الشارع وعمالين يبصوا بطريقة مريبة على الشقة بتاعتي ..

- طب وفيها إيه!؟

نظر حوله مرة أخرى ثم اقترب أكثر وقال :

- كان معاهم لاسلكي ولا بسين جواكت سودا .. صدقني .. وسايين الشارع كله وواقفين تحت شقتي .. ولما سألت البواب قالي أنهم بقالمهم اسبوع بيقفوا نفس الوقفة دي ..

صمت ثم اقترب أكثر قائلاً بصوتٍ خافت :

- بيقفوا من اسبووووووع بالظبط .. يعني من وقت ما أنت دخلتني في المصيبة السودا بتاعت الايميلات والشات والفيس بوك والمواقع المهيبة دي ..

هرشت ذقني وقلت :

- طب انت دخلت على اي جروبات او مواقع مشبوهة ..
- لا خالص .. انا بخش على مواقع الاخبار بس .. حتى من ساعة ما عملت الفيس بوك مش بتكلم غير مع مراتي وواحد كده عملت لي اضافه من يومين ..
- واحد؟؟؟
- آه ..
- حلوة؟؟..
- هو احنا في إيه ولا في إيه الله يخرب بيتك !؟؟؟ ... آه يا خويا صورتها حلوة جداً ..
- طب صورتها عامله إزاي؟؟
- كانت حاطة صورة رمضان كريم .. ممكن بقى نحل مشكلتي ..
- ارتشفت رشفه من الشاي وسألته باهتمام :
- طب من ساعة ما عملت الايميل والفيس بوك مدخلتش على اي جروبات فيها اضرابات ولا دعوة لاعتصامات؟؟
- قال بنفس الصوت الخافت جداً :
- يا ابني من ساعة ما عملت الزفت ده مدخلتش غير على جروب (كارهي تامر حسني) .. و جروب تاني اسمه (أندر البوكسرات في مصر) ..
- أندر البوكسرات في مصر ؟
- قلتها باستغراب وأنا أقضم قضمة من البسكوت .. ثم تابعت في شرود :
- يكونش فيه بوكسر من بوكسرات الجروب اللي انت مشترك فيه يخص واحد من اللي واقفين دول واضايق انك تعديت على حرته الشخصية؟؟..
- يا عم انت عمال تهزر وانا مش ناقصك ..
- تراجعت للوراء .. ارتشفت رشفه من الشاي وقلبت صفحات الجريدة ..
- أنا لا بهزر ولا حاجه .. انت اللي كلامك ميتصدقش .. وبقيت موسوس ووهمك ده هيوديك في داهية ..
- نظرت إليه بحدة وتابعت :
- الناس دي لو كانت عايزة حاجه كانت جابتك من قفاك ومكنوش هيقفوا اسبوع يراقبوك .. أنت عمال تخوف نفسك عالفاضي .. ولا تلاقي أساساً فيه ناس بجواكت سودا ولا بيضا و لا دياولو .. ولا فيه أي حاجه من الكلام ده أساساً ..

وجدته يقول :

- طب فرضاً أنه مفيش ناس بجواكت سواد ولا بيضا ولا دياولو .. طب إيه رايك بقى في دي ..

صمت ثم تابع :

- امبارح لما دخلت على الفيس بوك عشان اتكلم مع مراي .. لقيت الصفحة مبدورة إعلانات ..
الإعلانات كلها عن مؤتمرات طبية .. وأدوية .. وطرق علاج طبيعي .. كلها إعلانات في تخصصي

..

- وإيه المشكله .. عادي ..

قال صديقي بعصية :

- لا مش زفت عادي .. اتصلت بواحد من اللي أعرفهم عشان أعرف إيه الإعلانات اللي بتجيله ..

قالي أن الإعلانات اللي على الصفحة بتاعته غير اللي عندي خالص ، كانت بتجيله اعلانات

بورصة وشرابات حريمي ..

- برضه مفهمتش إيه الفكرة؟؟

نظر حوله بقلق ثم قال:

- عرفوا منين أن أنا دكتور؟؟ ... لبيبييه الإعلانات الطبية دي مبعوتة ليا أنا بالذات دوناً عن كل

البشر؟؟؟؟ .. يا ابني صدقي أنا متراقب .. فيه حد متابعي ..

ارتشفت رشفه من الشاي وقلت :

- يا ابني الموضوع ده عادي جداً جداً ... الإعلانات دي بتبقى موجهه .. متبرجحة انها تروح لناس

مهتمين بموضوع الإعلان نفسه .. انت مثلاً .. انت نسيت انك كاتب على الفيس بوك انك

طبيب؟! .. طبيعي أن الإعلانات اللي تجيلك تبقى متعلقة بالطب والمؤتمرات الطبية والأدوية

والاكتشافات العلمية الحديثة ..

مسح قلقاً وهمياً وقال :

- أنت شايف كده؟؟؟ ..

- وأبو كده كمان ..

نظرت إلى وجهه التعيس وأكملت بثقة :

- ولو كتبت أن انت محاسب هتجيلك إعلانات بنوك وشركات غسيل أموال وبورصة و هتلاقي

مباحث الأموال العامة تاني يوم واخداك عالخبس .. ولو كتبت انك بتاع كمبيوتر وبرجحة ومش

- عارف ايه هتلاقي مواقع لغات برمجية وجرافيكس وفوتوشوب واللذي منه .. هي المواضيع دي بتمشي كده ..
- صمت ثم قال وهو مغلوب على أمره :
- خلاص .. هحاول اصدقك .. إما نشوف آخرتها إيه ..
 - أيوووا .. أنا كده أحبك .. وكبر دماغك بقى عشان عايز اشوف عملوا ايه مع الدكتور اللي بيسرق الاعضاء ..
 - قلتها وانا افتح الجريدة على صفحة الحوادث .. هرش صديقي ذقنه بعنف وقال :
 - بس فيه حاجه أنا مش فاهمها ؟
 - إيه تاني؟؟ ..
 - الواد اللي أنا اتصلت بيه ده !! .. كتب إيه عشان تجيله إعلانات شرابات حريمي؟! سحبت بؤ شاي أصيل وقلت بكل ثقة :
 - آهو ده بقى ممكن تقول أنه متراقب ..

- كنت أظن أني بإنشائي حساب بريد إلكتروني وفيس بوك لصديقي المجنون أني أفعل خيراً برطبي بين قلبه (النونو) وقلب زوجته (البايي) .. ولكني للأسف لم أهنأ ساعة لم يكن فيها مكالمة منه تتحدث عن إيميلات بتراقب وأشخاص غرباء يطلبون تقييمه من بؤه ناهيكم عن الإعلانات الغربية التي تغرق انبوكسه كل يوم ..
- وفي يوم ما هاتفني طالباً مني مقابلته في المقهى .. كان صوته يبدو عصبياً هذه المرة .. جلسنا في المقهى إياه .. كان الوقت عصراً ..
- خير ؟
 - قلتها بنفاذ صبر .. فقال وهو ينظر لي بعصبية :
 - ومنين هيجي الخير وأنا عايش في الكابوس اللي مش عايز ينتهي ده ..
 - صمت ثم تابع في يأس :
 - الله يمسيكي بالخير يا أمي .. هي اللي قالتلي المدعوق انت ده مبيجيش من وراه غير البلاوي ..
 - يا عم دي تلاقيها كانت بتقول كده بس عشان الفاتورة اللي كانت بتجملكوا ايام (الديال أب) ..
 - انما أمك لو عرفت ان فيه اختراع اسمه (دي اس ال) .. (غمزت بعيني وقلت) .. أووووه .. هتلاقيها

- تاني يوم راشقه عالنت وشغاله شات وايميلات و كله يا صاحبي .. دي أمك وانا عارفها كويس ..
تموت في المسخرة ..
- على فكرة انت جي تهزر وانا مش ناقصك ..
 - أنا شايفك متعصب بس زيادة عن اللزوم فقلت الطف الجو ..
 - على العموم أنا أخذت قراري خلاص ..
 - اشحيني ..
- بدا عليه التردد ثم قال في حزم وعصبية :
- أولاً انا عايز اشكرك على كل حاجه .. ثانياً ياريت بقى نلغي حسابي على الفيس بوك وحسابات البريد الإلكتروني بتاعتي عشان كفاية كده.. أنا مبقتش مرتاح .. حاسس أنني متراقب 24 ساعة ..
 - لمحت أن عصبتيه في ازدياد قلت :
 - لا حول ولا قوة إلا بالله .. هعملك اللي انت عايزه حاضر .. روق بالك بس ..
 - ناديت على (سيد) صبي المقهى .. جاء .. قلت :
 - عايزين واحد ينسون معتبر يروق بال الباشا .. وشاي مضبوط ليا ..
 - هم سيد بالانصراف .. جال في بالي خاطر .. فناديته ..
 - قولي يا سيد ..
 - نعمين يا بيه ..
 - انت عندك كمبيوتر؟
 - ايوه يا باشا .. الولاد عندهم ..
 - حد فيهم عنده فيس بوك ؟
 - لا والله يا باشا .. الكبير بي فكر يبقى عنده قدام .. هي بس الفلوس مقصرة معانا شويه..
 - فلوس؟؟ .. فلوس ايه ..
 - فلوس التوك توك ..
 - توك توك ايه؟؟ .. بقولك فيس بوك ..
 - ده ايه ؟
 - ده موقع دردشة وتعارف يا سيد .. مش قتلتي عيالك عندهم كمبيوتر ..
 - لا يا باشا تعارف ايه؟؟؟؟!! .. أعوذ بالله!!!!!! .. ملناش احنا في الحاجات دي!!! .. دي الحاجات دي كلها قدرة وولاد وبنات بيحبوا في بعض وصور عريانه و مواقع مشبوته ودعارة و ..

- آه ..
- والناس اللي لابسه جواكت سودا هتبطل تقف تحت بيتك؟!
ظهر على صديقي تنيحه غير عادية .. قلت له :
- مترد.. اتسمرت ليه؟؟ الناس الوهمية اللي بجواكت سودا هتبطل تراقبك؟؟.. المن إن بلاك؟؟..
- كان صديقي يحاول ان يقول شيئاً ولكن صوته خرج مبوحاً .. فأشار بإصبعه المتوتر أن أنظر للوراء ..
نظرت ..
وكانت المفاجأة ..
- ثلاثة أشخاص ضخام الحجم ، عجيب الشكل ، يرتدون سترات سوداء ، على وجوههم غضب فظيع ..
ورائهم يقف عدد من العساكر ..
كدت أن يغمى عليّ من (الخضّة) .. قال أحدهم :
- مين فيكو محمد عبد الرحيم؟؟
- وقفت على الفور في فرع .. أشرت لصديقي دون أن أتكلم فأشار الرجل :
- خدوه على البوكس ..
- وهنا كاد صديقي أن يصاب بسكته قلبيه .. تشبث فيّ وقال بارتباك شديد :
- يا باشا والله مكنش قصدي .. أنا كنت لسه رايح ألغي حسابات الانترنت والايميلات .. انا مظلوم .. هو ده اللي وزني ودخلني في السكة السودي .. ارجوك .. ارجوك ..
- وقفت مذهولاً لا أفهم ما يحدث .. نظر لي الرجل وأشار لمجموعة من العساكر قائلاً في غضب :
- خدوا ده برضه معاه ..
- أصبت بالشلل ولم أستطع الكلام أو تفسير ما يحدث .. قادي العساكر وصديقي إلى البوكس .. جاء (سيد) صبي المقهى وهو يحمل الينسون والشاي :
- والحاجه اللي طلبتها يا بيه ..
- قالها بدهشة فقلت له بغضب :
- أشربها أنت يا سيد .. كتك داهية في سحتتك اللي تجيب الفقر ..
- سحب (سيد) بؤ ينسون وهو يقول :
- أنا برضه اللي سحتي تجيب الفقر؟! .. الله يسامحك يا باشا .. محنا قولنا النت والكمبيوتر بيحب بلاوي مسعتموش الكلام .. وآدي آخرتها ..

- وقفت و صديقي في قسم الشرطة .. لم أكن أعني ما يحدث بعد وظللت أحاول أن أبحث تفسيرات في عقلي ولكني لم أجد .. كنا واقفين في مكتب الضابط الذي لم يأتي بعد .. القيود في أيدينا .. ملت على صديقي وقلت في خوف وقلق :
- أنا مش فاهم إيه اللي بيحصل .. أنت عملت بلوى ومخبيها؟؟
 - الموضوع واضح زي الشمس .. أنا قلت لك النت والاميلات والحاجات دي كلها متراقبة ويمسكوا أي حد يقول "بم" وانت مش مصدقي ..
 - انت مش قلت لي انك مدخلتش جروبات اعتصامات ولا اضرابات؟؟ وانك بس دخلت جروب "كارهي تامر حسني" ..
 - هو ده بس والله ..
 - يكونش فيه زعيم وطني اسمه (تامر حسني) وقفشونا عشان كارهيته!! ..
 - معتقدش ان فيه زعيم وطني بيلبس سلسلة فيها حجمه وعنده شعر صدر بالكثافة دي إلا لو كان زعيم سيس ..
 - منطقي برضه ..
 - انت بترغي أنت وهو بتقولوا إيه؟؟
- نطق بما الضابط المخضرم والذي دخل لتوه إلى مكتبه وجلس إلى الكرسي .. قال صديقي بتوتر شديد:
- ولا حاجه يا حضرة الضابط ..
 - نظر الضابط في ورقه أمامه وقال :
 - قولي بقى .. اسمك محمد أحمد عبد الرحيم .. خريج كلية طب عين شمس دفعة 1998 .. وبعدين؟؟ احكي لي .. ادينا بندردش ..
 - مضبوط يا حضرة الضابط .. بس انا مش فاهم يا باشا أنا تهمتي إيه بالظبط؟؟
 - انت فاهم كويس انت جي هنا ليه .. ده احنا مصدقنا لقيناك وبقالنا اسبوع بحاله عمالين نراقبك ونشوف تحركاتك ..
 - انا مش هعمل كده تاني يا باشا .. خلاص تبت .. أنا كنت لسه رايح ألغي كل حاجه ..
 - انت فاكر انه بالساهل كده؟؟ مش لازم تتعاقب على اللي أنت هببته؟؟ .. دي فيها 15 سنه اشغال شقة ..
- انهار صديقي وحاولت أنا أن اتماسك .. قال الضابط :

- عالموم احنا بنتحرى عن بطايكم دلوقتي .. وشويه وييجي الرد عشان نشوف البلاوي اللي عملتها ..

ثم نظر إلى أحد العساكر وقال :

- خدهم على الحبس يا ابني لحد ما ييجي تقرير البحث الجنائي ..

وهنا قادنا العسكري إلى الزنانه ..

كان صديقي يحاول أن يشرح ويقول كلاماً غير مفهوم .. أما أنا فلم استوعب بعد ما يحدث .. وكنت أشعر أن هناك خطأ ما لا أستطيع تفسيره ...

في الزنانه جلست وصديقي لا نتكلم ولا نتحدث في أي شيء .. حاولت أن أكون متماسكاً .. أما صديقي فقد أصيب بحالة من الحديث مع النفس وظل يههمهم همهمات غير مفهومة ويرسم جماجم ويكتب كلمات عجيبة على حائط الزنانه .. أشفقت عليه وكنت طوال الوقت أحاول أن أربط المواضيع ببعضها لأصل لتفسير لما نحن فيه .. لم أستطع لوم نفسي أو لومه على أي شيء .. فبالتأكيد ما حدث له تفسير منطقي .. مضت أربع ساعات بعدها أخبرنا الحارس أن الضابط في انتظارنا ..

دخلنا إلى مكتب الضابط .. قابلنا لأول مرة بابتسامه راضيه ..

أقرب من صديقي الذي كان مصاباً بحالة من الذهول ورفع البطاقة في وجهه وقال بود :

- أنا مش عارف أقولك إيه .. احنا متأسفين جداً ..

لم يرد صديقي الذي اصيب بحالة من الخرس .. فتابع الضابط :

- حد فيكو أكيد يعرف الدكتور اللي باع ضميره وتاجر في الاعضاء البشريه .. احنا بقالنا 6 شهور بندور عليه ..

قلت :

- أيوه يا حضرة الضابط .. أنا كنت متابع القصة دي في الجرنان ..

قال الضابط وهو ينظر لصديقي :

- فيه تشابه عجيب جداً ما بينك وما بين الطبيب ده .. انتوا الاتنين ليكو نفس الاسم .. محمد

أحمد عبد الرحيم .. وخريجين نفس السنه ومن نفس الجامعة .. وده خلانا ناخذ احتياطنا ونراقبك

الفترة اللي فاتت دي ..

أخرج الضابط بطاقة ورقية شيك وقال وهو يرت على كتف صديقي الصامت :

- احنا متأسفين لأي سوء تفاهم أو قلق سببناه ليكو ..وده الكارت بتاعي يا بطل ..لو فيه أي حاجه أو عندك معلومات عن أي شيء تقدر تكلمني في أي وقت .. ودلوقتي تقدرؤا تروحوا..

خرج صديقي صامتاً من باب قسم الشرطة وخرجت معه .. حاولت أن أواسيه فلم أستطع .. ذهبت معه إلى منزله .. أعددت كوب ينسون له .. وكوباً من الشاي الساخن مع البسكوت لي .. أخبرني بصوت مبحوح عن شيء يتعلق بإلغاء حسابات الانترنت وما إلى ذلك .. أطعته فيما يريد .. جلست إلى جهازه وجلس بجواري .. كان صامتاً تماماً .. أحسست بتأنيب ضمير عجيب .. قلت له :

- أبو حميد .. أديك عرفت أني مليش ذنب في أي حاجه ..

- حاضر .. ألغي الحساب لو سمحت ..

- مش عايز تقول مراتك حاجه قبل ما ألغي ..

- لأ ..

- طب أنا حاسس أني عايز اساعدك .. احنا اخوات وأنا مستعد اسمعك في موضوع الخلفة ده ونحلّه مع بعض ..

- قتللك الحاجات دي مبتقلش ..

لم ألع عليه أكثر من ذلك ... دخلت إلى حسابه في الفيس بوك والهوتميل ..

وبجرد أن ظهرت الصفحة أصابت صديقي وأصابني الدهشة الشديدة لهذا الكم الهائل من الإعلانات.. كانت الصفحة مليئة بإعلانات عن أرقام ساخنة لعلاج الضعف الجنسي والمقويات وحبوب الفياجرا..

نظرت لصديقي فوجدته قد أغمى عليه ..

ظللت لدقائق محملاً في الجهاز وقد أصابني قلق غير عادي .. قمت بإلغاء الحساب في سرعة ودخلت أيضاً إلى حسابي في الهوتميل والجي ميل والياهو والفيس بوك وألغيتهم بالمرّة ..

أمسكت بكوب الشاي الساخن الذي كدت أنساه و ظللت في حسره أتأمل البسكوتة التي باشت و لم استطع انقاذها وهي تتجه إلى قعر الكوباية في بطء شديد ...

آلو .. اديني الرئيس ..

رفعت سماعة التليفون .. طلبت 140 دليل التليفونات .. ردت المدموازيل الحسنة :

- صباح الخير.. دليل التليفونات مع حضرتك ..

- صباح النور..

- أوامر يا أفندم ..

- عايز نمره سيادة الرئيس..

- نعم ؟!!!!!!!

- نمره سيادة الرئيس .. مش ده دليل التليفونات ؟!

- أيوه!!

- طب عايز نمره سيادة الرئيس ..

- ريس مين يا أفندم ؟ ..

- هيكون الرئيس عُمر حرب ؟؟ .. رئيس الجمهورية طبعاً ..

- جمهورية إيه ؟؟!!

- يا بنتي مش ده دليل تليفونات مصر ؟! ..

- أيوة!!

- يبقى أكيد مش عايز نمرة رئيس جمهورية كوالالامبور .. هتلاقي نمرة رئيس جمهورية مصر العربية
في تليفونات مصر الجديدة .. أوله 26 .. أو .. 27 حاجه كده..

-

- يا آنسة انتي معايا ولا رحتي فين؟؟

- لحظة ..

غابت المدموازيل الحسناء دقيقة سمعت خلالها همهمه مع شخص ما ..

فوجئت بعدها بصوت رجل مخضرم :

- صباح الخير ..

- صباح النور ..

- أوامر..

- هو أنا هعيده تاني ..

- معلش .. الأنسة معرفتش تفهم طلبك ..

- يا جماعة هو أنا بطلب الكُفت .. عايز نمرة الرئيس ..

- ريس مين يا أفندم ؟

- لا حول ولا قوة إلا بالله .. رئيس جمهورية مصر العربية ..

غاب الشاب لثواني ... سمعت تكنكة الكيبورد .. بعدها سمعت صوته ..

- أنا آسف يا أفندم طلبك مش عندي ..

- طلب إيه اللي مش عندك ؟؟ .. هو أنا بقولك هاتلي سندوتش كفته ..

- أنا آسف .. النمرة مش عندي ..

- نمرة الرئيس مش عندك ..

- لأ..

- معقوله ؟؟ ازاي الكلام ده؟! .. طب ماكدونالدز عندك ..

- ماكدونالدز ليهم هوت نمبر .. ممكن امليهولك ..

- بس أنا مش عايز ماكدونالدز .. أنا عايز نمرة الرئيس ..

- مش موجوده ما أنا قلت لحضرتك ..

- يعني ماكدونالدز موجود في الدليل والرئيس نفسه مش موجود؟!!

- أنا آسف .. أي طلب تاني ؟!

- طب شوف لي أي نمرة متعلقة بالرياسه وأنا هتصرف ..

سمعت تكتكة كيورد..

- فيه نمرة سكرتارية استعلامات رئيس ديوان رئيس الجمهورية..

- اديهاني..

أملاي الشاب الرقم .. دونه .. وضعت السماعة..

طلبت الرقم الجديد .. رد صوت ضخم:

- آلو ..

- هي دي استعلامات رياسة الجمهورية؟؟
- دي سكرتارية الاستعلامات .. أوامر..
- أنا رقمي ظاهر عندكو؟؟
- نعم !؟؟؟؟؟!
- أنتوا مش عندكو اظهار رقم الطالب..
- أيوه..
- طب رقمي ظاهر عندكو؟؟؟
- أيوه يا أفندم ظاهر عندنا .. وكل بياناتك بتظهر عندنا .. أوامر..
- طب متشكر قوي .. سلامو عليكم..
- أغلقت السماعة ... نظرت إلى الرجل الواقف بجواري بغیظ:
- جهازك بايظ يا ابو سمرة .. نمرتي لسه برضه بتظهر عند الناس..
- قال عم سمير عامل التليفونات وقد أصيب بتبول لا إراداي :
- يا ابني وهو لازم العملة السودا دي عشان تتأكد ان الجهاز شغال .. مانا قتلتك رقمك مش هيظهر عند حد خالص..
- طب مهو بيقولولي أنه ظهر آهو ..
- يا ابني هو اللي انت اتصلت بيهم دول فيه حاجه بتستعصى عليهم..
- يا سلام!! .. يعني هو انا جايب الجهاز ده ليه ؟ .. مش عشان لما حد ميعجبنيش من المسئولين اتصل اشتمه وميعرفش يجيني .. ولا أنت عايزني اروح في داهيه..

- هو انت باللي عملته ده مش هتروح في داهية..

ابتسمت وقلت له:

- لا من الناحية دي اظمن .. أنا عضو في جمعية حقوق الإنسان ومشارك في جروب كلنا خالد سعيد عالفيش بوك ولو حد لمسني هخليها قضية رأي عام وهكلم حقوق الإنسان في امريكا .. وهكلم اوباما نفسه .. اهو اوباما ده بقى معايا نمرته .. زيرو عشره .. فودافون ابن اللئيمة عشان بيكلم دولي كتير .. رؤسا بقى وكده .. وعلى فكرة .. ال ..

- طب خلاص خلاص !! .. فالخ قوي .. هات خمسة وعشرين جنيه خليني اتزفت من هنا..

أعطيته النقود فانصرف..

بالفعل لم يحدث أي شيء بعد هذه المكالمة ..

ربما هو فعل الأقدار وربما لأني عضو في جمعية حقوق الإنسان..

لكن بعد فترة .. باظ التليفون وباظ الجهاز .. بحثت عن ابو سمرة فلم أجده .. قالوا لي أنه اختفى منذ هذا اليوم في ظروف غامضة ..

افتح الانبوكس يا ريس

أعتقد أن الخطأ الجسيم الذي وقع فيه الرئيس مبارك والذي أطاح بحكمه بعد ثلاثين عاماً من الاستبداد .. هو أن الراحل مكش عنده فيس بوك .. فلو كان الرئيس يمتلك صفحة رسمية له عاليفيس لاستطاع التواصل بسهولة مع هؤلاء الشباب الثائر وعرف كيف يخاطب ودهم ويتحدث إليهم ويتواصل معهم قبل حدوث الكارثة .. ولو كان الرئيس يدخل الفيس بوك ساعتين كده بالليل بالفلاشة قبل ما ينام لأدرك الخطر المحيط به عندما يجد صفحة تنمو بشكل رهيب اسمها (كلنا خالد سعيد) .. كان ساعتها الرئيس ممكن ياخذ باله إن الصفحة مليئة بالغضب والكره وبها دعوات للتظاهر يوم 25 يناير ..

وكان ممكن للرئيس بكل هدوء أنه يكلم أدمن الصفحة (وائل غنيم) عالانبوكس ويفهمه غلطه ويقوله : يعني ايه يا وائل صفحه فيها ربع مليون كلهم بيقولوا كلنا خالد سعيد .. ازاي كللكوا خالد سعيد يعني مش فاهمها دي؟ .. وربي بطايقكو!! .. يعني ينفع انا اعمل صفحه اسمها كلنا حسني مبارك ومفيش غير حسني واحد بس ماصص دمكوا وقاعد على قلبكوكو؟؟!! .. أأقفل الصفحة يا وائل الله يرضى عليك بدل ما اقاضيكو بتهمة التزوير .. قال كلنا خالد سعيد قال .. ناقص تقول كلنا الراحل اللي ورا عمر سليمان..

وهكذا يستطيع الرئيس مبارك أن يُفهم وائل بالأدب والأخلاق و أن يتواصل عموماً مع الشباب في كل الجروبات وكل الصفحات عبر الفيس بوك ويجهض أي ثورة في طريقها للانتشار ..

وقيل أن هناك أحد رجال القوات المسلحة حاول بكل جهده اقناع الرئيس بعمل فيسبوك ، ولكن هذا الرجل تم التشويش عليه وابعاده ووقف أمامه عمر سليمان لمنعه من التواصل مع الرئيس .. وعُرف هذا الرجل الذي وقف أمامه عمر سليمان فيما بعد باسم : الراحل اللي ورا عمر سليمان .. ولم يستجب الرئيس للنداءات وإنما شكل لجنة سرية لاغتيال مارك زوكبيرج مؤسس الفيس بوك .. ولكن المحاولة باءت بالفشل و كان مكتوباً لزوكبيرج بداية جديدة ومكتوباً للرئيس نهاية عجيبة من قلب جروبات وصفحات الفيس بوك .. وانتهى حكم مبارك الذي دام ثلاثين عاماً بطريقة درامية ..

والخطأ الذي وقع فيه الرئيس مبارك تداركته القوات المسلحة فيما بعد .. وسارعت بعد الثورة بعمل صفحة رسمية لها عالفييس بوك تتواصل بها مع الشباب وتقرب من أفكارهم .. وكذلك فعل القادة والمشاهير كالبرادعي وعمرو موسى وأيمن نور ، والأحزاب المختلفة كالوفد والتجمع والإخوان المسلمون .. وصار كل من لديه أفكار يقوم بعمل جروب أو صفحة عالفييس بوك لمخاطبة الشباب ..

ولذلك فعلى رئيس مصر القادم ألا يقع فيما وقع فيه سلفه مبارك وأن يمتلك صفحة أو جروب على الفيس بوك للتواصل مع أفراد الشعب .. بل يقول البعض أن هناك شيء أفضل من الجروب و الصفحة .. وهو ذلك الذي يدعونه (البروفایل) .. أينعم يا عزيزي البروفایل .. فالصفحة معناها أن الشعب (معجب) بالرئيس .. إنما البروفایل معناها إن الشعب (مزيط) الرئيس ومأنتم معاه ومصاحبه وعایشین اللحظة .. وما أجمل يا عزيزي أن تستيقظ في الصباح وتلاقي رئيس الجمهورية عاملك بوك Poke أو باعتلك ريكويست لسيتي فايل ..

ولذلك فأول مهمه بعد أن يتولى الرئيس الحكم أنه يعمل بروفایل و يعمل آدد للثمانين مليون كلهم علشان يعرف طلباتهم علطول وبطريقة مباشرة وبدون وسيط .. وأنا بحسبه بسيطة لقيت إن إضافه تمانين مليون (بواقع فريند من الشعب كل دقيقة) هتحتاج 2187 سنه .. وطبعاً ده شيء مستحيل .. لأن أقصى مدة للرياسة هي 8 سنوات .. ولكن احنا ممكن نجدد للرئيس 2000 سنه لحد ما نتأكد أن آخر واحد من الشعب اتصور جنب الدب .. قصدي اتعمله إضافة ..

إضافة الرئيس للشعب عالفييس بوك هي لمحة إنسانية بحتة و خطوة من الرئيس لمصادقة الشعب، ولذلك على الشعب أن يدرك مسؤوليته نحو ذلك .. يعني الانبوكس بتاع الرئيس يبقى للشكاوى بس .. مش لازم الرئيس كل ما يخش يلاقي 2398343344 نوتيفيكاشيز من الشعب .. ايشي تاج على صور اليسا .. وايشي ريكويست لناس عايزة تبقى نايبور في الفارم بتاعت الرئيس .. وأنتوا مال اهاليكو ومال فارم الرئيس؟! .. طالما الفارم بتاعت الرئيس في الفيس بس ولم تتعدى على أراضي الدولة يبقى سووو وات ؟؟ .. شعب سخيف .. سخيف .. وممل وباستي بوو خالص ..

وأخيراً .. يجب أن تكون هناك هيئات رقابية للتأكد من أن الرئيس يتواصل مع جميع المصريين .. سواء كانوا تونسيين أو ليبين .. وأن يتواصل الرئيس مع الغني والفقير ، والطويل والقصير ، المسلم والمسيحي ، النصاب والشريف ، المحترمين والمحششين .. و مع اللي لسه في طريقهم للتخشيش .. ومع شمامين الكلة ..

ومع الكلفة ذات نفسها .. ومع أطفال الشوارع والمشردين ومع اللي بيركنوا عريياتهم ويعملوها على جنب .. ومع مقدمي برامج التلفزيون الفقيهه .. ومع أمينه شلباية والشيف رمزي .. ومع هيفاء وهبي واليسا وحسن شحاته وراجل وست ستات .. يجب أن يتواصل الرئيس مع كل الفئات بمختلف أعمارها وطوائفها.. ومش كده ويس ..ده لازم يعمل شات مع الشعب على الأقل ساعتين كل يوم قبل ما ينام علشان الشعب يحس بالألفة والونس وأنه مش لوحده في البلد .. الشات مهم يا ريس .. ويا ريت متحججش بأنك دخلت وملقتش حد من الشعب أونلاين .. أو تخش وتعمل شات مع المزب بس .. ساعتها هيطيروك يا ريس زي ما طيروا اللي قبليك ..

الموضوع طويل وفيه قعدات كتير وكلام أكثر .. ولكن في النهاية يجب أن يتصل الرئيس مع الشعب عبر أي قناة ، حتى لو كانت قناة السويس ، لأنه أحياناً الناس بتبقى ثائرة ومحتاجه بس اللي يطبب عليها .. محتاجه بس أنها تحس أن صوتها مسموع حتى لو طلباتها تأجلت شويه .. وأنا نفسي في يوم أصحى الصبح ألاقى الرئيس عاملي لايك على الاستاتس بتاعتي حتى لو كانت : "معلش يا ريس .. أنا مضايق منك شوية " ..

ساعتها فعلاً هحس اني في بلد ديموقراطي وأن حكم الإعدام مش مستيني ..

ثائر مشافش حاجه

لا أهوى العلاقات الاجتماعية ولا أحب مصادقة الجيران ، ولكن في أيام ثورة الغضب اضطرت للتعرف والتودد إلى جاري في الدور السابع كي أستطيع رؤية أحداث الثورة من بلكوته المطلة على الشارع متحملاً في بسالة كثرة أحاديته المملة عن الثورات القديمة و شباب الزمن الجميل ..

بلكوته تطل على شارع الهرم المليء بالأحداث .. موقع استراتيجي لرؤية ما يحدث في الشارع الأشهر على الإطلاق .. رأيت كل شيء ..

رأيت التظاهرات السلمية وشبابها الرائع .. ورأيت مجموعات العنف والبلطجة .. ورأيت أشخاصاً لم يكن لهم همٌ سوى حرق كباريهات وكازينوهات شارع الهرم .. علمت فيما بعد أن أحد هذه الكباريهات هو ملك للراقصة (لوسي) والتي صرحت بعدها : أن حرق الكباريه الخاص بها هو شيء ميرضيش ربنا على الإطلاق .. وأن (الهشك بِشك) شغل محترم وله رساله سامية لا تقل عن مطالب الثورة ..

ووسط هذا رأيت أشخاصاً آخرين يدغدغون محلاً مشهوراً لبيع الخمر .. وجوههم تحمل غيظاً رهيباً .. معهم حق فأنا أكره الخمر مثلهم .. ولكني ما لبثت أن تراجمت عن إعجابي بعد أن رأيتهم يفتحون زجاجات الخمر ويشربون في نهم .. وأنا أعدرهم بشدة .. فهم يحتاجون لنسيان ما حولهم من عنف وفوضى وضرب ولو لبعض الوقت قبل أن يتابعوا نشاط السرقة من جديد ..

وأخيراً .. رأيت دبابات الجيش ومدرعاته وعرباته تدخل شارع الهرم في استعراضٍ لفرض القوة وحفظ الأمن .. رحب الثوار بالجيش ترحيباً حاراً بينما فر البلطجية .. أما الذين كانوا يشربون الخمر فقد سمعت بينهم وبصعوبه أعجب حوار ..

- " الصنف ده ممتاز "

- " اشمعي؟ "

- " بينخليك تشوف دبابات وحركات "

- " دي دبابات حقيقية يا بأف مش خيال .. أنا شايف الناس بتشاور لها "

- " لا مش معقول تكون حقيقية .. الناس بتشاور للعساكر اللي فوقها .. انما هي نفسها مش موجوده"
- " يعني العساكر دي ماشيه عالهاوا؟؟ .."
- " بالظظظظظظ يا ابن الهبله"
- " أنت معاك ايه؟ "
- " كوكا كوستو يوناني .. وأنت ؟ "
- " كوكا كولا مصري "
- " قشطة "

لم استطع أن أسمع بقية الحوار ولكني وجدتهم يركضون في فرع بعد أن تأكدوا أنها دبابات ومدركات وعربات جيش حقيقية .. ولكن ليست مصرية - هكذا ظنوا - بل اسرائيلية .. استغلت غياب الشرطة وجاءت لتحتل مصر على الفور ..

بمجرد دخول الدبابات والمدركات إلى الشارع رأيت دموع جاري تنهمر في غزارة .. فقد كان عقيداً سابقاً في القوات المسلحة و بطلاً من أبطال الحروب .. كان يحكي لي الفارق بين الثورة والانتفاضة وبين سلطة الجيش وسلطة الشرطة وكيف أنه فقد رجله اليمنى في حرب الاستنزاف وفقد اليسرى في حرب 73 ورغم ذلك كان يلعب الكرة بكل مهاره ليحافظ على رشاقته .. ثم أنه أخيراً فقد عقله في عصر مبارك قبل أن يصاب بسكتته قلبيه تسببت في تفجير رأسه و قضت عليه تماماً .. يعني أنا دلوقتي بكلم المرحوم ..

كنا نراقب ما يحدث من أعلى وكأننا في فيلم سينمائي و كانت أمنية جاري الوحيدة هو أن تستطيع قوات الجيش القضاء على أعمال العنف والبلطجة التي انتشرت بصورة رهيبه وسببت الرعب و الهلع للكثيرين ، وافقته الرأي فقد كنت أريد أن يستتب الأمن في أسرع وقت - ليس فقط لحوفي على البلد - بل لأجد فرصة لالتقاط بعض الصور مع هذه الدبابات والمدركات ووضعتها على الفيس بوك .. هو أنا يعني كل يوم بشوف دبابة؟! .. واللي سبق أكل النبأ .. لو الدبابات انتشرت قوي في كل مكان هتيجي الناس تتصور معاها و هتبقى الصور ملهاش طعم .. وهيبقى الموضوع عادي جداً .. ايه يعني متصور مع دبابه؟ .. مافيه واحد متصور مع دبابتين ومدرعة؟؟ .. ولو أنت متصور جنبها هتلاقي اللي متصور فوقها .. وتحتها ..

وجواها .. ومش بعيد تلاقي حد متصور وهو شايلها .. أو وهو محشور في الماسورة بتاعتها قبل ما يتزلفط وينضرب في الهوا .. هيبقى الموضوع عادي جداً جداً ..

وأذكر أنه بعد عدة أيام من قيام الثورة وبعد أن استتب الأمن قليلاً .. جاءت إحدى زميلات العمل في انخيار تام ولما سألناها اخبرتنا أنها أرادت - ككل خلق الله في مصر - أن تلتقط صورة مع الدبابة الرابضة على (أول الشارع) .. ذهبت وطلبت من الجندي أعلى الدبابة أن ينزل ويقوم بتصويرها و لكنه رفض بلطف لأنه لا يستطيع أن ينزل من الدبابة إلا بأوامر القائد .. كادت تتراجع ولكنها لمحت ولداً صغيراً .. طلبت منه تصويرها (وهي واخذاه الدبابة في حضنها) .. وقفت البنت وضع الاستعداد .. لكن الولد خطف الكاميرا وجري .. صرخت الزميلة وتوسلت للجندي أنه يجري وراه ويلحقه بالدبابة أو يضرب عليه طلقة من المدفع يخوفة عشان يقف .. رفض الجندي بلطف لأنه لا يستطيع التحرك بالدبابة إلا بأوامر القائد وأنه أيضاً لا يستطيع أن يضرب بالمدفع لأنه (مش مسدس ميه) - هكذا قال - ده مدفع خمسة بوصة .. يعني مش هيفوف الواد بس .. ده هيفرم الواد بالشارع .. والله يعوض عليك يا ست ..

في اليوم الخامس للثورة أخبرني أحد الزملاء عن أن معظم سلسلة محلات On the Run تم نهبها .. وأن المحل الواقع تحت منزله بالذات في وسط البلد تم نسفه تماماً ومفيهوش ولا علبة جيلاتي واحده .. حتى الماكينات اللي بتعمل الاسبرسو والكابوتشينو اتسرفت .. ولكن بعض الحرامية رموها تاني لأنهم كانوا فكرينها في الأول مكن الكاشير اللي بيتحط فيه الفلوس ..

وأنا شخصياً ليست لي ذكريات مع محلات (اون ذا رن) غير مرة واحده كنت هجيب عصير .. لقيته بخمسة وخمسين جنيهه قمت رجعتة مكانه تاني زي الباشا .. وعلى الرغم من ذلك كنت متعجباً جداً .. هو (أون ذا رن) دا فيه ذا قيمة عشان يتسرق؟ .. ده كله حلويات وعصاير وسندوتشات .. حرامي ايه المعفن اللي في وسط القلبان ده سايب الدنيا ويخاطر عشان يسرق حبة سندوتشات وكانزات بيسي وعلب آيس كريم .. ولو فرضنا انه هيبيعها؟ .. انا مش متصور أنه بيعي يوم الأقي حد يقرب مني وهو لافح كوفيه صوف على وشه ويبص حوالياه بقلق ومطلع من عيه سندوتش سلمون مدخن ولا كيس مارشميلو مستورد عايز يبيعهولي بأي طريقه قبل ما يتمسك ..

ما علينا ..

من أجل ما رأيت في أيام الثورة هي اللجان الشعبية .. الشباب الواعد يحمي منطقتهم و ممتلكاتهم من السرقة والنهب ومن البلطجية واللصوص .. أنا لم أشارك طوال فترة الثورة في أية لجان شعبية .. ليس كسلاً .. ولكن لأن المنطقة التي أقطن بها هي أساساً منبع المجرمين والبلطجية .. ولذا فلا داعي لحمايتها ..

ولكني مررت على لجان شعبية كثيرة على اختلاف المناطق والأشخاص .. مررت على شباب المعادي وشباب المنيل وشباب الزاوية .. ورأيت أسلحة عجيبة لا أعلم من أين جاءت .. حتى إمام الجامع لدينا كان يمسك مطواه قرن غزال ويدعو الجميع في صلاة الفجر أن ينزل بال سلاح الذي يملكه للدفاع عن الممتلكات والأعراض .. وكان السلاح في مفهومنا هو كل ما يمكن مسكه من شومة وسكاكين ومطاوي وخلافة حتى أن أحد الجيران جلب من منزله طقم سكاكين فاخر به خمسون سكيناً مختلفة الحجم وقام بتوزيعها على من لا يملك سلاحاً وكانت على وجهه علامات الفرحة وكأنه بيوزع سفن أب ..

كان الكل يحمي والكل يدافع .. وكان الشباب في كل مكان يتأكدون فقط أنك لا تحمل سلاحاً في حقيبة السيارة وأن السيارة تخصك وليست مسروقة ..

وأذكر أن أحدهم قد استوقفني في حلمية الزيتون وقال لي أن العربية تمام مفهياش حاجه وأنها مش مسروقة و لكن المشكله أن الرخصة منتهية .. الراجل كان بيهزر و أنا للأسف أخذتها جد .. (وأنت مالك!!) ..

دي الكلمة الوحيدة اللي قلتها .. ومقولتش غيرها بصراحه .. لأني لقيت سلاح الحلمية كله مرفوع عليا ورأيت الثوار من كل مكان .. حتي الاتنين مليون بتوع التحرير جم على وجه السرعة لمؤازرة اخوانهم في الحلمية ضد العبد لله ..

ووسط هذه الجيوش لم أجد بدأ من الاعتذار للشباب وتقبييل رأسه .. ثم عرضت عليهم جميعاً سيارتي الفارهة وكل ما أملك من نقود مقابل أن يتركوني سليماً من غير ما اتقطع ..

تداعت إلى رأسي كل هذه الخواطر بعد ثمانية عشر يوماً هي عمر الثورة أولاً عن آخر .. وشاهدت في التلفاز اللحظة الأخيره لرحيل الرئيس مبارك وتخليه عن السلطة لصالح الجيش .. راقبت بعيون دامعة فرحة الناس بالحرية وحزنهم على شهدائها .. سأفتقد كثيراً الحديث الممل لجاري العقيد في الدور السابع .. ربما أراه في الثورة القادمة ..

وبينما أنا أتابع الأخبار رنّ جرس الباب في إلحاح .. كانت الساعة تقترب من منتصف الليل .. مين
المزعج اللي هيبجي الساعة دي؟! .. فتحت الباب .. وجدت شاباً مرتبكاً .. اقترب مني .. وأخرج من بين
ثيابه كيس به حلوى .. قال :

- معايا (جيلي كولا) أصلي من (اوف ذا رن) .. يعني بتاع بلده .. وبنص السعر .. تشتري يا

جميل؟؟؟

-

انفلونزا المليارات

في بداية زواجي اشتريت آلة حاسبه مكونه من أربعة أرقام كي أستطيع أن أحسب بدقه مصروف كل شهر وما أنفقه على احتياجات المنزل من سكر وشاي وزيت وكابوتشينو بالبندق وما سأضطر إلى اقتراضه من مال كي أكمل الشهر بسلام ولا أتضور جوعاً في الأيام الأخيرة ..

وفي الواقع ظلت هذه الآلة الصغيرة ملازمة لي طوال شهور الزواج - أنا وزوجتي - قبل أن تصاب فجأة بسكتة قلبيه - الآلة وليست زوجتي - فقد حاولت في لحظة فضول أن أحسب بالآله شيئاً بسيطاً .. بريئاً .. طاهراً .. عفيفاً .. خفيفاً .. ظريفاً .. عبيطاً .. ألا وهو ..
ثروة الرئيس مبارك بالجنية المصري ..

وكنت أسمع عن حسابات للرئيس بالدولار واليورو وعملات أخرى غريبة .. فساقني فضولي إلى أن أجمع كل ما أجده من أخبار بالصحف والإنترنت والوكالات العالمية عن ثروة الرئيس وتحويلها من تلك العملات إلى الجنية المصري ووضعها في النهاية مع بعض التحليلات في مقال كبير بأرقام عظيمة تُدخلني السجن إن شاء الله مع الداخلين ..

فضولي له عذره .. ومحاولتي لا بأس بها .. لكن آلي الحاسبة البطلة كانت ضحية هذا الفضول .. فثروة الرئيس تعدت الأرقام الأربع بخمسين سنه ضوئية على الأقل ..

وكانت ثروة الرئيس مبارك هي الشغل الشاغل لكل أفراد الشعب في هذه الفترة .. البعض يقول أن الثروة تتراوح بين 40 إلى 70 مليار دولار .. والبعض الآخر يؤكد أن لديه وثائق تثبت أن ثروة الرئيس هي 30 مليار دولار .. أما مشتركي حروب (احنا اسفين يا ريس) و (ارجع يا ريس بطل رخامة) فقد راحوا يقسمون بأغلظ الأيمان بأن ثروة الرئيس هي 5 مليار دولار فقط أول عن آخر .. مش قصة يعني .. فلماذا تظلمون الرجل بهذه الطريقة وتبصوله في الكام مليار اللي معاه !؟

وفي أيام الثورة صارت كلمة (مليار) عادية تماماً من كثرة تداولها بعد أن كانت مجرد كلمة خياليه نسمعها في حكايات علي بابا والمليار حرامي وغيرها من القصص الأسطورية ، واكتشفت أنه ليس الرئيس فقط هو من يملك المليارات .. فغيره كثيرون من زبانية النظام .. وصار المليار هو العلامة المميزة لأي نصاب تطاله يد القانون .. ولذلك لن تجد مسئولاً ثروته بالملايين أبداً .. فالمليون معناها أنك شريف وعفيف ومعرفتش تهلب كويس أو تستغل منصبك .. انما لما تخش في المليار يا حلو - حتى لو جايبهم من حلال - هتبقى برضه حرامي ونصاب ولازم تتعكش وتتسجن .. لذا فقد أصيب المصريون بحساسية المليار .. أي كلمة فيها مليار تجعل المصري يصاب بانهباء .. ويصاب أيضاً بانقلاب المعدة وآلام الحك وأعراض البواسير .. عشان كده لو سعادتك مسئول و معاك 999 مليون خليه زي ماهمه .. لو مليون زيادة هتخش في مليار .. واللي يخش فلمليار بيروح النار .. لكن لو حصل غصب عنك وخشيت في المليار أقسم المبلغ بالنص .. 500 مليون و500 مليون .. وحط كل خمسمية مليون في محفظة شكل بحيث الناس متلاقيش ابدأ معاك مليار على بعض لو اتفتشت ..

نرجع للآلة ..

عجزت آلي ذات الأرقام الأربع عن حساب ثروة الرئيس فأهديتها لأحد أصدقائي المتزوجين حديثاً كي يحسب بها نفقات منزله كل شهر .. ولكنه اعتذر لي قائلاً بأنه لا يحتاج إلى كل هذه الأرقام الأربع وأن رقم واحد فقط يكفيه .. الصفر .. لأنه أساساً مش لاقى ياكل ..

شتمت صديقي و احتفظت بالآلة القديمة واشترت واحده أخرى جديدة ذات عشرة أرقام ..

وهكذا - ومستخدماً الآلة المزودة بميموري لحفظ المعلومات - جلست أتابع بشغف الفيديوهات والأخبار والثروات و الأرقام .. ثروة الرئيس مبارك و ثروة حبيب العادلي وأحمد عز وجرانه وغيرهم .. خسائر تصدير الغاز .. وعوائد البترول .. أرباح السويس .. مكاسب السياحة .. خسائر نهب أراضي الدولة .. لاستنتج في النهاية الكم الهائل من المليارات التي تضيع على البلد بلا رقيب ولا حسيب ..

كدت أصاب بالصلع من التفكير و الأرقام تتابع في جنون رهيب .. أرقام لا قبل لي بحسابها .. وأموال رهيبة ضاعت على البلاد وجوَّعت ملايين لتدخل في جيوب أفراد .. كلها مليارات .. مليارات .. مليارات ..

..أنا لم أر المليار في حياتي ولا يمكنني تخيله .. و أول مليون رأيته كان في فيلم جزيرة الشيطان لعادل إمام ..
أما أكبر مبلغ أمسكته بيدي فكان 750 ألف جنيه .. وكانت أيام بنك الحظ ..

وبينما أنا أتابع القنوات و أحسب الأرقام بالآله الجديدة وأقترب من كتابة مقال فيه أرقام رهيبه استوقفني
خبير عجيب للمذيع أحمد المسلماني في برنامج الطبعة الأولى على قناة دريم .. فالمسلماني يقول بأنه - نقلاً
عن جريدة العربي الناصري ووثائق من بنك كالدونيا البريطاني - فإن ثروة الرئيس تبلغ .. كام بقى يا عم
أحمد !؟ .. 620 مليار دولار ..

وبسرعة كتبت الرقم على الآله وقمت بضربه في 5,8 كي أحصل عليه بالجنيه المصري ..
وهنا توقفت الآله وأعطتني خطأ .. فالرقم الناتج أكبر من إمكانية الآله ذات الأرقام العشرة .. بس مستحيل
.. إزاي؟ .. وهنا جائتني الإجابة من أحمد المسلماني الذي أتحفني بقوله أن 620 مليار دولار تعادل
بالمصري .. كام بقى ؟؟؟؟ ... 3,5 تريليون جنيه ..
نعم يا خويا .. تريليون ؟؟؟ ..

جديد الرقم ده قوي .. ده كام ده ؟؟ .. يعني كام صفر مثلاً ولا كام رقم جنب بعض ولا إيه حكايته الرقم
ده؟؟ .. حاولت أن اراجع الحساب سريعاً .. أنا اللي فاكره أنه كان فيه خانة الآحاد .. وراها العشرات
بعدين المئات بعدين الآلاف وبعدين كنت بتلخبط بقى (وده كان سبب سقوطي في رابعة ابتدائي اللي
محدث يسقط فيها أبداً) ..

وهنا - وللأسف الشديد - لم تسعفني الآله ذات الأرقام العشرة .. محتاج آلة أكبر عشان الحسبة دي
.. يجرب بيتك يا ريس .. هتخلص فلوسي عالآلات الحاسبة ..

وهكذا قررت أن أعطي الآله ذات العشرة أرقام لصديق لي يعمل نصاباً .. وسألته إن كان سمع بـ
(التريليون) فأخبرني أنه لم يقابل أحداً بهذا الاسم في حياته .. وأن تعامله فقط هو مع الأرقام و أن أكبر رقم
تعامل معه كان خمسة ملايين جنيه وكانت نصبايه صغننه على الشركة التي أعمل بها أنا ..
الوغد السافل ..

تركته وتوجهت إلى مكتبة بالدقي وأخبرت الرجل أنني أريد آلة تستطيع عمل حسابات بالتريليون .. نظر لي البائع في بلاهه وقال لي أن أخبره عن عدد الخانات .. أخبرته أن التريليون هو مليون المليون .. يعني واحد وجنبه 12 صفر .. يعني عايز آلة فيها 15 رقم على الأقل .. عندها نظر لي الرجل نظرة استحقار ثم طردني من المكان قاذفاً إياي بأبشع الألفاظ والشتائم ..
لم أجد الآله في أي مكان .. كيف يحسب الرئيس ثورته إذن؟؟ .. بيعدها على إيديه مثلاً؟!

عدت للمنزل و أكملت المقال دون أن أذكر أية معلومة عن ثروة الرئيس بالتريليون .. فإن كان المليار يصيب المصري البسيط بالحكة وتقلبات المعدة فبالتأكيد سيصيبه التريليون بالسكتة القلبية والذبحة الصدرية وانفلونزا الخنازير ..

كتبت المقال المليء بالأرقام والذي أستعد لنشره في إحدى الجرائد المشبوهه وقمت بمراجعته وتنقيحه .. ثم نظرت إلى آلي القديمة ذات الأرقام الأربع ولم يكن يشغل بالي سوى سؤال واحد :

إذا وصلت ثروتي ذات يوم إلى تريليون جنبه .. فكيف يمكن أن أجد آلة مكونه من 15 رقم أحسب بها نفقات المنزل كل شهر!!!!?

معاش الرئيس .. بين الواقع والخيال

المصري اليوم : 2000 جنية معاش مبارك عن عمله كرئيس سابق



نفرد بتسجيل الاتصال الهاتفي الذي تم بين الرئيس مبارك وبين رئيس هيئة المعاشات وفيه يعترض الرئيس على مبلغ الـ 2000 جنيه كمعاش شهري ..

- أيوه يا صبحي ..
- ايوه مين؟
- انا الرئيس يا بني ادم ..
- ريس مين؟
- هيكون الرئيس متقال ؟ .. الرئيس محمد حسني مبارك ..
- محمد حسني مبارك ؟؟؟؟ ... الاسم ده مش غريب عليا ..
- نعم يا حبيبي!! .. مش غريب عليك؟؟
- أنا آسف يا فندم أصل العملا عندنا كثير .. والأسامي متشابهه ..
- يا ابني أنا الرئيس .. محمد حسني مبارك ..
- صدقني يا فندم مش فاكرك .. الاسماء كثير بقول حضرتك ..
- الضربة الجويه ..
- ضربه جوية؟؟ يا ساتر يا رب .. ده مجنون ده ولا إيه ؟ ..

- حسبت الضربه الجوية طيب؟
- حسبتها يا ريس ..دي لوحدها عامله الف جنيه ..
- يا نهار مش فايت ..يعني الضربه عامله الف .. والتلاتين سنه عاملين الف لوحدهم ..
- بالظبط يا ريس ..
- امال لو كنت عملت بأصلي وقعدت مدتين بس (8 سنين) كان هيبقى معاشي كام؟؟!
- لا ده انت كده هيبقى عليك فلوس يا ريس ..
- جامد تحرير يا صبحي !! .. بس مش ناقصة خفة دم ..
- طب استني احسبها لك ..
- تحسب ايه يا بني ادم ؟ .. لا تحسب ولا تجمع .. اسمع ..
- أو مرني يا ريس ..
- عايزك تجس نبض الشعب ..
- اجسه؟؟ .. ليه يعني؟؟
- انت عارف يا صبحي أن الشعب بتاعنا عاطفي ..
- ايوه ..
- وميرضاش ان الريس بتاعه يبقى معاشه الفين جنيه بس ..
- مش فاهم برضه ايه المطلوب ..
- شوفهم كده لو موافقين ارجع واقعد 30 سنه كمان اعمل فيهم بس الف تانيه للمعاش يبقى كتر خيرهم .. ال 30 سنه هيعدوا كأنهم شكة دبوس ..
- يا ريس حتى لو وافقوا .. انت عندك 80 سنه .. ده انت مش بعيد تتوفى بعد المكالمه دي ..
- مفيش رئيس ييموت يا صبحي .. مانت عارف قوانين الكون ..
- ربنا يديك الصحه يا ريس ..
- طب اسمع ..
- أو مرني ..
- انت بتقول ان الضربه الجوية عامله باكو بحاله!؟
- اه ..
- وانت فيه عندك كام ضربه في الملف بتاعي؟ ..

- واحده بس يا ريس .. ضد اسرائيل ..
- والضربه بألف ؟
- ايوه ..
- طب والنص ضربه؟؟
- دي بقى تسأل فيها أشرف فرغلي ..
- بس انا ملاحظ ان الحاجات سعرها قليل قوي .. همه خلعونني في موسم الاوكازيون ولا ايه ؟ ..
- أو مرني انت بس يا ريس وقولي بتفكر في ايه ..
- بفكر اطلع بطياره هليكوبتر من شرم وهضربلي ضربتين تلاته كمان .. يعني عايز 3000 جنيه
زيادة مفهوم؟؟
- انا معاك يا ريس .. بس انت هتشعللها على اسرائيل تاني؟؟ .. احنا مش ناقصين ..
- ونبص لبره ليه؟؟ ... مهني بلدنا أولى بالضرب .. والحاجات اللي تنضرب فيها كثير ..
- خلاص يا ريس .. اضرب انت وابعثلي التقارير وانا هتولى حساب المعاش .. بس متنساناش في الحلاوة ..
- لا يا صبحي أرجوك .. لا حلاوة ولا دياولو .. انا اتغيرت بعد الثورة .. لن أرشي .. ولن أرمي
شيء في الشارع .. ولن أتعدى على حقوق المواطنين ..
- عفارم عليك يا ريس .. وانت علبال ما تربط الحاجات دي انا هطلعلك إذن صرف بالألفين جنيهه -
بتوع الشهر ده .. تحب احطهملك على كارت (ايه تي ام) ..
- لا يا صبحي .. احب اخدهم كاش في إيدي .. ويا ريت الألفين كلهم معدن .. عشان احس
بحلاوتهم .. اهو اطلع بأي حاجه من الشعب الفظيع ده لحد ما تفرج ..
- ونعم الاختيار يا ريس ..
- طلب أخير يا صبحي ..
- عيون صبحي يا ريس ..
- الدبابات والمدرعات لسه في الشارع؟؟
- ايوه يا ريس .. انت بتفكر ترجع ولا ايه ؟
- يا ريت يا صبحي .. بس لأ ..
- امال ايه ؟

- الواد جمال عايز يلحق يتصور صورتين معاهم يحطهم عالجروب بتاعه .. (نعم لجمال مبارك رئيساً لمصر)..

- لسه موجودين يا ريس .. متقلقش .. و حتى لو رجعوا .. هحوشلك دبابه على جنب و ابعتهالك (دي اتش ال) .. جمال يتصور معاها وبعدين نبقى نرجعها تاني مع اخواتها ..

- أصيل يا صبحي ..

- خدامينك يا ريس ..

- طب يا صبحي هسيبك بقى عشان آخر دقيقة في الموبايل ..

- مع ألف سلامة يا ريس ..

- سلام يا صبحي ..

كليبيك !!!

وأخيراً .. عزيزي القاريء ..
خش معايا في الفانلة ربنا يسعدك ..

عزيزي القاريء المحترم .. بقرائتك لهذه الصفحة فأنت قد وصلت بسلامة الله لنهاية الكتاب - وهذه معلومة هامة رأيت أن أذكرها لضعاف القلوب ممكن قد يتفاجئون بالغلاف الأخير في وشهم دون سابق إنذار ودون رنة من أحدهم تذكرهم بذلك ..

عزيزي القاريء المحترم .. أخبرني أحدهم أن الكاتب الجيد هو من يختلف الناس على مقالاته .. ويقابلونها بالتفحيص والتمحيص والتفحيص وتطليع ترياتيت أبوها .. وعلى الكاتب أن يكون مستكنيص وسعيد بالذم و الشتيمة كما هو مستكنيص وسعيد بالمدح والإطراء .. لذا .. فأنا أدعوك عزيزي القاريء .. من هذه الصفحة الوحيدة .. وقبل ما يخلص الكتاب وتقول يا ريت اللي جرا ما كان .. أن تنضم أنت ومن تعرفهم إلى فانلتي الداخلية عالفييس بوك .. فقط ابحث عن هذا الاسم - (فانلة داخلية تتسع لعدة أشخاص) - في البوكس الأبيض الصغفن أعلى الصفحة .. ستظهر لك صفحتي وصورتي .. وإن لم تجد صورتي فأعلم أنها فانلة شخص آخر فاحذر من الدخول منعاً للإحراج .. فإذا وجدت صفحتي المميزة وصورتي الأليفة فلا تقاوم عمل (لايك) عليه .. وسأكون سعيداً أكثر إذا نفتحني بكومنت جميل أو تعليق تخبرني فيه برأيك الثمين ..

عزيزي القاريء .. مش هتحايل عليك كتير .. أرجوك خش معايا في الفانلة .. وثق إنه لسه فيها مكان ..

صفحة الفنانة عالفيس بوك :

www.facebook.com/fanila.dakhelia

أكونت صاحب الفنانة عالفيس بوك :

www.facebook.com/khaled.bauomy1

وعلى تويتر برضة :

https://twitter.com/Khaled_Bauomy

وعلى الجودريدز بالمرّة :

bit.ly/S2zbJG

خالد بيومي فهمي

القاهرة 2011

تم بحمد الله

عن المؤلف ..

خالد بيومي فهمي

- مواليد يونيو 1982
- بكالوريوس هندسه الاتصالات عام 2004
- يعمل مهندساً بوزاره البحث العلمي منذ عام 2008
- الكتب والإصدارات
- فائلة داخلية تتسع لعدة أشخاص ، أدب ساخر ، عن دار ليلي (كيان كورب) للنشر والتوزيع ، 2011 .
- فيها لامؤاخذة حاجه حلوة ، أدب ساخر ومقالات ، عن دار ليليت للنشر والتوزيع ، 2013.
- واحد كماله (كتاب دعائي) ، مقتطفات ساخرة ومقالات ، نشر الكتروني ، 2013.
- له ما يقرب من خمسين قصة مصورة في مجلة (باسم) الصادرة عن مركز الأبحاث والنشر بالملكة العربية السعودية .
- الجوائز:
- حاصل على عدد من جوائز القصة القصيرة من دار الهلال - ساقية الصاوي - مسابقة ديوان الثقافية - مسابقة احسان عبد القدوس الأدبية
- حاصل على جائزة أفضل سيناريو في مهرجان سيني موبايل 2012 للأفلام القصيرة عن فيلم Cart.
- حصل فيلمه بورترية على جائزة تصويت الجمهور من نفس المهرجان 2013

فانلة داخلية

تتسع لعدة أشخاص

.. كاموس ايه ؟
.. الكاموس .. الكتاب الكبير ده اللي فيه الكلمه
والترجمة بتاعتها بالانجليزي ..
وقام باصص لي في السبعين مرابه اللي حواليه،
لدرجة اني حسيت ان انا قدام عصابة قطاع طرق ..
ضاقت عينيه وخذ نفس ملا بيه التوكتوك،
وقال،



خالد بيومي

.. على فكرة يا باشا.. ميغركش للنظر، والخلقه
بتاعتي.. ده انا سبع صنايع والبخت ضايح.. بس هي
البلد اللي عملت فيا كده.. بالك؟.. انا خارج من
خمسه ابتدائي.. يعني اعرف شوية حساب.. العيال
القنرة اللي حواليا دول ملبسوش تراب مدرسة من
اصله!..

قالها واحس بنشوة رهيبه، طلبت منه ان
ياخد نفس سيجارة عميق..
ولعن الزمن..

